

## Sommaire

### 1. Ouverture de la séance publique

- M. Mars Di Bartolomeo, Président

### 2. 7200 - Projet de loi concernant le budget des recettes et des dépenses de l'État pour l'exercice 2018 et modifiant:

1° le Code de la sécurité sociale;

2° le Code du travail;

3° la loi modifiée du 27 décembre 1817 sur le droit de succession;

4° la loi modifiée du 16 octobre 1934 sur l'évaluation des biens et valeurs;

5° la loi modifiée du 16 octobre 1934 concernant l'impôt sur la fortune;

6° la loi modifiée d'adaptation fiscale du 16 octobre 1934;

7° la loi modifiée du 1<sup>er</sup> décembre 1936 concernant l'impôt commercial;

8° la loi modifiée du 17 avril 1964 portant réorganisation de l'administration des contributions directes;

9° la loi modifiée du 4 décembre 1967 concernant l'impôt sur le revenu;

10° la loi modifiée du 10 mars 1969 portant institution d'une inspection générale des finances;

11° la loi modifiée du 12 février 1979 concernant la taxe sur la valeur ajoutée;

12° la loi modifiée du 13 juin 1984 portant révision de certaines dispositions législatives régissant la perception des droits d'enregistrement, de succession et de timbre;

13° la loi modifiée du 23 décembre 1998 portant création de deux établissements publics dénommés 1) Centres, foyers et services pour personnes âgées; 2) Centres de gériatrie;

14° la loi modifiée du 9 juin 1999 sur le budget, la comptabilité et la trésorerie de l'État;

15° la loi modifiée du 21 décembre 2001 concernant le budget des recettes et des dépenses de l'État pour l'exercice 2002;

16° la loi modifiée du 4 juillet 2008 sur la jeunesse;

17° la loi modifiée du 17 décembre 2010 fixant les droits d'accise et les taxes assimilées sur les produits énergétiques, l'électricité, les produits de tabacs manufacturés, l'alcool et les boissons alcooliques;

18° la loi modifiée du 12 juillet 2014 relative à la coordination et à la gouvernance des finances publiques;

19° la loi du 25 novembre 2014 prévoyant la procédure applicable à l'échange de renseignements sur demande en matière fiscale;

20° la loi modifiée du 27 juin 2016 concernant le soutien au développement durable des zones rurales;

21° la loi du 29 juin 2016 portant modification d'une disposition en matière d'impôts directs;

22° la loi du 14 décembre 2016 portant création d'un fonds de dotation globale des communes

et

7201 - Projet de loi relatif à la programmation financière pluriannuelle pour la période 2017-2021

- Exposé: M. Pierre Gramegna, Ministre des Finances

- Discussion générale: M. Claude Wiseler (interventions de Mme Viviane Loschetter, M. Aly Kaes, M. le Ministre Dan Kersch et M. le Ministre Etienne Schneider), M. le Ministre Dan Kersch, M. Claude Wiseler, M. le Ministre Etienne Schneider (intervention de Mme Octavie Modert), M. Gast Gibéryen (question d'ordre procédural), M. le Président Mars Di Bartolomeo, M. Claude Wiseler, M. Eugène Berger (interventions de M. Claude Wiseler, M. Gilles Roth, M. Alex Bodry, M. Marc Spautz, M. Claude Wiseler et M. Gast Gibéryen), M. Alex Bodry (interventions de M. Claude Wiseler et M. André Bauler)

### 3. Ordre du jour

- M. Pierre Gramegna, Ministre des Finances

Au banc du Gouvernement se trouvent: M. Xavier Bettel, Premier Ministre, Ministre d'État; M. Etienne Schneider, Vice-Premier Ministre; M. Félix Braz, M. Nicolas Schmit, M. Fernand Etgen, M. Pierre Gramegna, Mme Lydia Mutsch, M. Dan Kersch, M. Claude Meisch et M. Marc Hansen, Ministres; M. Guy Arendt, Secrétaire d'État.

(Début de la séance publique à 09.01 heures)

### 1. Ouverture de la séance publique

► M. Mars Di Bartolomeo, Président.- Gudde Moien! Ech maachen heimat d'Sëtzung op a ginn dervun aus, dass gläich de Finanzminister eis d'Matdeelunge vun der Regierung wäert maachen.

(Approbation)

Merci, Här Statsminister, dann ass dat esou.

An ech géif dann direkt d'Wuert dem Här Finanzminister, dem Här Pierre Gramegna, gi fir d'Virstellung respektiv d'Kommentéierung vum Budget fir 2018 an der pluriannueller Finanzplanung. Den Här Finanzminister huet d'Wuert.

### 2. 7200 - Projet de loi concernant le budget des recettes et des dépenses de l'État pour l'exercice 2018 et modifiant:

1° le Code de la sécurité sociale;

2° le Code du travail;

3° la loi modifiée du 27 décembre 1817 sur le droit de succession;

4° la loi modifiée du 16 octobre 1934 sur l'évaluation des biens et valeurs;

5° la loi modifiée du 16 octobre 1934 concernant l'impôt sur la fortune;

6° la loi modifiée d'adaptation fiscale du 16 octobre 1934;

7° la loi modifiée du 1<sup>er</sup> décembre 1936 concernant l'impôt commercial;

8° la loi modifiée du 17 avril 1964 portant réorganisation de l'administration des contributions directes;

9° la loi modifiée du 4 décembre 1967 concernant l'impôt sur le revenu;

10° la loi modifiée du 10 mars 1969 portant institution d'une inspection générale des finances;

11° la loi modifiée du 12 février 1979 concernant la taxe sur la valeur ajoutée;

12° la loi modifiée du 13 juin 1984 portant révision de certaines dispositions législatives régissant la perception des droits d'enregistrement, de succession et de timbre;

13° la loi modifiée du 23 décembre 1998 portant création de deux établissements publics dénommés 1) Centres, foyers et services pour personnes âgées; 2) Centres de gériatrie;

14° la loi modifiée du 9 juin 1999 sur le budget, la comptabilité et la trésorerie de l'État;

15° la loi modifiée du 21 décembre 2001 concernant le budget des recettes et des dépenses de l'État pour l'exercice 2002;

16° la loi modifiée du 4 juillet 2008 sur la jeunesse;

17° la loi modifiée du 17 décembre 2010 fixant les droits d'accise et les taxes assimilées sur les produits énergétiques, l'électricité, les produits de tabacs manufacturés, l'alcool et les boissons alcooliques;

18° la loi modifiée du 12 juillet 2014 relative à la coordination et à la gouvernance des finances publiques;

19° la loi du 25 novembre 2014 prévoyant la procédure applicable à l'échange de renseignements sur demande en matière fiscale;

20° la loi modifiée du 27 juin 2016 concernant le soutien au développement durable des zones rurales;

21° la loi du 29 juin 2016 portant modification d'une disposition en matière d'impôts directs;

22° la loi du 14 décembre 2016 portant création d'un fonds de dotation globale des communes

et

7201 - Projet de loi relatif à la programmation financière pluriannuelle pour la période 2017-2021

Exposé de M. Pierre Gramegna, Ministre des Finances

► M. Pierre Gramegna, Ministre des Finances.- Här President, Här Premierminister, léif Kollegen aus der Regierung, léif Membere vun der Chambre des Députés: Den Tram fiert, d'Ekonomie dréit an d'Statsfinanze sti gutt do!

► Une voix.- Très bien, excellent!

► M. Pierre Gramegna, Ministre des Finances.- Dank enger virsiichteger Finanzpolitik an dank enger gudder wirtschaftlecher Lag ass et dësem Land méiglech, fir vill ze investéieren an domadder d'Liewensqualität vun de Bierger ze verbessern, d'Kompetitivitéit vun den Entreprises ze stäerken an d'Zukunft ze preparéieren. Dat ass de Leitmotiv vun dësem Budget. Dat ass d'Essenz vun der Politik vun dëser Regierung.

E Budget ass net eppes, wou een op kuerzfristeg Terminer muss kucken, mä wat ee muss laangfristeg kucken. E Budget mécht een net fir déi nächst Wahlen, e Budget mécht ee fir déi nächst Generationen, well déi Choixen, déi mir haut treffen, déi Choixen hunn eng Influenz op eis Kanner an op eis Kandskanner. An déi Investissementer, déi mer haut maachen, wäerten hiert Liewe muer besser gestalten. Fir dat an de Wieder vun der Rapportrice Joëlle Elvinger ze soen: „Et ass e Budget, deen net nëmmen den Hei an Elo gesäit, mä verantwortungsvoll no vir kuckt.“

Ech maache meng Presentatioun haut an dräi Deeler. Ech wäert am éischten Deel d'Prioritéiten erklären, am zweeten Deel wäert ech de makroekonomesche Kontext beschreiwen an am drëtten Deel op d'konkret Zuele vum Budget 2018 zrëckkommen.

Fir d'Éischt déi grouss Prioritéiten: Ech hat se schonn am Oktober hei beim Depôt virgestallt, ech wäert elo nëmmen d'Haaptlinnen eraussträchen.

Fir d'Éischt wéilt ech awer der Rapportrice Joëlle Elvinger e grouss Merci soe fir hire ganz kompletten a faktuelle Rapport, deen den Akzent richtegerweis op d'Jugendlech gesat huet. Ech wéilt och soen, dass ech hir Analys iwwert déi grouss gesellschaftlech Defie komplett deelen an zwar d'Defien, déi mer hunn an de Familljemodeller, dat ass deen éischte Punkt, d'Zusammensetzung vun eiser Gesellschaft, dat ass deen zweete Punkt, d'Digitaliséierung vun eiser Wirtschaft den drëtten an de Klimawandel de véierten.

Mat grousser Interessi hunn ech alleguerten d'Avisé gelies, déi zum Budget proposéiert gi si vun dem Conseil d'État, vun der Chambre-professionellen, vun der Cour des comptes, vum Conseil national des finances publiques, vun der Zentralbank an och vum Comité olympique et sportif luxembourgeois. Si alleguerten

hunn interessant an utile Iwwerleeunge gemaach, och wann ech se net all kann deelen.

Wann een näamlech déi verschidden Avisé liest, gesäit een, dass et schwéier ass, hinnen all gerecht ze ginn. Do gëtt et déi eng, déi mengen, mir hätte ganz vill Sputt, fir mei Depensen ze maachen. An do gëtt et anerer, déi mengen, et misst een nach ganz vill nei Aspueunge maachen. An do gëtt et souguer eng Institutioun, dat ass d'Chambre de Commerce, déi mécht gär dat eent an dat anert zesammen, wat natierlech net méiglech ass.

Ech schlëssen doraus, dass d'Regierung d'gëlle Mëtt fonnt huet. De Statsbudget kann een net isoléiert kucken, et muss ee kucken, wat fir een Impakt en huet. An ech wäert dat dann elo an e puer Punkten duerstellen.

Fir d'Éischt ass et e Budget fir d'Familljen. Fir wat soen ech dat? Eh bien, well et wichteg ass, dass de Budget sech no der neier Aart a Weis, wéi d'Famillje liewen, richt. Et ass net un der Regierung, fir de Leit virzeschreiwen, ob se solle bestuet sinn oder net bestuet sinn, ob se solle Kanner hunn oder keng Kanner hunn. Et ass jo och e Fait, dass vill Leit gescheet ginn, Verschiddener hir Kanner eleng mussen erzéien. Mir hunn also eng ganz diversifizéiert Landschaft an de Familljen. An et ass d'Verantwortung vun der Politik, deem Rechnung ze droen. An dat maache mir grad an dësem Budget.

An ech wäert dann elo zu véier Theme soen, wéi mer hei de Familljen entgéintkommen. Dat ass am Beräich vun der Kafkraaft, an der Vereenegung vu Beruff a Familljeliewen, an der Mobilitéit an am Logement. Ech fänken dann u mat der Kafkraaft.

D'Effete vun der Steiererlichterung vum leschte Joer sinn dëst Joer däitlech spierbar. Ech ënnersträchen nach eng Kéier, dass mer fir d'Monoparentallen de Crédit d'impôt verduebelt hu vu 750 op 1.500 Euro. An dëst Joer, 2018, wäert a Kraaft treden, wat mer d'lescht Joer decidéiert hunn, an zwar d'Méiglechkeet, fir eng individuell Besteuerung an enger bestuetener Koppel ze hunn. Dat hu mer dëst Joer, 2017, mat der Steierverwaltung virbereet an dat trëtt da vum 1. Januar 2018 un a Kraaft. Do besteet dann d'Optioun fir eng bestuete Koppel, fir eenzel besteiert ze ginn.

Jiddweree kann also dann eng individuell Steiererklärung maachen an trotzdeem an der Klass 2 bliwen. Dëst féiert dozou, dass jiddwereen an der Koppel an Onofhängegkeet seng Besteuerung ka bestëmmen an dofir seng eege Situatioun selwer an de Grëff kritt. Am Fall vun enger individueller Besteuerung ass et dann och esou, dass et keng solidaresch Zwangsvollstreckung méi an der Koppel gëtt.





Eng zweet Measure, déi och eréischt an de leschte Woche vun der Regierung decidéiert ginn ass, ass d'Allocation de vie chère, déi eropgeet an déi 1.500 additionell Stéit wäert concernéieren. Dat schléit am Budget mat 3,5 Milliounen additionell Depensen zou.

Ech wëll och hei ënnersträichen, dass dank der gudder Situatioun an eiser Caisse nationale de santé decidéiert ginn ass an de leschte Wochen, dass d'Visitte bei den Doktere fir Kanner a Jonker dorénavant 100%eg rembourséiert ginn. Och dat kënnt natierlech de Familljen entgéint.

E leschte Punkt, wat d'Kafkraaft ubelaangt, sinn d'Schoulbicher. Et ass esou, dass pro Joer de Käschtepunkt vu Schoulbicher am Secondaire ongeféier 300 Euro ausmécht. Dat ass ganz vill, haaptsächlech fir jonk Familljen. An d'Regierung huet jo decidéiert an annoncéiert, dass dat d'nächst Joer soll gratis ginn. Dat ass e Käschtepunkt vu 14,5 Milliounen.

Den zweete Punkt, wou mer de Familljen entgéintkommen, ass fir e besseren Equilibre tëschent Famill a Beruff ze fannen. Fir d'Éischt hu mer elo emol de Congé parental renovéiert, méi attraktiv gemaach, an e fënnt vill Zousproch. Dofir gesi mer d'nächst Joer vir, dass deen 98 Milliounen méi wäert kaschten, wéi dat am Pluriannuel virgesi war.

Zweetens, de Pappecongé, dee geet vun zwee Deeg op zéng Deeg erop am Privatsecteur, an zwar fir de Pappen ze erlaben, bei Neigebuerene méi Plaz a méi Zäit ze fannen. Dat ass eng Measure, déi wäert ronn 12 Milliounen Euro kaschten. Dat bezilt net de Patron, och net d'Entreprise, mä de Stat. An dofir ass dee Kreditt natierlech beim Aarbechtsminister ugesidelt.

Fir den Alldag vun den Eltere besser ze maachen, awer och fir d'Education vun eise Kanner besser ze gestalten, hu mer jo eng gratis Sprochefeederung am Accueil vun 20 Stonne pro Woch agefouert. Dës Measure ass fir all Kanner tëschent engem a véier Joer a gëtt vun den Elteren natierlech extrem geschätzt. De Barème vun de Chèque-servicen ass doduerch och adaptéiert ginn. An de Stat wäert am Joer 2018 380 Milliounen fir Chèque-servicen ausginn. Dat ass eng Augmentation vun 10,6% par rapport zum leschte Joer.

Mä méi interessant ass nach vläicht dës aner Ziffer, déi nach net vill an d'Effentlechkeet komm war, dat ass, dass duerch déi Mesuren de Käschtepunkt vun der Crèche fir d'Elteren d'nächst Joer wäert ëm 18,5% erfroegen. Ech freeë mech, dass d'Chambre des Salariés an d'Chambre des Fonctionnaires et Employés publics dës Mesuren all ausdrécklech begréisst hunn.

Am Beräich vum Logement gëtt och ganz vill gemaach, wat de Familljen zeguttkennt. De Budget vun de Subventionne fir Sozialwunnengen a Wunnengen „à coût modéré“ geet 19% erop op 118 Milliounen. Eng zweet Measure, déi am Laf vum Joer presentéiert ginn ass an déi nach muss ugeholl ginn, ass fir d'Loyerssubventionne méi gënschteg ze gestalten, fir dass méi Famillje kënnen dovunner profitéieren.

Eng drëtt Measure, déi am Raum stoung, déi elo eréischt an de leschte Woche confirméiert ginn ass an déi dann elo am Budget iwwert den Amendement agefloss ass, ass déi sougenannt Measure vum Quart de taux, fir méi Haiser an Terrainen an d'Offer op de Marché ze kréien. Vu dass mer elo wëssen, wéi déi Measure am Laf vum Joer 2017 gegräff huet, si mer der Iwwerzeugung, dass mer déi Measure sollen d'nächst Joer weiderféieren. Och dës Measure, mengen ech, gëtt dobauss ganz positiv empfaangen.

E véierten a leschte Beräich, wou mer de Familljen entgéintkommen, ass natierlech dee vun der Mobilitéit. De Funiculaire an den Tram fuere säit leschtem Sonndeg, an dat net nëmmen an der Zäit, mä och am Budget. Den Arrêt Pafendall, wou de Funiculaire fortgeet fir op d'Rout Bréck erop, ass 20% méi bëlleg ginn ewéi am Budget virgesinn an ass dräi Méint virdru fäerdeg ginn. Dat ass d'Budgetpolitik vun dëser Regierung: ënnert dem Budget an an der Zäit.

D'Streck um Kierchbierg ass awer just déi éischt Phas, an dofir sinn ongeféier 250 Milliounen investéiert ginn. Fir déi zweet Phas, déi dann nach op d'Cloche d'Or an op de Findel geet, wäerten 228 Milliounen weider virgesi ginn.

De Fonds du rail gëtt d'nächst Joer mat 292 Milliounen dotéiert a wäert domat den Zuchsebau moderniséieren. Am Ganze gëtt d'Regierung d'nächst Joer 827 Milliounen aus fir den effentlechen Transport, e Rekord!

A leschtens hu mer och fiskalesch Mesurë geholl, fir den Individualverkäier méi nohalteg ze gestalten, andeem mer d'Autoen, déi hybrid oder elektresch sinn, féerden.

No de Famillje kommen ech elo bei d'Mesuren, déi am Interêt vun den Entreprisë sinn, fir déi

méi kompetitiv ze maachen. Mat der Steuerreform vun leschte Joer war jo a Kraaft getrueden, dass dës Joer d'Kierperschaftsteuer vun 21% op 19% erfroeg. Vum 1. Januar vum nächste Joer un ass déi Steuer 18%.

Ech rappeléieren och, dass mer fir déi kleng Entreprisën a fir Start-uppen en Taux vu 15% hu fir Benefisier, déi ënner 25.000 Euro leien. Mir hunn am Laf vun dësem Joer e Gesetzesprojet eraginn, fir d'Besteuerung vun der Propriété intellectuelle méi gënschteg ze gestalten. Dee Regimm wäert d'nächst Joer a Kraaft treden an den Entreprisën hëllefen ze innovéieren. De Fonds de l'innovation kritt d'nächst Joer eng Dotatioun, déi 41 Milliounen méi héich ass ewéi dës Joer.

A leschtens hu mer hei eng nei Measure am Budget virgesinn, déi d'nächst Joer soll a Kraaft treden, dat ass de Crédit d'impôt fir Investissementer am IT, an der Technologie de l'information. Fir Investissementer an deem Beräich bis 150.000 Euro kritt een e Crédit d'impôt vun 8%, an iwwer 150.000 Euro ee vun 2%, wann ee Software keeft. Domat ënnerstëtzt d'Regierung déi Entreprisën, déi sech wëlle moderniséieren an déi den Zuch vun der Digitalisation net wëlle verpassen.

D'Chambre des Métiers an d'Chambre de Commerce hunn dës Measure ausdrécklech ënnerstëtzt.

Leschtens huet dann och d'Chambre des Métiers sech zefridde gewisen, dass mer an den nächste véier Joer wäerte 65 Milliounen virgesinn, fir nei Terrainen an Industriezonen ze schaffen. Wann et den Entreprisë gutt geet, da profitéiert jiddwereen dovun. Da profitéieren och d'Mataarbechter, well se besser Salaire kréien oder well se eng Aarbecht fannen.

An dann, op der éischter Grafik - Dir misst allequieren e Paquet mat Grafike verdeelt kritt hunn - gesitt Der um éischte Slide, dass den Emploi zu Lëtzebuerg tëschent 2013 an 2018 regelméisseg an d'Luucht gaangen ass. Den Taux ass am Laf vum Joer 2017 3,2%, dat ass eng ganz remarkabel Ziffer.

Op der Grafik 2 gesitt Der, dass natierlech, wa vill Aarbechtsplaze geschafe ginn, de Chômage och regelméisseg erfroeg säit 2014, wou en iwwer 7% war. An haut ass de Chômage 5,8% an e wäert d'nächst Joer nach weider falen.

Fir dësen Trend weider ze ënnerstëtzen, huet d'Regierung de REVIS agefouert, de Revenu d'inclusion sociale. Anescht wéi den RMG ass de REVIS esou konzipéiert, fir d'Leit erëm op den Aarbechtsmaart ze kréien oder se iwwerhaupt dohinner ze kréien.

Dëse Projet gouf am Oktober 2017 och elo nach nogebessert a wäert natierlech säin Nidderschlag am Budget fannen. Dës positiv Entwécklungen um Aarbechtsmarché sinn natierlech och positiv fir de Statsbudget, an net nëmmen, well mer doduerch mat den neien Aarbechtsplaze méi Recettë kréien, mä och, well et besser ass, an d'Aarbecht ze investéieren ewéi an de Chômage.

Wat mech besonnesch freet ass awer, dass vu ville vun deene Mesuren, déi ech elo hei opgezielt hunn, wäerten d'Frae profitéieren, well et wäert hinnen hëllefen, finanziell méi onofhängeg ze sinn, déi richtig Choix kënnen ze maachen, fir Famill a Beruff mateneen ze conciliéieren. Et wäert hinnen och hëllefen, hir eege Pensioun opzebauen an net méi vum Conjoint ofzehänken.

Am Oktober 2017 huet den Institut européen pour l'égalité des femmes et des hommes seng lescht Editioun erausbruecht iwwert d'Gläichberechtigung zu Lëtzebuerg. An dee Gläichberechtigungsindex weist, dass Lëtzebuerg op der nengter Plaz ass vun 28 Länner an der EU. Mir leien a fënnef vu sechs Domäne besser ewéi d'Moyenne communautaire. Dat ass e gutt Resultat, wat een natierlech nach ka verbesseren. Mä et ass e gutt Resultat.

An op engem Punkt ass Lëtzebuerg de Spëtze-reider. An zwar ass et esou, dass an der Moyenne an der EU den Ënnerschied an der Pai tëschent Mann a Fra 16,3% ass. Eh bien, zu Lëtzebuerg ass den Ënnerschied am „pay gap“ nëmme 5,5%. Doriwwer kann ee sech wierklech freeën. Et ass nach ze vill, mä mir sinn doran déi Beschde de Moment. A mir mussen natierlech kucken, dass mer op null kommen.

D'makroekonomescht Ëmfeld ass den zweeten Deel vu menger Presentatioun. D'makroekonomescht Ëmfeld ass gutt an dofir hunn d'Lëtzebuerger all Grond, fir optimistesich ze sinn, a si sinn et och. An der Etüd, déi d'Lëtzebuerger Zentralbank säit 2002 mécht, gesäit een, dass d'Vertraue vun de Consommateuren zu Lëtzebuerg ganz héich ass. En fait ass et esou héich ewéi nach ni, säitdeem gemooss ginn ass. Ënner anerem maache sech d'Leit manner Suerge fir de Chômage. Si sinn optimistesich, dass se finanziell muer besser dostinn ewéi haut, a vill soen, dass se och eng gutt Perspektiv hätten, fir Erspuernesser ze maachen.

Aner Ëmfroe weisen an déiselwecht Richtung. Dat ass net nëmmen e Bauchgefühl vun de Leit, dat sinn déi objektiv Zifferen, déi weisen, dass d'Leit net fir näischt optimistesich sinn, mä well d'Leit effektiv besser ass.

Wéi ass se dann, déi Lag? D'OCDE schätzt, dass mer am Joer 2018 e Wuesstum vun 3,6% weltwäit wäerten hunn. D'Europäesch Unieon feiert hiert 18. Trimester hannerene mat positiven Zifferen. Fir Lëtzebuerg gesäit de Statec e Wuesstum vun 3,4% fir dës Joer vir a vu 4,4% d'nächst Joer.

Op der Grafik Nummer 3 gesitt Der, wéi d'Tendenz an de leschte fënnef Joer zu Lëtzebuerg war. Mir haten tëschent 2013 an 2018 eng Moyenne vu Wuesstum vun 3,9%. Wann een dat am internationale Verglach kuckt op 2017, situéiert sech Lëtzebuerg mat deenen 3,4%, vun deenen ech virdru geschwat hunn, am gudden Mëttelfeld.

D'Inflatioun zitt erëm liicht un. Se war 0,3% d'lescht Joer, se ass dës Joer wahrscheinlech 1,7% a wäert d'nächst Joer bei 1,4% leien. D'Steuerreform kuerbelt d'Nofro un, eng Tatsaach, déi d'Ratingagencen an och anerer confirméieren.

D'Kommissioun zu Bréissel ënnersträicht dee positiven Effekt a seet: „In light of its fiscal position, the recent decision by the national authorities to use the available fiscal space to implement a tax reform appears appropriate.“ Laut der OCDE an der Europäescher Kommissioun zéien och déi privat Investissementer an Europa an zu Lëtzebuerg un. Dat ass en Zeechen, dass déi Dynamik, déi mer an der Wirtschaft hunn, och wäert relativ laang daueren.

De Statec geet dervun aus, dass 2018 d'Zësen nach wäerte relativ niddreg bleiwen, mä à moyen terme wësse mer, dass déi Zëse wäerten an d'Luucht goen. Dofir ass et richtig, haut laangfristeg Investissementer mat niddregen Zësen ze maachen.

Här President, Dir Dammen an Dir Hären, wann een optimistesich ass, dann heescht dat net, dass een d'Risiken ausblennt. Ech hat schonn am Oktober hei iwwer verschidde Risike geschwat, ech wëll se kuerz nach eng Kéier opzielen.

Éischtens ass emol à court terme d'Sécherheetslag ronderëm d'Welt nach ëmmer fragill. Et brauch een do nëmmen un Nordkorea ze denken an un d'Terrorismen, déi iwwerall op der Welt à tout moment méiglech sinn. An et ass och eng Tatsaach, dass d'Decisioun vum President Trump, fir Jerusalem elo als Capitale vum israellesche Stat unzëerkennen, net eppes ass, wat d'Risiko wäert méi kleng maachen.

Mëttelfristeg Risiken, do géif ech gären e Wuert iwwert de Brexit soen: dass mer natierlech mussen gutt uechtginn als Lëtzebuerg, dass de Brexit net zu Verzerrungen an der Concurrence féiert. Dat gëllt haaptsächlech och um Gebitt vun der Reglementatioun oder um Gebitt vun der Besteuerung. Mir setzen eis a fir den „level playing field“ a wäerten eis dann och deemno zu Bréissel behuelen. D'Adoptioun vun der Steuerreform an den USA virun zwou Woche bréngt och nei Onsécherheite mat sech, déi mer genee mussen analyséieren.

Laangfristeg Risiken, do géif ech haaptsächlech op d'Digitaliséierung vun der Economie an op de Klimawandel hiweisen.

Fir d'Éischt vläicht e Wuert zum Klimawandel. Ech war de leschte Mount zu Bonn. Ech hat d'Eier, do souwuel de Grand-Duc ze begleet wéi och d'Ministre de l'Environnement. An do konnte mer kucken a vergläichen, wat verschidde Länner maachen, fir hir Ziler ze errechen a Saache Reduktioun vun CO<sub>2</sub>-Ausstouss. Lëtzebuerg wäert natierlech do seng Ziler errechen an anhalen. Mä mir hu ganz vill drop gepocht, an dat war och d'Thema zu Bonn: Wéi kann d'Finanzwelt de Klimawandel positiv beaflossen? An ech muss soen, dass sech erausgestallt huet, dass Lëtzebuerg ee vun de Virreider an deem Domän ass.

Ech konnt déi ganz „toolbox“, déi mir en place gesat hunn iwwert déi lescht Méint, do presentéieren. Nieft eiser Bourse, déi jo déi gréng Bourse „green stock exchange“ gegrennt huet, hu mir zu Lëtzebuerg eng Plattform fir Klimainvestissementer geschaaft, zesumme mat der Europäescher Investitiounsbank. Mir hunn och en Accélérateur an d'Liewe geruff, deen eng Coopération vu public/privé ass, fir fäerdegzebréngen, dass eis Fongindustrie och méi a Klimaprojete kann investéieren.

Als Finanzminister sinn ech immens frou, dass eise Finanzsecteur seng Roll spillt, fir en Effet multiplicateur ze hunn an der Bekämpfung vum Klimawandel.

Op d'Digitaliséierung, déi natierlech e Risiko ass, awer och eng Opportunitéit, brauch ech vläicht net ganz vill anzegoen, do huet d'Regierung ganz vill Initiative geholl. „Digital Lëtze-

buerg“ ass den iwwergräifende Begrëff. Mä ech wëll ënnersträichen, dass mer grad op der Finanzplaz déi Wichtigkeet erkannt hunn, andeem mer FinTech als Prioritéit erkläert hunn an do och vill gemaach hunn.

Ech wëll zum Schluss zu der Digitaliséierung och nach soen, dass d'Cofibu eis an hirem Rapport de Besoin vun der Digitalisationsemsetzung och ënnersträicht fir eis Steierverwaltungen. An et freet mech, hei kënnen ze soen, dass do villen amgaangen ass an dass d'Zesummenaarbecht mam CTIE vum Stat an deene verschidde Verwaltungen exzellent ass.

Et gëtt een Ënnerschied tëschent „Risike gesinn“ an „systematesch Schwaarzmlerei“ ze maachen. Dës Regierung mécht keng Politik vun der Angscht, mä kuckt d'Zukunft an d'A a bereet d'Land konsequent op déi nei Erausforderunge vir. Sämtlech Ratingagencë gesinn dat och esou zu Lëtzebuerg an hunn och dofir den Triple-A vun eise Land confirméiert.

Ech kommen dann elo zum drëtten Deel vun der Presentatioun. Ech kommen op d'Zifferen vum Budget 2018. Ech wäert meng Presentatioun, wéi déi aner Joren och, konzentréieren no den Zifferen vun der Kontabilitéit vun der Europäescher Unieon, genannt „Norme SEC 2010“. Wéi d'Rapportrice gëscht an hirem Bericht scho gesot huet, sinn d'Zuelen no der Bréisseler Method an déi, déi mir zu Lëtzebuerg an der Comptabilité nationale nom Gesetz vun 1999 hunn, net déiselwecht. Dat gesäit een och an der Grafik 5, déi ech extra maache gelooss hunn, fir dass ee kann déi zwou Zifferen mateneen vergläichen. Dat heescht net, dass déi eng richtig sinn an déi aner falsch. Et weist just, dass et zwou verschidde Methode gëtt, fir Zuelen ze presentéieren.

D'europäesch Norm huet zwee grouss Virdeeler. Deen éischen ass, dass ee sech ka mat anere Länner vergläichen. Deen zweeten ass, dass ee ka kontrolléieren, ob Lëtzebuerg de Stabilitéits- a Wuesstumspakt anhält. Dofir, wéi gesot, hale mer eis un déi europäesch Aart a Weis.

Da kommen ech elo zu de Recettë vun der Administration centrale. Fir d'nächst Joer rechne mir mat Recettë vu 17,3 Milliarden Euro. Dës Zuel ass net changéiert gi säit Oktober. An Dir gesitt un der Grafik Nummer 6, wéi déi Recettë sech opdeelen an, wéi gesot, mir hunn déi Zifferen net geännert. An zwar net, well mer ze vill optimistesich oder pessimistesich sinn, mä well et kee Grond dëfir ginn huet. Ech wäert mech och elo doriwwer erklären.

Ech verstinn, firwat och grad d'Opposition ëmmer erëm Bedenken ausdréckt, wann ee kuckt, wéi et mat der Realisatioun vun de Recetten ass. Déi eng soen, et géif iwwerschatt ginn, déi aner soen, et géif ënnerschat ginn. An dofir hunn ech d'Inspection générale des finances gefrot, dass si eis soll en Tableau maachen, deen Der op der Säit 7 gesitt, wéi dann d'Recetten evoluéiert hu par rapport zum Budget, dee gestëmmt ginn ass. Den Tableau weist also d'reell Recettë par rapport zum Budget.

An do gesäit een, dass an där Zäit, wou d'CSV de Finanzminister gestallt huet, den Ecart tëschent de gestëmmte Recetten an de reelle Recettë vill méi grouss war, wéi dat haut de Fall ass.

Am Laf vun dëser Legislaturperiod sinn d'Ecarten ëmmer méi zesummegaangen, d'Zifferen, déi mir vun de Verwaltunge kritt hunn, hu mir dann an de Budget opgeholl an déi befanne sech, wéi gesot, säit 2014 ganz no bei der Realitéit.

► **Une voix.**- Très bien!

► **M. Pierre Gramegna, Ministre des Finances.**- Ech zitieren och hei d'Cour des comptes, déi seet: „D'Previsiounen vun der Regierung, wat d'Recetten ugeet, si rasonabel a realisabel.“ Et ass richtig, dass, säit de Budget presentéiert gouf, de Statec seng Previsiounen vum PIB 2017 an 2018 ugepasst huet, an zwar no ënnen.

Ech wëll awer hei ënnersträichen, an dës Grafik weist dat, dass et keen direkte Lien gëtt tëschent de Resultater vun eisem Räichtum vum PIB an de Recetten. Dat gesäit een och un der Grafik 7 mat de grénge Strécher. Déi gréng Strécher ginn lech d'Ecarte vum Wuesstum un, wéi se waren am Moment, wou de Budget gestëmmt ginn ass, a wéi dann d'Realitéit e Joer duerno war. Et gëtt also, wéi d'Spezialiste soen, keen automatesche mechanesche Korrelationsmechanismus tëschent der Evolutioun vum PIB an de Recetten. An d'Estimatiounen sinn natierlech eng gutt Saach, mä en fait sinn dat Wichtigst d'Zuele selwer. An déi rieden eng kloer Sprooch.



De 27. Oktober hunn ech der Comexbu an der Chamber d'Zuele vum drëten Trimester 2017 virgestallt. An dee Moment louché mir mat de Recettë scho 6,2% iwwert deem, wat am Budget virgesi war. Laut deene leschten Zuele vun der Steierverwaltung fir d'Méint Oktober an November hält dese positiven Trend un, obwuel, wéi gesot, de PIB méi schwach ageschat ginn ass vum Statec. Déi positiv Dynamik, déi ech am Oktober presentéiert hunn, huet sech also entre-temps confirméiert. An dat gesitt Der un der Grafik 8.

Fir nach méi komplett ze sinn, kann ech lech och nach derbäisoen, dass d'Recetten, déi bei den direkte Steieren enregistriert gi sinn, op Enn November 9,1% méi héich leien ewéi d'Joer virdrun. Et gesäit een also: Deen Trend spillt weider.

Wéi kann een dat erklären? Éischtens emol duerch déi nei Aarbechtsplazen, déi geschaaft gi sinn, a virun allem elo schonn duerch méi e qualitative Wuesstum. E Wuesstum, deen och op engem méi niddregen Niveau méi héich Recettë schaaft. An ech mengen, dat ass e ganz wichtege Punkt, deen een haut hei muss ënnersträichen.

Entgéint deem, wat Verschiddener virausgesot hunn, sinn d'Steierrecetten och net duerch d'Steierreform erofgaangen, mä au contraire geklommen. Natierlech och weinst där gudder makroekonomescher Situatioun, déi dat ofgefiedert huet. D'EU-Kommissioun zu Bréissel gesäit dat net anescht a seet: „Public finances are projected to remain sound in spite of the tax-decreasing reform.“

Ech kann zu deemem Zäitpunkt soen, dass déi Previsiounen, déi mir d'lescht Joer gemaach haten iwwert den Impakt vun de Steuerrecetten an déi vill Stoff geliwwert hate fir Contestatiounen, dass déi Previsiounen, déi d'Regierung gemaach hat, sech als richtig erweisen. De Käschtepunkt war ageschat ginn op 373 Milliounen fir dëst Joer, 502 Milliounen d'nächst Joer a 524 Milliounen déi Joren duerno. Ech mengen, dass all déi Elementer weisen, dass dës Regierung alles drugesat huet, fir realistesch Recetten an de Budget ze schreiwen a realistesch Previsiounen ze maachen.

Elo kommen ech zu den Depensé vun der Administration centrale. Tëscht dem Depot vum Budget an haut sinn 20 Amendementer vun der Regierung deposéiert ginn, deenen hire Käschtepunkt ongeféier 20 Milliounen ass. 20 Milliounen ass zwar vill Geld, mä op där anerer Säit par rapport zu Depensé vun 18,2 Milliarden ass dat natierlech net visibel, soudass d'Grafik 9, déi ech lech am Oktober presentéiert hunn, nach ëmmer valabel ass.

An Dir gesitt do, dass dee gréissten Deel vun den Depensen, 8,8 Milliarde vun 18 Milliarden, also bal d'Halschent, fir Sozialleschtungen sinn, ob dat elo Transferte si fir d'Sécurité sociale, Sozialleschtungen, Subsidien oder aner Transferten.

Ech wëll hei eppes ënnersträichen, wat d'Zentralbank vu Lëtzebuerg gesot huet. Déi seet, dass mir eent vun deene Länner sinn, wou d'sozial Ënnerscheeder am klengste sinn an dass dat de Fall ass dank dem groussen Deel vu Sozialtransferten, déi de Stat mécht.

D'Evolutioun vun den Depensen am Joer 2018 ass ganz kloer ënnert dem Zeeche vun der Kontinuitéit. D'Investitiounen bleiwen op engem héijem Niveau, ronn 2,4 Milliarden, also 4,1% vun eise Rächtum, an d'Depensé vun der Administration centrale sinn am Grëff, wéi een dat op der Grafik 10 gutt gesäit. Et gesäit een et och besonnesch kloer op der Grafik 11, wou een d'Fonctionnementskäschte vum Stat, Consommation intermédiaire genannt, och ganz gutt kann novollzéien. Hei gesäit een, dass déi strukturell Mesurë vun dëser Regierung gegräff hunn.

Wat ass dann elo d'Resultat um Niveau vum Sold vun der Administration centrale?, wat jo e ganz wichtege Punkt ass.

Wann natierlech d'Recetten eropginn an d'Depensen am Grëff sinn, muss de Sold sech natierlech verbesseren. An dat ass och dat, wat mer feststellen. An dat ass och dat, wat mer iwwer all déi Jore festgestallt hu säit 2014. Ech rappelëieren, dass mer 2014 en Defizit vu minus 543 Milliounen virgesinn haten an en fait nëmmen en Defizit vu minus 197 Milliounen haten. Fir d'Joer 2015 waren 876 Milliounen ugesat als Defizit an et sinn der 263 erauskomm. An am Joer 2016 waren et 633 Milliounen, déi ugesat waren, an et sinn der 211 erauskomm.

Dir Dammen an Dir Hären, Här President, ech kann lech elo scho soen, dass mer och fir d'Joer

2017 e vill bessert Resultat wäerte schreiwe wéi dat, wat virgesi war. Virgesi war, dass mer am Joer 2017 sollten en Defizit vu ronn enger Milliarde hunn. An ech kann lech haut soen, an dat ass eng ganz gutt Noriicht, dass dësen Defizit ënner 500 Milliounen wäert sinn.

► **Plusieurs voix.** - Très bien!

► **M. Pierre Gramegna, Ministre des Finances.** - An dat hu mer dann och an der Grafik 12 gemoelt. Dee bloe Feil weist nu uewen, dat ass d'Korrektur, déi amgaangen ass ze geschéien. Wann dese positiven Trend wäert weidergoen - a mir ginn dovunner aus, dass dat de Fall ass -, da wäerten natierlech och d'Zifferen vum Joer 2018 besser si wéi dat, wat de Moment am Budget steet. A mir wäerten dann och méi séier den Equilibre an der Administration centrale kréien. D'Richtung stëmmt also, mä mir schreiwen am Moment nach ëmmer rout Zuelen an der Administration centrale. Dofir muss mer awer nach ëmmer oppassen, dass mer d'Depensen am Grëff behalen.

De Schlëselfacteur vun deemem Budget, wéi bei deene virdrun, ass den Investissement. De Schlëselfacteur ass den Investissement! Dat ass och deen, dee justifiéiert, dass mer nach e klengen Defizit bei der Administration centrale hunn. Mä firwat dann en Defizit maachen?

D'Chambre des Métiers schreift: Les investissements «(...) représentent une nécessité absolue afin de rattraper les retards qui ont été accumulés par le passé, ces derniers s'expliquant surtout par le fait que la croissance économique soutenue sur une longue période, de même que les besoins en équipements qu'elle génère, aient été sous-estimés par les gouvernements successifs.» Mir versiche jo, dat riicht-zebéien.

Ech hat am Oktober bei der Presentatioun vum Budget gefrot, dass déi Leit, déi géife mengen, et misst ee manner investéieren, mer sollten en Hint ginn, liddie ginn, wou een da soll Investisementer sträichen: bei wellecher Schoul, bei wellecher Strooss, bei wellechem Wunnengs-projekt. Ech waarden nach ëmmer, ech hunn och nach ëmmer keng Proposition do kritt.

(**Brouhaha**)

Au contraire, ech liesen, dass d'Regierung ge-lueft gëtt fir hir Investitiounspolitik. A bis 2021 bleift den Niveau vun den Investisementer ganz héich. Ech stelle fest, dass d'Chambre de Commerce kritiséiert, dass d'Investisementer, esou wéi se haut geplangt sinn, 2021 par rapport zum PIB licht erofginn, vu 4% op 3,92%, am-plaz sech ze freeën, dass mer am europäesche Verglach mat un der Spëtz sinn, wéi Der dat un der Grafik 13 kënnt gesinn.

► **M. André Bauler (DP).** - Verstehe wer will!

► **M. Pierre Gramegna, Ministre des Finances.** - Dorunner gesäit een, dass et zu Lëtzebuerg e Konsens ze gi schéngt, fir d'Investisementer op engem ganz héijem Niveau ze halen, esou wéi d'Regierung dat jo och mécht. Well et ass genee esou, wéi d'Rapportrice et gëschter gesot huet: „Wien un den Investitiounen spuert, spuert op Käschte vun den nächste Generatiounen.“

Dës Regierung spuert net op Käschte vun der nächste Generatioun. Dës Regierung spuert en faveur vun der nächste Generatioun, andeem se de Fonds souverain geschaaft huet, wou d'nächst Joer wäerten 240 Milliounen ugesammelt gi si fir eis Kanner.

Ech kommen elo zum groussen Ensemble, d'Analys vun der Administration publique, wou dann och d'Gemengen an d'Sécurité sociale bei d'Administration derbäigekuckt ginn.

D'Gemengefinanze sti gutt. Si hunn en Excedent vu ronn 200 Milliounen all Joer. Do gesi mer op déi ganz Period och de positiven Impakt vun der Reform vun de Gemengefinanzen.

Wat d'Sécurité sociale ubelaangt, och do gesi mer eng nette Verbesserung. Do ass den Excedent och all Joers relativ kloer. Et ass ongeféier eng Milliarde, déi dann all Joers an d'Reserve kënne gespeist ginn.

An deene meeschten Avisa gëtt vill iwwert d'Sécurité sociale geschwat a se gëtt natierlech an den Zusammenhang bruecht mat der No-haltegkeet vun eise Pensiounssystem. Dat ass eng berechtigt Fro. Et gëtt awer zu deemem Zäitpunkt kee Grund, fir a Panik oder fir a Schwarzmolerei ze verfallen. D'Reserve vun eise Pensiounskeese sinn esou héich wéi nach ni. An duerch déi positiv Entwécklung vun der Wirtschaft an de Rendement vum Fonds de compensation fléisse regelméisseg de Moment all Joers eng Milliarde derbäi. Dat si Reserven, déi géifen eis bis iwwer 2040 bréngen. Kee Land an Europa huet esou Reserven!

Dat wëllt awer net heeschen, dass een näischt sollt maachen. An dofir huet d'Regierung jo en Expertegrupp zesummegehuert. Deen ass beop-tragt, fir verschidden Optiounen ze bewäerten, fir sécherzestellen, dass dese System och mët-

tel- a laangfristeg gradesou stabil ass, wéi en haut ass.

Ech kommen elo op de Sold vun der Administration publique. Deen ass iwwert d'ganz Period positiv. E war och an der ganzer Legislatur-period positiv. En ass ugesat fir d'Joer 2018 op 333 Milliounen Euro oder 0,5% vum PIB a geet regelméisseg an d'Luucht, fir am Joer 2021 op 1,7% vun eise Rächtum ze klappen. An der Grafik 14 gesitt Der, dass Lëtzebuerg e gudder Schüler ass a mat deene Beschten an Europa ass, wat dee Solde de l'administration publique ubelaangt.

E Wuert zur Schold: Enn 2013 war Lëtzebuerg um Wee, fir déi europäesch Kritären net méi anzehalen a säin Triple-A ze verléieren. D'Projektiounen vum Comité de prévision vun 2013 hu virausgesot, dass eis Schold géif op 29,2% eropgoen. Wou leie mer haut? D'Statsschold läit 2018 ronn bei 22,7% vum PIB, erof vun 23,7%, wou mer 2013 stoungen. An dat trotz ganz héijen Investisementer. Dësen Taux vu Verschuldung wäert bis 2021 regelméisseg erofgoen op 21,6%. Mir leien also ganz kloer ënnert der 30%-Limitt, déi dës Regierung sech fräiwëleg ginn huet, well Dir wësst jo, laut Bréisseler Regele wäre 60% erlaabt.

An absoluten Zuele läit d'Schold bei 12,9 Milliarden. Ronn 11 Milliarden dovunner hu mer vun de vieregte Regierung geierft. Bei der Schold ass et wéi beim Invest, méi aussokräfteg, wann ee mat Prozenter schwätzt plutt wéi mat absoluten Zuelen. Mä trotzdem ee Wuert zu den absoluten Zuelen.

Eise Rächtum, eise PIB wäert laut dem Statec 2018 59 Milliarden erreche géint 46,5 Milliarden am Joer 2013. Dat ass eng Augmentatioun vun 12,5 Milliarden. An da kann een dach net higoen a soen, dass eng zousätzlech Schold vun 1,9 Milliarden net rasonabel wier! An deene fënnf Joer, 2013 bis 2018, wäerte mir zu Lëtzebuerg méi wéi 10 Milliarden investéiert hunn. Dovunner si méi wéi dräi Véierel finan-zéiert mat lafende Recetten an nëmmen ee Véierel mat Schold. Dat ass eng responsabel Politik.

Grad an Zäite vun niddregen Zësen ass dat de richtige Choix, dës Investisementer elo bëlle mat Emprunten zu engem klengen Deel ze finanzéieren. D'Zësen op der Statsschold ginn erof op 181 Milliounen. Dat ass 1% vun den Depensen. Et géif kee Sënn maachen, zu deemem Zäitpunkt wëlle mordicus den Defizit ze reduzéieren an op null ze bréngen, wa mer au contraire d'Investisementer zu historesch niddrege Konditiounen kënne finanzéieren.

Och op deem Gebitt schwätzt en Diagramm méi wéi Wieder. An dofir invitéieren ech lech, déi lescht Grafik 15 ze kucken. Do gesitt Der, dass d'Schold vu Lëtzebuerg mat 22% déi zweetniddregst an der ganzer EU ass.

Ech kommen op d'Konklusioun an un de Respekt vun den europäesche Kritären.

Lëtzebuerg ass dat eenzegt Land a bleift dat eenzegt Land, wat d'Kritäre vum Stabilitéits- a Wuesstumspakt ëmmer agehalen huet. An zwee vun deene wichtege Kritäre sinn natierlech 60% Maximalschold an d'Anhale vum Objectif à moyen terme.

D'Anhale vum Objectif à moyen terme ass verbonnen mam „output gap“ a mam Solde structurel calcul, vun deem d'Lëtzebuerger Zentralbank seet, dass et en „Concept difficilement saisissable“ ass. Ech kann der Zentralbank vu Lëtzebuerg nëmme recht ginn an ech muss soen, ech verteidegen déiselwecht Meinung zu Bréissel ronderëm den Dësch.

D'lescht Joer huet d'Regierung, esou wéi d'Europäesch Kommissioun dat och ausgerechent hat, den Objectif à moyen terme vun +0,5% op -0,5% vum PIB erofgesat, e Choix, deen d'Chambre des Salariés fortement approuvéiert. E Choix, deen awer d'Chambre des Métiers oder de Conseil national des finances publiques bedauert. Mä laut der Note de conjoncture vum Statec vum 5. Dezember läit de Solde structurel fir 2017 wäit iwwert der Limitt vun -0,5%. Mir wäerte souguer iwwer +0,5% landen.

Wéi de Statsrot a sengem Avis ervirgehuewen huet, respektéiert Lëtzebuerg säin OMT, Objectif à moyen terme, also largement. Och hei bestätegt et sech, dass et richtig war, de Wäert am Budget ganz virsichteg anzusetzen, fir do Sputt a Marge de manoeuvre ze hunn.

Trotz deene verschiddene Kriticken ass net een Avis derbäi, deen a Fro stellt, ob Lëtzebuerg säi Solde structurel oder säin Objectif à moyen terme respektéiert. Do besteet Unanimitéit. Lëtzebuerg hält dat an. Ech freeë mech iwwert déi Unanimitéit.

De Conseil d'État schreift: «Le projet de budget pour l'exercice 2018 répond aux deux objectifs que le Gouvernement s'est fixés: respect de l'OMT et maintien de la dette publique en deçà de 30% du PIB.»

D'Zentralbank vu Lëtzebuerg schreift: «Au total, le Luxembourg respecterait donc ses engagements en matière de finances publiques au niveau européen sur l'horizon de projection 2017-2019.»

An de Conseil national des finances publiques schreift och eppes Aänlech. Wann een déi verschidden Avisen iwwert de Budget an der Regierung hir Finanzpolitik liest, da fällt engem eppes op: Mir sinn zu Lëtzebuerg ganz streng mat eis selwer. An dat ass och gutt esou. Mä et muss een awer och kënnen iwwert den Tellerrand erauskucken. Déi Leit, déi eis vu bausen observéieren, ob dat den FMI ass, d'OCDE oder d'Europäesch Unioun, si sech eens: D'Statsfinanze sinn an der Rei.

D'Kommissioun schreift: «La Commission est d'avis que le projet de plan budgétaire du Luxembourg (...) est conforme aux dispositions du pacte de stabilité et de croissance. Elle invite les autorités à exécuter le budget 2018.» Deem ass näischt bäizefügen.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Finanzminister. An ech gesinn, eisen éischte Riedner ass prett. Den Här Claude Wiseler, de Fraktiounschef vun der CSV, huet d'Wuert.

► **M. Alex Bodry (LSAP).** - Dat gëtt schwéier!

**Discussion générale**

► **M. Claude Wiseler (CSV).** - Merci, Här President. Ech wëll mat dem Finanzminister senge Wiederer vum Budget 2016, also Dezember 2015, ufänken, deen do gesot huet, wou en déi positiv Situatioun a sengen Aen, déi en do fonnt huet, beschriwwen huet an dorauer geschloss huet oder sech d'Fro gestallt huet, ob en elo kéint ufänken, Kaddegen ze maachen. An en huet sech selwer d'Antwort ginn a geäntwert: „Absolut net!“ Dat sinn Är Wiederer! „An ech erklären lech och, firwat. Ech wëll hei op fënnf Grënn agoen“, hutt Dir gesot.

„Deen éischten: Déi positiv wirtschaftlech Entwécklung sinn nach net um Niveau vun de Statsfinanzen ukomm.“

Zweetens, d'Wirtschaftslag weltwäit ass weider fragill“, hutt Der och dës Keier beschriwwen.

„Drëttens, de Stat huet ëmmer nach héich Scholden“, hutt Dir gesot.

„Viertens, den Zukunftspak ass nëmmen dann effikass, wann och all Mesuren ëmgesat ginn.“

A fënneftens, Lëtzebuerg muss sech un en neit steierlecht Ëmfeld upassen.“

Dat ware virun dräi Joer staark Wiederer vum Finanzminister. An ech zéien direkt als Konklusioun: Hätt en d'Konsequenzen aus senger eegener Analys sengerzäit gezunn, dann hätte mer haut missen en anere Budget presentéiert kréien. Well fir eis ass de Budget, deen haut vir-läit, net e Budget, deen d'Zukunft virbereet, mä e Budget, deen d'Zukunft hypothekéiert.

Mä fänke mer vu vir un. Ech wëll fir d'Éischt der Madamm Elvinger Merci soe fir dee Budgetsrapport, dee se gemaach huet. Ech weess, wéi vill Aarbecht esou e Budgetsrapport ass.

Et ass dee leschte Budget vun dëser Legislatur-period, also Zäit och, fir e kleng Bilan ze maachen, ze kucken, wat alles versprach ginn ass an deene leschte Joren, wat gesot ginn ass a wat schlussendlech gemaach ginn ass. Zäit och, fir iwwert de Budget 2018 erauszekucken an d'Perspektiven ze maachen, déi déi gemaachte Politik an deenen nächste Jore wäert zouloossen.

Ech wëll net laang op dat internationalt Ëmfeld, déi international Situatioun agoen; de Finanzminister huet et virdru gemaach: eng Weltökonomie, déi ëm 3,6% oder 3,7% am Duerchschnitt am OECD-Raum wiisst, mat villen On-sécherheeten. Dir hutt se beschriwwen: d'amerikanesch Politik, d'Evolutioun a China, de Brexit, Nordkorea, d'fragill Ökonomie, d'Pétrolspräisser an esou weider. Ech ginn net weider dorobber an.

An och eis Nopeschlänner, wann ech just dat an der Perspektiv kucken, Frankräich, Däitschland, sinn an enger relativ positiver Evolutioun elo. An och Lëtzebuerg ass jo mat enger Hausse vun dem PIB an deene leschte Jore wirtschaftlech an enger Wuesstumsperspektiv, déi mir natierlech och daitlech begrëssen.

Dat ass d'Perspektiv, an déi sech de Statsbudget aschreift. Mä wat d'Haaptchiffere vum Statsbudget ugeet, mierke mer nach ëmmer, datt an der Perspektiv en Defizit vun eppes iwwer 900 Milliounen, dat heescht -1,5% vum PIB, dëst Joer ugesot ass. A mir gesinn, dass dës Regierung an deene leschte Joren, och wann d'Zuele vun 2017 sech an der Perspektiv besser erweisen, an der Kontinuitéit, wann een eng Kontinuitéit am Budget gesäit, dann ass dat d'Kontinuitéit vum Defizit, dee sech an deene leschte Joren ageschriwwen huet.





Ech zitëieren hei och d'Chambre de Commerce, fir lech ze soen, datt ech net deen Eenzege sinn, deen déi do Meenung huet. „Au présent stade“, seet d'Chambre de Commerce, „la seule continuité se manifestant de manière tangible est celle des déficits de l'administration centrale.“

Dës Regierung ass eng Defizit-Regierung. An der Budgetried 2015, déi ech virdrun zitëiert hunn, sot den Här Gramegna iwwert d'Recetten an d'Depensen, datt mer laangfristeg misste gesinn, an do huet en d'Laangfristegkeet mat 2018 bezeechent: „Bis 2018 kréie mer d'Schéier tëschent de Recetten an den Depensen erëm zesummen.“ An en huet da weider gesot: „An et ass keen Täschpillertrick. Dank de Mesurë vum Zukunftspak“, sot en, „sinn eis Recetten an eis Depensë bis 2018 erëm an dem Equilibre.“ Et ass keen Täschpillertrick, mä 900 Milliounen Defizit an de Previsiounen, esou wéi se hei ugi ginn, dat ass och keen Equilibre, esou wéi et virun dräi Joer, véier Joer versprach gi war.

Deen Tableau, deen Der eis 2013 gewisen hutt, an ech ka mech gutt drun erënneren, well Der 2013 konstant geschwat hutt vun enger Politique inchangée, wéi wann déi al Regierung, wa se bliwwen wär, keng Politik gemaach hätt an d'Politik einfach weiderlaffe gelooss hätt. Mä Dir hutt en Tableau gewisen, wou Der gesot hutt, mat enger Politique inchangée géife mer 2018 op engem Defizit vun eppes méi wéi enger Milliard landen. An dat wär jo total inakzeptabel. A Politique inchangée, haut si mer bei engem Resultat, wat net wäit ewech ass vun där Politique inchangée, déi Der sengerzäit als Virwurf geholl hat an déi och eng viregt Regierung selbstverständlech net elo esou gemaach hätt.

Den Ënnerschied tëschent deem, wat Dir 2013 als eng Katastroph dohigestallt hutt, an deem, wou mer haut sinn, ass minim, ass wirklech net grouss. An d'Fro ass: Wou kënn deen Defizit oder wou kommen déi Problemer, déi Dir am Budget oder déi mir am Budget identifizéieren, hier?

Dir gitt selwer e puer Äntwerten, op déi ech wëll agoen.

Déi éischt Äntwert ass, well mer eng Steuerreform gemaach hunn. Dat ass jo och eng richtig Äntwert evidententerweis, well se an de Soldé vum Budget selbstverständlech vill ännert. Mir haten d'lescht Joer e Sträit iwwert de Käschtepunkt vun der Steuerreform. D'Regierung huet 373 Milliounen fir 2017 ugekënnegt. D'Banque centrale huet et op eng laangfristeg Aart a Weis op 829 Milliounen definéiert.

De Finanzminister huet gesot a senge Rieden am Oktober, wéi en de Budget deposéiert hat, datt en u sech der Meenung wär, datt mat dem Budget d'Chiffere vun der Regierung bewise wäeren. Ech soen, datt ech dat net esou gesinn - datt mir dat net esou gesinn! A wann ech vun der Banque centrale liesen, déi an engem laangen Avis nach eng kéier op déi Method agaangen ass, déi si gebraucht huet, fir u sech de Côt vun der Steuerreform ze rechnen, da weist se a seet se, datt de toute façon, egal wien elo recht huet - a si seet, si huet recht mat där Method, mä egal wéi -, een dat elo nach net kéint wëssen, well ee sécherlech 2017 net géif gesinn, wat dann d'Richtigkeet vun deem wär, wat u Recetten erakomm ass, well elo Avancé gemaach ginn.

U sech kann den definitiven Dekont vun där Steuerreform evidententerweis eréischt 2018 gemaach ginn. Also ass eng definitiv Ausso, wéi der elo scho gemaach gi sinn, an deem Moment net méiglech. A se stellt och fest, datt en Deel vun deene Recette-supplémentairen, déi erakomm sinn - an dat sinn net ech, deen et seet, mä et ass d'Banque centrale, déi et seet an de Statec, deen et zu engem Deel seet -, kommen, well méi Arrièreé gefrot gi si wéi déi Jore virdrun a well den Taux vun den Arrièreé méi héich ass.

Wéi gesot, Här Finanzminister, Dir kuckt elo kritesch bei där Ausso, mä ech maache se net. Ech hunn d'Zitater och hei vun der Banque centrale a vum Statec. A well d'Avancen net ugepasst gi sinn un déi nei Steuerreform. Wéi wëllt Der dann och d'Recetten uerdentlech aschätzen, wann Der d'Avancen net un déi nei Steuerreform upasst?

Déi zweet Äntwert, déi d'Regierung gëtt, Dir hutt se elo nach eng kéier widderholl, dat ass, well mer méi Investissementer maachen. An dann hutt Der eis d'leschte kéier ee Beispill gesot, wat jo am Prinzip och richtig ass a wat och jiddwer Mënsch versteet: Et ass normal, datt, wann een d'Zukunft vibereet, een Investissementer mécht an datt een déi och kann op Schold maachen, esou wéi jiddwer Famill et mécht. Jiddwer Famill geet iergendwann an hirem Liewe Sue léinen, fir sech en Haus ze bauen, an déi Joren duerno bezilt se dann au fur et à mesure a lues a lues déi Scholden op dat Haus erëm zrëck.

Just, wann dat Bild engem aliicht, da soen ech: D'Situatioun ass awer en eisen Ae liicht eng aner. Well déi Investissementer, déi mir als Stat, Dir als Regierung musst elo, an déi Regierungen, déi duerno kommen, mussen an deenen nächste Jore maachen, sinn net nëmmen Investissementer, déi eis 2017 oder 2018 op eng Milliard Defizit oder op Defizit bréngen. Mä vu datt déi Investissementer, déi mer maache mat deem Wuesstum, wat mer och an der Perspektiv hunn, all Joers, all Joers, all Joers an deenen nächsten 10, 20, 30 Joer als Effort d'investissemment musse weidergemaach ginn, an Dir hutt et selwer beschriwwen - ech kommen duerno nach eng kéier drop zrëck -, an den Tram hu mer vill investéiert, wann ech dat Beispill huelen, well et elo am aktuellsten ass, mä et ass net fäerdeg mat deenen Investissementer. Do kënn nach eng Phas zwee, eng Phas dräi, eng Phas véier, eng Phas fënnef hannendrun a mir sinn eis eens doriwwer, mä dat heescht awer, datt mer an deenen nächste Jore gradesou vill musse léine goen.

Et ass also net d'Bild vun enger Famill, déi eng kéier léine geet, fir sech en Haus ze kafen, an dann zrëckbezilt. Mä et ass d'Bild vun der Famill, déi u sech, wann ech Aert Beispill huelen, all Joers an deenen nächsten 10, 20, 30 Joer en Haus keeft an dann et awer net méi zrëckbezule kann, wa se net Moossnamen op enger anerer Säit hëlt. Ech wëll dat Bild emol eng kéier an eng aner Perspektiv setzen.

Zweetens sot Der, datt d'Investissementer ganz héich wäeren, datt se och ganz héich misste sinn, notament well fréier net genuch investéiert gi wär a well een och misst elo dee grouss Retard, deen an deene leschte Joren entstanen ass, zrëckbezuelen.

Wann ech dann d'Realitéit kucken, da muss ech awer soen: Am Fong ass et licht anescht. Wann een einfach d'Part vum PIB kuckt, déi tëschent de Joren 2009 an 2013 investéiert ginn ass, 3,7% bis 4,3% vum PIB, an et vergläicht ee se mat der Part vum PIB, deen elo investéiert gëtt tëschent 2014 an 2017, tëschent 3,6% an och 4,3% vum PIB, da gesäit een einfach keen Ënnerschied an de Parten, déi investéiert gi sinn. A wann ee souguer méi wäit kuckt, da gesäit een, datt tëschent 1995 an 2016, dat heescht an deenen 20 Joer, déi virdu waren, an der Moyenne 4,17% vum PIB investéiert gi sinn.

Also wann een deene viregte Regierunge reprochéiert, net genuch investéiert ze hunn an dofir hätt een elo e Retard, da muss ech soen, dat ass awer eng licht mauvaise foi. Wann Der et maacht, da muss dës Regierung sech deeselwechte Reproche gefale loosse, well se am Fong op deemselwechten Niveau vum PIB investéiert wéi déi véier, fënnef Regierunge virdu. An dat malgré engem Wuesstum, dee wesentlich méi héich ass wéi dat, wat verschidden aner Regierunge virdu kannt hunn.

De Meritt ass net, bei deem Wuesstum, deen Der elo kennt, déi Héicht vum Investissement esou ze halen. De Meritt war éischerter an deene Regierunge virdu, do wou Kris war, datt se drop gehalen hunn, matzen an der Kris den Investitionsvolumen esou héich ze halen, fir den Entrepreneuren ze hëllefen, iwwert d'Kris ze kommen. Dat war méi Meritt, wéi en elo an deem Moment vun der wirtschaftlecher Situatioun esou ze halen.

► **Une voix.** - Très bien!

► **M. Claude Wiseler** (CSV). - An deeselwechten Avis, deen ech elo gesot hunn, dee fannt Der bei der Cour des comptes, bei der Banque centrale a bei dem Conseil national des finances publiques quasiment an deene selwechte Wieder zrëck.

An et gëtt dann och gesot, et wär en onwahrscheinlechen Effort gemaach ginn, zum Beispill fir 2016 am Budget d'Investissementer ëm 28% ze héijen. Dat wär historesch héich. Wann een dann d'Analys vun der Cour des comptes kuckt, déi seet: Firwat hu mer 2016 dee risege Sprong do gemaach?, da kënn eraus, well een Deel vun där Augmentatioun, déi an engem Joer gemaach gëtt, 400 Milliounen, 500 Milliounen, 285 Milliounen dovun einfach eng Augmentatioun vun der Quote-part vu Lëtzebuerg am Kapital vun dem FMI ass. Et ass kontabel richtig, fir et mat eranzerechnen, mä fir eis dann ze soen: „Et ass dat Joer en historesche Sprong an den Investitiounen geschitt“, ass net richtig, well d'FMIs-Quote-parten, déi mer augmentéieren, kann een nun net als grouss Investitiounen zu Lëtzebuerg derbärechnen.

Wann een dann, an Dir hutt et gemaach an dat ass ganz interessant, de Budget mam Kont vergläicht, an ech wëll dat eroffbriechen op u sech d'Investitionspolitik. Wann ech do de Budget mam Kont vergläichen, da gesinn ech awer eng ganz Rei grouss Ënnerscheeder zu deem, wat budgetär annonciéiert gëtt, an zu deem, wat duerno an de Konten erauskënn, dat effektiv an der Realität investéiert ginn ass.

A souguer d'Banque centrale huet dat gesinn an huet deem dote präzise Punkt - wat gëtt annonciéiert a wat gëtt duerno realiséiert? - e ganz Kapitel gewidmet. An an deem Kapitel - ech maachen de Résumé dovunner - kënn u sech eraus, datt bei den Investitiounen, zum Beispill déi vun 2016, dat, wat virgesinn ass, 2,259 Milliarden, de Realisé nëmmen 1,995 ass. Datt mer also vun deem, wat gesot ginn ass, datt géif engagéiert ginn an d'Investissementer, 264 Milliounen 2016 net investéiert, net realiséiert hunn.

A wat nach interessant ass, dat ass, wann een eng Detailanalys dovunner mécht - wat dann elo heescht: Wou sinn dann Investissementer, déi feelen? -, da fënnt een e puer Saachen eraus. Ech wëll der just e puer hei zitëieren.

Dat Éischt, dat ass, an Dir hutt do Beispiller genannt, am Fonds du rail ass méi investéiert ginn, wéi initialement geplangt. Déi Projeten, déi säit Jore geplangt ginn - d'Beetebuerger Streck, aner Zuchstrecken, Tram an esou weider -, sinn amgaangen, ganz zolidd ze lafen. Do gëtt méi investéiert.

Par contre, do, wou wesentlech manner investéiert gëtt an deene leschte Joren, dat ass zum Beispill am Fonds des routes. 2016 waren am Projet 278 Milliounen investéiert, an dem ajustierten 207 Milliounen. A vun deenen 207 Milliounen, déi annonciéiert waren, sinn der nëmmen 177 am Fonds des routes realiséiert ginn.

Elo kann een dat - an ech kucken op déi gréng Säit, well Der approuvéiert - als eng richtig Politik fannen, an deen ee wesentlich méi auszegi wéi an deen aneren, an et kann een dat als Prioritéitpolitik setzen; just, datt ech soen: Wann ee kuckt, wat fir eng Besoin mer och am Fonds des routes hunn, wat mer alles als Problemer am Fonds des routes hunn, da sinn ech d'accord, datt an de Fonds du rail muss investéiert ginn,...

#### (Interruptions)

...mä ech fannen et net richtig, fir dann dee ganze Stroossebau esou ze negligéieren, wéi dat an deem leschte Joer am Budget geschitt ass.

An der Realität, an da fueren ech souguer weider, ginn 2016 am Fonds des routes 177 Milliounen ausginn. Dat ass och en valeur absolue manner wéi 2013, wou mer 186 Milliounen ausginn hunn, 2013. 2016 hu mer nëmmen 177 Milliounen ausginn. Also, elo en valeur absolue manner wéi viru véier respektiv fënnef Joer.

Et mag eng Politik sinn, mä, wéi gesot, ech wëll just, wann ee sech dat domat an d'Vitruin setzt, d'Zuelen emol eng kéier kloer ervirstrichen: dat, wat annonciéiert gëtt, an dat, wat duerno de Kont ass. A wann een där viregter Regierung reprochéiert, net déi Investissementer gemaach ze hunn, da soll een déi Zuelen do och eng kéier kucken.

An ech kann och weiderfueren, fir ze soen:

An dem Fonds socio-familial waren am Budget 36 Milliounen virgesinn an et sinn der am Kont 18 investéiert ginn. Socio-familial: 50% manner Investissementer.

Am Hospitalier, wou der 54 annonciéiert waren an der 26 investéiert gi sinn. 50 Milliounen mander am Hospitalier.

Am Sanitaire et social, wou der 24 annonciéiert waren an der 9 realiséiert gi sinn. 60% manner, déi realiséiert gi sinn.

Ech wëll dat - an dat soen ech dann elo och ganz korrekt - awer am Fong emol net als Reproche formuléieren. An ech wëll och hei keng Lektionen ausdeelen, well ech weess, wéi schwéier et ass, an der Realität och Investissementer ze realiséieren. Ech soen dat ganz, ganz éierlech, well ech hu laang Erfahrung doran. Ech weess, wéi schwéier et ass! Mä ech wëll awer och soen: Et soll een dann awer och net grouss Wieder doranner setzen, wann een déi Zuelen do an d'Fënster setzt an d'Realitéit duerno eng ganz aner ass.

An et muss ee sech dann och heiansdo froen, firwat mer dat net esou realiséiert kréien. Mir kréien et net esou realiséiert, well mer ze laang an de Prozedure sinn op där enger Säit, an op där anerer Säit - ech soen dat hannendrun -, well mer och net ëmmer d'Capacités hunn, fir de Rhythmus vun eisen Investissementer ze halen.

An do stellt sech eng Fro hannendrun, déi mir richtig Suerge mécht, an dat ass déi Zukunftsan déi Wuesstumsfro. Wann ech kucken, wat eis Capacité sinn, wann ech kucken, wat eis Moyene sinn, wann ech kucken, datt, och wa mer et budgetär virgesinn, eis praktesch Realisatioun vun den Investissementer deem hannendrun ass a mer net nokommen, wéi wäit mer deen demografesche Wuesstum, dee mer kennen, och sériusement, qualitativement kënnen mat den Investissementer beglee-

den, och wa mer se am Budget virgesinn, mä an der Realität duerno ëmgesat kréien. Eng Fro, déi mer grouss Suerge mécht a wou een eng kéier eng seriö Diskussioun heibannen doriwwer muss féieren iwwert déi Aart a Weis, wéi mer de Wuesstum uginn a wéi mer e beglee-

den. Déi drëtt Äntwert, déi d'Regierung gëtt, dat ass: „Mir hunn d'Depensen am Grëff, notament well mer den Zukunftspak - oder de Spuerpak - ganz wëllen ëmsetzen an ëmgesat hunn.“ An ech wëll do eng Citatioun bréngen vun dem Conseil national des finances publiques, deen am Kader vum Spuerpak seet: «Il note que le Gouvernement semble avoir renoncé à une mise en œuvre intégrale des mesures de consolidation.» Net nëmmen de CNFP seet dat, mä och all déi aner Avisen, déi ech konnt liesen.

An dat ass jo och de facto evidententerweis esou. A mir hu souguer an der Regierung eng Diskussioun vum Wirtschaftsminister, dem Här Schneider, dee seet, datt de Spuerpak ad acta geluecht war, an en deen als e Feeler bezeechent, an op där anerer Säit de Finanzminister, deen nach ëmmer seet, datt e ganz an zäitgerecht soll ëmgesat ginn.

An ech ginn net op déi Kontradiktioun an der Regierung an. Ech maachen awer just d'Bemierkung, datt hei eng Kontradiktioun ass tëschent zwee Regierungspartner, déi en fin de compte op engem Deel vun dem ze exekutierende Regierungsprogramm ass, an net op Wahlprogrammer, wou d'Parteien natierlech d'Méiglecheit hunn, anerer Meenung ze sinn. Mä hei ass eng fundamental Kontradiktioun um ze exekutierende Regierungsprogramm, déi sech an der Regierung kloer bemierkbar mécht.

An all Organisme maachen och do déiselwecht Analys. An d'Zuele soen et ganz kloer: Tëscht 2015 an 2018 war eis en Zukunftspak, e Spuerpak vun 3,46 Milliarden annonciéiert ginn. D'Realitéit sinn der 2,35. Eng Differenz vun 1,1 Milliard, déi net realiséiert ginn ass, dat heescht 32%. A wann ee kuckt, wat dat 2018 ausmécht, da mécht dat 18,1% aus. A vun deene 657 Milliounen, déi dann am Joer 2018 realiséiert ginn, sinn der 60% - 390 - op d'Erhéijung, d'Augmentatioun vun der TVA zrëckzeféieren.

Fir dann ze soen: „Mir kënnen eis déi Depensen alleguer leeschten, déi mer elo maachen, well mer virdrun den Zukunftspak ganz ëmgesat hunn“, dat fannen ech dann awer eng Zoumuddung. Dir hutt dat net ëmgesat, wat Der versprach hat. A souwisou: Dee Spuerpak, deen Der annonciéiert hat, war och haaptsächlech e Steierpak.

An all Avis ënnersträicht déi dote Kontradiktioun. An da fannen ech et zu engem Deel och schonn ironesch, wann een dann an der Circulaire budgétaire vun 2018 liest, wou Der präziséiert, datt alles, wat an deem Zukunftspak ass, muss ëmgesat ginn, an Der eng Aktualisatioun frot vun den Ekonomien, déi déi eenzel Ministère gemaach hunn. Ech mellen direkt hei den Interessi u vun eise Leit, déi an der Commission des finances sinn, fir déi doten Aktualisatioun vun den Ekonomien awer ze kréien, well mir si ganz gespaant, wéi déi dann an der Realität ausgesäit.

Déi véiert Äntwert. Et gëtt gesot: „Mir hunn en Defizit, well mer esou vill Schwierigkeeten hatten, well déi lescht Regierung eis dee Problem vum E-Commerce, der E-TVA dogelooss huet, wou se net dru geduecht hat, deen ze kompenséieren, a mir hunn eng Milliard misse vun engem Dag op deen anere kompenséieren a kucken, fir se ze fannen.“ Ech wëll e puer Wuert doriwwer soen, well esou ass et an der Realität jo och net grad.

Ech wëll fir d'Éischt soen, datt dee Regimm, deen de Luc Frieden säit 2007 agefouert huet, 6 Milliarden Euro an de Statsbudget erabruucht huet. An ech muss soen, well ech an där leschter Regierung war, datt mer frou waren, an enger Krisenzäit kënnen vun deene Suen do ze benefisséieren, well genau dat ware Suen, déi eis gehollef hunn, iwwert déi Krisesituatioun ewechzekommen, déi eis gehollef hunn, eng konterzyklesch Politik ze maachen an u sech d'Entrepreneuren um Fonctionnéieren ze halen, fir duerno aus der Kris erauszekommen.

Ech wëll also emol fir d'Éischt Merci soen, datt mer déi Steieren iwwerhaapt iwwert déi dote Joren hatten. An da sot Dir, Dir hätt missen eng Milliard kompenséieren vun engem Dag op deen aneren! Ech soen awer och, datt dës Regierung eleng tëschent 2014 an 2018 2,1 Milliarden nach vun där Steuer erakrut a se geholl huet a se och ausginn huet. A se och ausginn





huet! A se einfach an de Budget geholl huet a se och ausginn huet!

An am Wahlprogramm - wëll ech bemierken -, fir se ze kompenséieren, war d'CSV déi eenzeg vun de Parteien, déi am Kader vun där Kompensatioun virgesinn hat, datt mer eng Hausse vun der TVA wëlte maachen. Soss hat keen aneren dat am Wahlprogramm virgesinn, fir et ze maachen! Se ass awer duerno gemaach ginn. A wann een d'Hausse vun der TVA an der Realitéit haut kuckt, da stellt ee fest - stellt de Statec fest, net ech -, an ech liesen dat och: «Comme l'an passé, la progression des encaissements de TVA hors e-commerce (...) compense intégralement les pertes en matière d'e-commerce.» Just fir dat och eng Kéier als Ausso ze maachen. Net ech maache se, mä de Statec mécht déi doten Ausso.

De Finanzminister huet 2015 gesot, datt déi viregt Regierung gewosst hätt, wéi d'E-TVA an d'Luucht gaange wär. „A wat ass geschitt?“, huet en da gesot. „Näischt ass geschitt!“ An do hutt Der eppes derbäigefüügt. An dunnt hutt Der gesot... oder huele mer den Tanktourismus. „De gesonde Mënscheverstand...“, sot Der, Ar Wieder, „...geet duer, fir ze wëssen, dass mer do net éiweg wäerten dovunner liewe kënnen.“ Dat ass jo och richteg. An do hutt Der hannendru gesot: „Dofir wëlle mer an esou eng onkomfortabel Situatioun ni méi kommen an dofir hu mer e Fonds souverain gemaach, e Spuerbuch fir déi, déi no eis kommen.“ Wann dat alles esou ass, dann ass awer meng Fro, wann dat Spuerbuch ass fir all déi Saachen, déi eng Kéier ewechfalen, firwat Der dann net en Deel vun der E-TVA, déi nach erakomm ass, op d'Spuerbuch gesat hutt.

Dat verstinn ech awer, mä da soen ech awer hannendrun, an Dir hutt et selwer gesot: Wann Der elo wësst - an dat ass genau datselwecht Rasonnement, wat Dir säit Joren elo mat där viregter Regierung maacht -, datt mer aus dem Tanktourismus an deenen nächste Joren au fur et à mesure mussen erausklammen, wann Der et elo scho wësst an Dir sot selwer: „De gesonde Mënscheverstand“ geet duer, fir ze wëssen, dass mer net éiweg wäerten dovunner liewe kënnen“, wann Der et elo wësst, da froen ech mech, firwat Der net dat maacht, wat Der där viregter Regierung reprochéiert hutt, wat den Här Bausch a multiple Riede sot, déi en heibannen als Oppositionspolitiker gehalen huet, wou en ëmmer, wann iwwer Tanktourismus geschwat ginn ass, iwwer e Futurefong geschwat huet, wat jo dann deelweis Äre Fonds souverain ass, firwat Der net elo en Deel vun deene Suen huelt, fir déi an de Futurefong ze setzen.

1,5 Milliarde kréie mer haut iwwert dat eran: Tankstellen, fälschlecherweis „Tanktourismus“ genannt, an dat, wat hannendrun - Alkohol an Zigaretten - ass. Firwat huelt Der net en Deel vun deene Suen a maacht elo genau dat - genau dat! -, wat Der där viregter Regierung reprochéiert hutt,...

► **Une voix.** - Très bien!

► **M. Claude Wiseler** (CSV). - ...net ze maachen? Dir maacht et och net!

Ech kommen duerno nach mat ganz vill Ple-séier op de Fonds souverain zrëck.

Mir hu gefrot, fir déi Etüd, déi den Här Ewringmann iwwert den Tanktourismus gemaach huet, ze diskutéieren. Virun engem Joer ass se ofgeschloss ginn.

► **Mme Viviane Loschetter** (déi gréng). - Endlech!

► **M. Claude Wiseler** (CSV). - Endlech ofgeschloss ginn. Sou! Mir froe säit engem Joer, datt...

(Interruptions)

...de Finanzminister...

► **Mme Viviane Loschetter** (déi gréng). - E kennt.

► **M. Claude Wiseler** (CSV). - ...an d'Ëmweltministeresch an d'Kommissioun solle kommen, fir emol eng Kéier seriö doriwwer ze schwätzen.

► **Mme Viviane Loschetter** (déi gréng). - Se kennt.

► **M. Claude Wiseler** (CSV). - Mä Dir sot elo: „Se kënn.“ Säit engem Joer froe mer et. An an engem Joer ass se emol net komm.

► **Mme Viviane Loschetter** (déi gréng). - Mir hu 15 Joer gefrot!

► **M. Claude Wiseler** (CSV). - Dat stellen ech emol fest.

► **Mme Viviane Loschetter** (déi gréng). - 15 Joer! An dräi Motiounen!

► **M. Mars Di Bartolomeo**, *Président.* - Wann ech gelift!

► **M. Claude Wiseler** (CSV). - Schonns méi oft...

► **M. Aly Kaes** (CSV). - An trotzdem hutt Der näischt gemaach!

(Hilarité)

► **M. Claude Wiseler** (CSV). - Ech hunn et schonns méi oft gesot, mä Dir hutt gesot: „De Fonds souverain, dat ass wéi e Spuerbuch, wéi eng Spuerbéchs.“ Mä wat soll dat, a mengen Aen, e Spuerbuch, wat Der huelt fir déi zukünftige Generatiounen, an Dir huelt 50 Milliounen d'Joer an Dir gitt déi léinen an Dir setzt se dann op d'Spuerbuch. An Dir sot: „Dat ass dat, wat ech deenen zukünftige Generatiounen verierwen.“

Wann ee vu verierwe schwätzt, da sinn ech d'accord, datt ee Spuerbicher verierft, mä fir mech ass et awer och gradesou kloer, datt een d'Schold awer och verierft! An Dir kënn et net op där enger Säit an d'Spuerbéchs setzen an op där anerer Säit et op d'Bank léine goen an da soen, Dir hätt elo enorm vill fir déi zukünftige Generatiounen gemaach.

Et ass ënnert dem Stréch null gemaach. A fir mech ass dee Fonds souverain, wann Der en esou ugitt, net sënnavoll, bréngt näischt. Wann et eng Diskussioun iwwert den Tanktourismus ass, wou mer doraus Suen ewechhuelen, well déi Recetten eis ewechfalen, da si mer an enger anerer Diskussioun, mä dat gëtt net an dësem Moment esou gemaach.

► **Plusieurs voix.** - Très bien!

(Interruption)

► **M. Claude Wiseler** (CSV). - Ech hoffen.

De fënnefte Punkt. Dir sot, Dir hutt d'Statsschold am Grëff. D'Majoritéit seet: „Am Pourcentage vum PIB geet d'Statsschold erof. Mir bleiwe momentan ënner 30% vum PIB.“ All Avisen, déi ech gelies hunn, kommen awer zur selwechter Konklusioun. Ech liesen lech hei just, fir ofzewieselen, d'Cour des comptes vir: «Cette régression de la dette publique, exprimée en pourcentage du PIB, est surtout due à une forte croissance (veuillez lire: le résultat de la croissance soutenue) du PIB sur la période considérée.»

Dat heescht, mir hunn hei Zuelen, déi Der en place setzt, déi sech u sech esou ausdrécken, well mer Gott sei Dank haaptsächlech eng grouss Croissance vum PIB hunn. Mä wann een déi absolut Zuele kuckt, da gesäit een, datt Der vun 2013 11 Milliarden op 2017 12,9 an op 2021 prévisiblement 14,2 Milliarde kommt. D'Cour des comptes rechent eng Augmentatioun vun 43% innerhalb vun de Joren 2016 bis 2021. An d'Chambre de Commerce, déi Der jo gutt kennt, concluéiert: «Le ratio d'endettement ne paraît donc sous contrôle qu'à la faveur d'une sensible hausse du PIB nominal et nullement parce que l'endettement à proprement parler serait structurellement endigué.»

D'Scholdespiral, soen all Avisen, soen och mir, geet weider. An et ass keen Avis, deen ech zum Budget gelies hunn, deen de Contraire seet. Se sinn alleguer darselwechter Meinung.

Da wëll ech hei och nach e Punkt ervirsträichen. Mä do froen ech just Explikatiounen, well mer dat net richteg verstinn. D'Banque centrale mécht och e ganz Kapitel doraus, an Dir hutt dat och als eng grouss Regierungspolitik duergestallt. Dat sinn d'Ästellungspoliticken beim Stat, wou mer 2016 jo 690 Leit an 2017-2018 iwwer 1.000 Leit als nei Poste virgesinn hunn. Dat mécht zum Beispill fir 2016 cumuléiert 1.210 Posten, déi hätte missen nei age-stallt ginn.

An da kréien ech d'Rechnung - d'Banque centrale mécht se, ech liese se och enzwousch anescht -, datt an der Fonction publique awer 2016 net méi Leit geschafft hunn, mä datt mer u sech beim Stat 163 Leit manner schaffen hunn an där doter Period, wou mer am Fong 1.200 Leit méi hätte misse beim Stat hunn oder zumindest deelweis méi beim Stat hunn.

An do stelle mer eis eng Rei Froen. Déi éischt Fro...

(Interruption)

Ech waarden duerno op d'Äntwert. Jo, Dir sot: „Et ass falsch“, mä da wier ech frou, wa mer d'Äntwert duerno am Detail kéinte kréien.

► **M. Dan Kersch**, *Ministre de la Fonction publique et de la Réforme administrative.* - Ech kann lech se direkt ginn.

► **M. Claude Wiseler** (CSV). - Ech wier frou, wann ech se kéint duerno kréien a vläicht net elo, well eis Froe sinn: Ass dat esou? Firwat ass dat esou? A wat fir engem Secteur sinn dann alleguer déi Demanden an déi nei Posten, déi Der gefrot hutt? Wou wëllt Der se affektéieren? Firwat maacht Der et esou? Respektiv hätte mer gär eng ganz Opstellung, wat mat deene

Posten, déi Der hei froet... Dat sinn der elo awer schlussendlech quasiment iwwer 3.000, déi d'Regierung an deene leschte Joren, wann ech kumulativ kucken, nei sollt astellen, wéi genau d'Opstellung dovunner ass.

A wann Der mer da sot, wat mer jo och an deene leschte Joren an den Zeitunge gelies hunn, datt Der déi Leit bei enger ganzer Rei Institutiounen respektiv Administratiounen net fannt, déi mer enzwousch bräichten, fir ze rekrutéieren, ob dat elo eng Fro vun Examen ass, ob dat eng Fro vu Stage ass, ob dat eng Fro vun Accessibilitéit ass, esou stellen ech awer fest, datt e groussen Deel vun deenen trotzdeem am Budget virgesi sinn an datt dat eng Realisatioun ass, déi sech awer op där anerer Säit net an der Realitéit an de budgetären Zuelen erëmispigelt.

De Finanzminister war och ugetrueden, fir eng kopernikanesch Revolutioun ze maachen. Mir hate vill Diskussiounen doriwwer, fir...

(Interruption par M. Gast Gibéryen)

Dat ass, wann ech lech elo soll erklären, Här Gibéryen, fir e Budget par objectifs anzeféieren. Dat sollt méi modern, méi lisible sinn. An dat sollt och schnell geschéien.

2014 sot de Minister: „Eist Zil ass et, bis 2018 e Budget ze hunn, deen no Objektivier gestalt gëtt. Aner Länner...“, huet e gesot, „...hunn do zéng Joer fir déi Ëmstellung gebraucht. Mir maachen dat vill méi schnell.“ Haut si mer néierens an der kopernikanescher Revolutioun. De Budget gëtt nach ëmmer no klassesche Kritäre gemaach. Mir si kee Millimeter op deem dote Punkt weiderkomm.

Zweetens, wat de Finanzminister eis versprach hat, dat ass, datt mer de Pluriannuel géifen trenne vun der Diskussioun iwwert de Budget an datt mer de Pluriannuel beim État de la nation géife maachen, well dat eis géif erlaben, iwwert déi grouss Aggregater vum Budget ze schwätzen a besser d'Zukunftsperspektiven ze diskutéieren. Dir hutt gesot: „D'Koalitionspartner hu festgehalten, (...) d'Diskussioun iwwert déi pluriannuel Orientatiounen d'nächst Joer vun der Diskussioun iwwert de Budget 2017 ofzekoppelen a scho méi fréi am Joer ze maachen.“ Dat sot Der 2015. Weder am Budget 2017 nach am Budget 2018, dee mer elo amgaange sinn ze diskutéieren, ass dat do geschitt.

Meng Fro ass: Firwat hu mer et nach net gemaach? Well an eisen Aen, an ech soen dat nach eng Kéier kloer an däitlech, esou wéi de Pluriannuel elo presentéiert gëtt, wou mer just eng Opzielung hu vun eenzelne Budgetsartikelen, déi weidergefuert gi Joer fir Joer, a wou mer keng Méiglechkeet hunn, ze gesinn, wat dann d'Zukunftspoliticken, esou wéi se conceiveiert sinn, esou wéi se sollen an deenen nächste Jore gestalt ginn, wat déi budgetär iwwer méi Joren heeschen, huet de Pluriannuel a mengen Ae stricteement kee Sënn, well en net als dat politesch Instrument ka benotzt ginn, wat eis et erlaabt, eng pluriannuel Finanzsteuerung vun der Politik ze maachen.

Dat zum Budget selwer. E puer Wuert, déi ech onbedéngt awer nach wëll soen iwwert de Pluriannuel, well dat mer awer am meeschte Suerge mécht.

D'Regierung weist e Pluriannuel op, wou 2018 an 2019 nach Defiziter, grouss Defiziter agesat sinn. An dann op eemol zum Schluss vun der Legislaturperiod, 2020 an 2021, léist dat sech awer a Wohlgefallen op. Et ginn Zuelen agesat, wou den Defizit op eemol verschwënn respektiv ganz, ganz geréng gëtt. An et gëtt d'Ausso gemaach, an dat ass déi, déi mech am Fong am meeschte stéiert, et gëtt d'Ausso gemaach, datt den Defizit an de Joren 2020 an 2021 erofgeet. Elo maache mer emol e groussen Defizit, mä 2020 an 2021 geet en erof wéinst där Politik, déi mer elo amgaange sinn ze maachen!

Dozou e puer Gedanken.

Deen éischte Gedanken, dat ass deen: D'Previsiounen, déi mer am Abrëll haten, sinn erofgesat ginn, à la baisse, vum Statec mat engem Decrochage vun 3,2 Punkte vum PIB an deene leschten zwee Joer. Normalerweis muss ech awer soen, egal wéi Dir dat elo gesitt, mä normalerweis, wann een en Decrochage vum PIB huet, dann hëlt een deen eriwier an de Pluriannuel, wat notament de Surplus vun den Administration-publiken, wann Der et gemaach hätt, ewechgehol hätt. An der Realitéit setzt de Ministère an dem Pluriannuel d'Croissance erof, misst also den Defizit an aller Logik och eropsetzen, mä au contraire setzt en an där do Logik an dem Pluriannuel den Defizit, contrairement zu deem, wat logesch ass, awer erof. Wéi ass dat méiglech?

Éischtens, well d'Recetten net ugepasst ginn. Normalerweis huet trotzdem, zumindest mëttelfristeg, d'Senke vum PIB eng Influenz op d'Lounsteier, och wann dat net e mechanesche

Phenomeen ass. An d'Chambre de Commerce huet gerechent, wat dat heescht, a seet, datt deen do Phenomeen géif derzou féieren, datt mer an de Budgeten 2020-2021, esou wéi en hei presentéiert gëtt am Pluriannuel, eng Surevaluatioun vun de Recettë vu ronn 300 Milliounen kéinte feststellen. An datselwecht gëllt bei de Cotisation-socialen: eng Surestimation vun de Cotisation-sociale vu ronn 140 Milliounen.

Da kann ee soen: Wann Der dat net an de Budget huet, dann ass déi eenzeg Explikatioun, datt Der de ganzen Effekt dovunner op d'Entreprises eriwierhuelt, d'Entreprises en absorbéieren loosst. Dozou seet d'Chambre de Commerce, an ech wëll dat Zitit och virlesen, well et awer relativ kloer ass: Deen do Zeenario wär «un scénario tellement extrême qu'il démontre par l'absurde l'incohérence du scénario macro-économique sur lequel se fonde le projet de budget».

An e gëtt och net envisagéiert, deen Zeenario. An zousätzlech gëtt da gesot: Wann een d'Rechnung an d'Konsequenze vum BEPS a vum ACCIS géif derbärechnen, an dat seet d'Kommissioun, da kann een op de Budget vun der Administration publique mat enger negativer Influenz vu minus 550 Milliounen iwwert déi nächst Jore rechnen.

Op där anerer Säit stelle mer da fest, datt op eemol och d'Depensen erofginn. D'Moyenne vun der Croissance vun den Depensen tëscht 2000 an 2016 ass 6%. An op eemol, nom Enn vun dëser Legislaturperiod, tëscht 2018 an 2021 ass d'Croissance vun den Depensen dann net méi 6%, mä se gëtt am Pluriannuel op 3,9% just agesat. Wéi ass dat méiglech? Wéi ass dat méiglech?! Et steet keng Explikatioun an de Budgetspabeieren. Et steet keng Explikatioun an de Budgetspabeieren! An Dir kënn lech erënneren, déi Leit, déi an der Finanzkommissioun waren, wat déi eenzel Leit, déi eis do hiren Avis ofginn hunn, gesot hunn. Déi hu sech alleguer gewonnert, hu sech Froe gestallt an hunn et als net seriö emfonnt.

An d'Berechnunge weisen, wann een net déi Zuel vun 3,9%, déi Der elo als Augmentatioun vun den Depensé geholl hutt, mä just 5%, wat nach manner wär wéi d'Moyenne, géif huelen, da wäere mer bei engem Defizit, deen net wéi elo quasiment null ass, mä bei engem Defizit vu 740 Milliounen Euro, deen Der misst aschreiwen, ouni datt d'Ausname rektifizéiert gi wäeren. Wéi soll dat goen? Jiddweree seet et a kee versteet et.

An dat sinn eng Rei mëttelfristeg Problematiken, déi och nach ugeschwat ginn. Déi Budgetspolitik, déi elo gemaach gëtt, léisst a mengen Ae kee Fräiraum fir wesentlech Zukunftspoliticken, déi mer awer an deenen nächste Jore musse maachen, wa mer wëllen de Wuesstum, dee mer kennen, esou qualitativ begleeden, wéi dat an deenen nächste Joren och virgesinn ass. An dat sinn net nëmmen d'Zukunftspoliticken, déi vun der CSV esou unerkannt ginn, mä déi quasiment vu sämtlechen Parteien esou unerkannt ginn.

An Dir hutt virdrun d'Fro gestallt, datt déi Leit lech solle soen, wat fir eng Schoulen, Stroossen, Zich oder wat och ëmmer da solle gestrach gi vun deem Programm, dee misst gemaach ginn.

Ech soen lech, en fin de compte, wa mer dee Wuesstum hei kennen, ass am Fong den Investitiounsprogramm, esou wéi en elo an haaptsächlech am Pluriannuel virgesi war, net ausräichend, fir u sech dee Wuesstum, dee mer hunn, ze begleeden. Tram, Zuch, Autobunn, MoDu 2.0, vun deem mer nach an dëser Chamber schwätzen, Altersheemer, Schoulen, wat och ëmmer muss u sech am Pourcentage vum PIB, och wa mer manner Wuesstum hunn - och wa mer manner Wuesstum hunn! -, trotzdem nach ganz zolidd an d'Luucht goen.

Wann ech d'Zuele kucken, esou wéi se elo am Pluriannuel sinn, tëscht 2008 an 2017 ass d'Investitiounsquot all Joers ëm 6,4% en moyenne an d'Luucht gaangen iwwert déi lescht Joren, déi zwou lescht Legislaturperioden, et waren dës an déi lescht. Dir gesitt am Budget tëscht 2018 an 2021 vir, datt se net ëm 6,4% an d'Luucht geet, mä just ëm 0,6% an d'Luucht geet. An dat beschreift d'Chambre de Commerce mat deene ganz klore Wieder: «(...) ce qui équivaldrait vraisemblablement à un recul en termes réels.»

D'Previsiounen 2018-2021, déi Der hei an de Pluriannuel asetzt, si méi déif wéi d'Realitéit tëscht 1995 an 2016. An do kréie mer dann natierlech eng ganz Rei Diskussiounen. Wéi sollen all déi Programmer, déi den Infrastrukturminister eis virstellt, iwwert déi mer wäerten an deenen nächste Méint hei diskutéieren, de MoDu 2.0, wéi kënnen déi ëmgesat ginn an der nächster Zäit? A mir hunn och nach, an ech zielen dat elo net op, eng ganz Rei Projeten, wou mer mengen, datt an der Mobilitéitspolitik, souwuel am Tram wéi am Stroosse-





bau wéi op aneren, wéi op dem Zuch, muss derbäigebaut ginn.

Fir lech just e puer Beispiller ze soen:

Mir mengen, datt den Tram duerchaus muss bis op Nidderaanwen, op Conter an der drëtter, an der véierter Etapp weidergoen. Datt mer net kënnen zu Mamer ophalen, mä datt mer och mussen d'Streck op Zéisseng weiderféieren. Dat kascht alles vill Suen.

Mir mengen, datt mer musse Bypass-Léisunge maache vun der Beetebuerger Streck an Houwald-Zéisseng a Richtung Belsch. Mir mussen eng Bypass-Léisung maachen an eisen Aen a Richtung Oste mat der Nordstreck, datt mer net brauchen iwwert d'Gare centrale ze fueren. Mir musse Stroossen, Contournement wéi Märel, Zéisseng, wéi Hesper, wéi Alzeng, wéi Bascharage, wéi Dippech, wéi Dikrech, wéi Ettelbréck, wéi Clierf, wéi Housen, wéi Hengesch, wéi Houschent, jee, mir mussen d'Westtangente bauen, mir mussen d'N7 op véier Spuren ausbauen, alles dat...

► **Plusieurs voix.**- Ah!

► **M. Claude Wiseler (CSV).**- Alles dat...

(*Brouhaha*)

► **Une voix.**- Wat ass mat deenen anere Gemengen?

► **M. Mars Di Bartolomeo, Président.**- Also, et versteet ee guer näischt méi!

(*Brouhaha*)

► **M. Etienne Schneider, Vice-Premier Ministre.**- Mir verstinn den Här Wiseler och net, Här President.

► **M. Mars Di Bartolomeo, Président.**- Wann ech gelift!

(*Brouhaha*)

Wann ech gelift, wann d'Wuert gefrot gëtt, gëtt et ginn.

► **M. Claude Wiseler (CSV).**- Oder net.

► **M. Mars Di Bartolomeo, Président.**- Wann de Riedner do dermat d'accord ass.

► **M. Claude Wiseler (CSV).**- Ech géif gär weiderfueren, ma et huet och keen d'Wuert elo gefrot. Der hutt all Är Kommentaren dozou gemaach.

► **M. Etienne Schneider, Vice-Premier Ministre.**- Här Wiseler, sot eis just, wéi Der et finanzéiert, wann Der virdru gesot hutt, mir dierfen net méi Emprunte maachen. Wéi finanzéiert Der dann déi do Investitiounen?

► **M. Claude Wiseler (CSV).**- Dat ass genau meng, dat ass genau d'Fro, déi sech an de Raum stellt.

(*Brouhaha*)

► **Mme Viviane Loschetter (déi gréng).**- Loosst den Här Wiseler schwätzen!

► **M. Claude Wiseler (CSV).**- Mir hunn eng Rei Zukunftspoliticken, déi mer an deenen nächste Jore musse maachen. An ech kommen nach op anerer zrëck. Fir déi Zukunftspoliticken ze maachen, ass et noutwendeg, de Fräiraum ze schafen. Fir dee Fräiraum ze schafen, musse mer kucken, datt mer eis an deenen anere Politicken, déi mer net als Zukunftspoliticke gesinn, d'Méiglechkeet ginn, fir an deenen, déi Zukunftspoliticke sinn, d'Suen auszeginn.

► **M. Etienne Schneider, Vice-Premier Ministre.**- Wéi eng sinn dat dann?

► **M. Claude Wiseler (CSV).**- Ma da loosst mech elo emol weiderfueren! Ech soen lech genau, wat fir eis... Ech hunn lech hei gesot: Mir setze Suen an an de Pluriannuel, Här Schneider, wou mer eng Evoluitioun vun der Investitiounspolitik ëm 0,6% maachen, déi manifestement net duergeet an deenen nächste Joren, fir dohinner ze kommen, wuer mer awer musse kommen, wa mer och nëmmen d'Halschent vun deem Wuesstum realiséieren, dee virgesinn ass a fir dee mer och mussen an deenen nächste Joren d'Konditiounen schafen.

Eng aner Zukunftspolitik, déi fir eis wesentlich ass - déi fir eis wesentlich ass! -, ass déi vun der Logementspolitik. D'Regierung huet eng Rei Efforten an deene leschte Jore gemaach: Si huet de Budget ëm 3,2% eropgesat, domat och haaptsächlech d'Aide-au-loyere méi attraktiv gemaach, a si huet op där anerer Säit probéiert, fir u sech déi Demandépolitik anescht ze encadréieren, wat mer jo och begleet hunn.

Mir soen awer elo, datt an deenen nächste Jore méi Offer muss geschaaft ginn - an ech mengen, en Deel vun der Regierung seet datselwecht -, datt mer u sech musse Suen hu fir déi Offer, déi mer musse vergréisseren an d'Zurverfügungstelle vun den Terrainen esou ze realiséieren, wann dann de Plan sectoriel «Logement» bis gestëmmt ass, datt d'Regierung och Disponibilitäten huet, wou de Stat muss kënnen drop zrëckgräifen, fir Terrainen anzekafen a fir déi Logementspolitik ze finanzéieren.

An de Volume, deen elo virgesinn ass, mengen ech, geet sécherlech net duer, wa mer déi Politik wëllen ëmsetzen. Mir mussen, an dat ass och eng Politik, déi mer wëllen ëmsetzen, am Logement locatif sécherlech méi maachen. Beim Logement locatif, wa mer do méi maachen a wa mer e Logement maachen, deen u sech esou ass, datt mer de Rendement iwwert d'Locatioun net kënnen erakréien, well en à coût modéré ass oder well et Logement social ass, dann ass et kloer, datt op där enger Säit d'Gemengen an op där anerer Säit och de Stat wesentlich méi mussen an den nächsten Zäiten an déi Politicken investéieren an datt mer dofir de Fräiraum an deenen nächste Jore brauchen.

Wa mer Fräiraum fir eng modern Mëtzelstandspolitik brauchen an net nëmme fir déi Entreprises, déi elo hei an d'Land iwwer Space mining an Änlech esu erabruucht ginn, wat mer par ailleurs ënnerstëtzen, mä och fir eng Politik, wou mer de PMEen Terrainen zur Verfügung stellen, wou mer d'Modernisatioun an d'Digitalisatioun vun de PMEen esou gestalten, datt mer hinne finanziell och an Zukunft kënnen hëllefen, wou mer am Kader vum Plan sectoriel dann Terrainen zur Verfügung stellen, déi awer musse kaaft ginn an dofir de Finanzement muss opbruecht ginn. Wa mer am Kader vun der SNCI och méi Fräiraum nach mussen hu fir Engagementer fir dës Entwécklung, da mussen an deenen nächste Jore fir déi Politik Finanzen zur Verfügung gestallt ginn.

An datselwecht gëllt fir déi Diskussioun, déi mer an der Moderniséierung vun der Gesellschaft haten. Mir hate virun e puer Wochen eng Diskussioun iwwert den Här Rifkin a seng Etüd hei an der Chamber. An ech wëll elo emol déi Auseanersetzunge vergiessen, déi ech mat mengem neie Brëffrënd, dem Här Etienne Schneider, an deene leschte Méint, an deene leschte Wochen hat.

► **M. Etienne Schneider, Vice-Premier Ministre.**- Ech wäert lech nach méi oft schreiwen, Här Wiseler.

(*Hilarité et brouhaha*)

► **M. Claude Wiseler (CSV).**- Ech freeë mech op Äre Courier, Här Schneider.

Niewent all deene Kriticken, déi mer sengerzäit gemaach hunn, gëtt et natierlech eng Rei Zukunftspisten, déi an där Diskussioun opgezeechent musse ginn. Déi Circular Economy, déi elo zum Beispill zu Woltz ëmgesat gëtt, wann ech richtig informéiert sinn, do kascht de Projet eng Milliard. Dat ass e richtige Projet. E muss just net als eenzege Projet bleiwen, mir brauchen awer och zukünfteg enorm Investisementer.

Mir brauchen Ënnerstëtzung fir d'Entreprises, déi hir Aarbechtsaart a -weisen ëmänneren, déi sech steierlech mussen dorop astellen, déi Marché-publicke musse kënnen kréien, well se Circular Economy maachen, wat en anere Käschtepunkt huet. Déi Energiefroer beim Prosumer ass jo eppes, wat och e Surcouët wäert hunn a wat haaptsächlech eng Perte de revenu beim Stat bréngt. Wéi bezuele mer dat?

D'Dekarbonisatioun vum Transport ass och net eppes, wat gratis geet. Den Internet of things, mengen ech, datt, wa mer e wëlle seriö ëmsetzen, mer eng 5G-Technologie brauchen, déi muss an deem Land finanzéiert ginn. An dofir muss finanzielle Fräiraum geschaaft ginn.

Datselwecht gëllt fir d'Klima- an d'Ëmweltpoliticken. Mir sinn op Bonn gefuer an hunn do déi grouss Engagementer geholl. 40%. An déi wäerte sech och zu Lëtzebuerg an deenen nächste Wochen, an deenen nächste Méint mussen an der Praxis deklinéieren. Meng Fro ass just do, wann een d'Engagementer hält a wann een dat seet, da muss een natierlech och duerno kucken: Wat heescht dat dann an der Praxis fir Lëtzebuerg a wat heescht dat iwwert déi nächst fënnef, zéng Joer?

Ech sinn elo net am Budget vun 2018, mä am Pluriannuel, souguer iwwert de Pluriannuel eraus. Wat heescht dat déi nächst fënnef oder zéng Joer fir Lëtzebuerg? Wou ass deen drëtten CO<sub>2</sub>-Aktiounspang, deen ugekënnegt war? Wou ass den Aktiounspang fir d'Upassung vum Klimawandel? Wéi ass et mat deene 57 Moosnamen, déi mer an der Chamberskommissionn gemeinsam ausgeschafft hunn? Wéi ass et mat der Previsioun vun der Tanktourismuskonferéierung an de Konsequenzen, déi do raus gezu ginn?

Mir wëllen als Partei selbstverständlech op esou e Wee matgoen. Mir wëllen awer wëssen, wat en am Detail konkret heescht, wat mer maachen, wat et kascht a wéi dat iwwert déi nächst fënnef, zéng Joer an de Budget soll ageschriwwen ginn.

An elo hunn ech emol nach net iwwert déi Politicke geschwat, déi fir eis och wichteg sinn!

Eng Familljepolitik. Dir hutt d'Politik vun der Regierung beschriwwen. Mir mengen, datt och

eng Familljepolitik muss gemaach ginn, wou de Congé parental esou adaptéiert gëtt, datt e méi flexibel ass, a wou mer och eng Politik maachen, fir deene Familljen, déi en anere Choix huelen, fir eng Zäit bei hire Kanner doheem ze bleiwen, fir deenen och ënnert d'Äerm ze gräifen. Och deene Familljen, déi u sech vill Kanner hunn an déi, well se vill Kanner hunn, bei dem Kannergeld net gutt ewechkomm si mat där Politik, déi elo gemaach ginn ass.

Mir mengen och, datt an der Seniorepolitik, wa mer elo kucken, wat an deenen nächste Jore geplangt ass, eng ganz Rei vun Infrastrukturen feelen. Datselwecht an der Educationspolitik an an der Gesondheetspolitik, wou och musse Finanzen fräigesat gi fir en Ëmbau vun den Urgencen, fir eng aner Offer vun der IRM, fir Maison-medicallen, fir nëmme hei e puer Beispiller ze nennen.

An da wëll ech zum Schluss awer nach ee Wuert soen iwwer e Rapport, dee mer wesentlich schéngt. Dat ass dee vun der Evaluatioun vun der Soutenabilitéit à long terme vun den öffentliche Finanzen vun dem CNFP, deen am Fong mat enger brutaler Däitlechkeet seet - enger brutaler Däitlechkeet! -, wou mer momentan mëttel- a laangfristeg dru sinn, och wann deen optimisteschen Zeenario vun 1,2 Milliounen Awunner géif Realitéit ginn.

A bei engem optimisteschen Zeenario, just fir lech ze soen, wat dat bedeit, heescht et, datt mer e Wuesstum an deenen nächste 40 Joer vun 110% vun der Populatioun hunn. Dat Land an Europa, wat am zweetschnellste wiisst, ass net bei 110%, mä bei 37% an en fin de compte ass d'EU-Moyenne bei 15% demografesche Wuesstum. Mir setzen awer fir eis Zeenarioun 110% Wuesstum respektiv e weiniger manner, wa mer nëmme op eng Millioun géife wuessen.

An och bei esou engem Zeenario, mä ech stellen emol hei net d'Zeenarioun a Fro, Här Gramegna, ech wollt am Fong just soen, och bei esou engem Zeenario vun 1,2 Milliounen Awunner bis 2060 seet de CNFP, datt mer à partir vun 2033 30% Verschuldung iwwerschräide wäerten, 2043 bei 60% a bis 2060 bei 161% Verschuldung géife leien. Fir et mat Äre Wieder ze soen: A politique inchangée ass dat déi Politik, déi Der maacht, wou Der eis momentan hiféiert. Et gëtt vun dem CNFP geschriwwen, datt dat en „risque certain“ wär „concernant la soutenabilité à long terme des finances publiques“.

A se schreiwe vum OMT, Dir hutt virdrun iwwert déi -0,5% geschwat, wou Der deen erofgesat hutt. Ech wëll och net laang iwwert déi Décisioun schwätzen, fir den OMT erofzesetzen, mä ech wëll awer just nach eng Kéier déi Konsequenzen opzezeichnen, déi de CNFP gezechent huet.

Wat Der net sot, dat ass, datt mat deem OMT vun -0,5%, fir en esou ze rechnen, ass en net gerechent gi mat enger Verschuldung an den Zukunftsperspektive vun 30%, wéi Der se anonciéiert, mä mat enger Verschuldungsperspektiv vu 60%. Soss wäert Der net op -0,5% kumm. An haaptsächlech, et ass dat, wat am Fong méi problematesch ass, se ass gerechent en tenant compte vu just engem Drëttel vun den Depensen, déi mer am Finanzement, déi un d'Veralterung vun der Gesellschaft gebonne sinn, an Zukunft wäerten hunn.

Nëmmen een Drëttel vun deene Käschte gëtt mat agerechent. Zweek Drëttel ginn net mat agerechent an deene Calcullen, déi hei gemaach sinn.

Wëlte mer, an dat seet de CNFP, net ech... Dir sot ëmmer oder Dir maacht ëmmer, wéi wann dat, wat ech elo géif soen, fräi erfonnt wär a kee Sënn hätt. Ech bezieie mech hei op Avisen vum dem Conseil national des finances publiques, wat Avisen si vu Gremien, déi am Fong vun der Chamber a vun lech selwer agesat gi sinn, déi ech also als seriö empfangen, wa se d'Avisen maachen, déi ech op jidde Fall seriö huelen an déi ech dofir hei zrëckbréngen.

Wann ech déi Avisen seriö huelen a wa mer géifen op 30% Verschuldung just wëlle bleiwen a wa mer 100% vun de Käschte fir de Vieillissement géifen arechnen, da misste mer net en OMT vu -0,5%, mä ee vu 4% hunn.

A wa mer deen Zeenario wëilten, dee vum Statec elo als aktuell consideréiert gëtt, dat heescht, datt mer just op eng Millioun Awunner géife kommen, a mir wëlte bei 30% Verschuldung bleiwen a mir géifen all d'Alterskäschten aberechnen, da bräichte mer haut en OMT vu 6%. An Dir hutt en op -0,5% erofgesat!

Normalerweis wär meng Ried elo fäerdeg. Ech wëll awer just nach ee Gedanke lassginn, dee mer wichteg ass.

Ech mengen, déi Analys, déi ech elo a knapps enger Stonn oder manner wéi enger Stonn ge-

maach hunn, geet knapps iwwert de Budget vun deem Joer eraus. An déi Partie, déi fir mech am wichtigste war, war am Fong déi vum pluriannuelle Budget a vun den Zukunftsperspektiven a vun deenen Erausforderungen, déi an deenen nächste Joren op eis zoukommen.

Dat sinn Iwwerleeungen, déi mer alleguer musse féieren, wa mer d'Mëttel- an d'Laangfristegkeet vun eiser Politik, vun eise Politicken an eise Land wëllen diskutéieren an deenen nächste Joren. A fir mech ass d'Ausso, déi doranner besteet: „Ech weess net, wat a 5, 10 oder 20 Joer lass ass, an dofir kann ech, brauch ech, wëll ech mech net haut drëm bekëmmern“, eng Ausso, déi am Fong de Contraire ass vun der Responsabilitéit, déi ee sollt an der Politik huelen, wann een d'Politik wëllt gestalten, esou wéi Dir et hei sot, fir d'Zukunft a fir déi Generatiounen, déi duerno kommen.

Ech wär frou - an ech soen dat och elo an engem onpolesmeschen Toun -, wa mer kéinten hei probéieren, vun deene groussen Themen, déi mer an deenen nächste Jore wäerten hunn, d'Aschätzung vun de Käschtepunkten vun de Politicken ze maachen, datt mer wëssen, wat fir eng Engagementer, wa mer déi Politicken an deenen nächste Jore wëlle realiséieren, op eis zoukommen, wat dann déi budgetär Engagementer sinn, déi mer '18, '19, '20, '21, '22 mussen huelen, wa mer déi Politicken - wou mer zu engem Deel jo souguer d'accord matenee sinn, fir se ëmsetzen! -, wa mer déi dann an d'Realitéit ëmsetzen.

Wat dat heescht, wa mer eng Politik maachen, wou mer déi Infrastrukturen an der Komplett-heet bauen, déi mer brauchen, fir eis Mobilitéit ze geréieren.

Wou mer déi Logementspolitik esou asetzen, datt mer och kënnen probéieren, déi Augmentatiounen, déi Haussen, déi mer all Joers vun de Präisser kennen, hallefweege ze bremsen.

Wou mer eng Politik maachen am Mëtzelstand, déi och de mëttelstännige Betriber hëllef, déi Digitalisatioun, vun där mer ëmmer gemeinsam schwätzen, och an d'Realitéit ëmsetzen.

Wou mer dann déi Klimapolitik an déi Circular Economy esou ëmgesat kréien, an déi Sënn mécht a wat se effektiv an deem Land effikass mécht.

Wou mer déi Energieëmstellung, déi jo och eng Verschiebung vun der Taxatioun mat sech bréngt op dee Prosumer-Modell - wa mer dann der Meinung sinn, dee wär en Zukunftsmodell -, wéi dat finanziell ze begleet ass a wéi mer dat maachen.

An datt mer dee Budget pluriannuel, dee mer hei hunn, souguer iwwert de Pluriannuel eraus da benotzen, fir eng richtig Diskussioun ze féieren iwwert dat, wat dann d'Zukunft inhaltlech bedeit a wéi mer déi doten Zukunftspoliticken integréiert kréien an déi budgetär Perspektiven.

A wat mer dann net musse maachen oder net kënnen maachen, well mer aner Prioritéite setzen.

An dofir bräicht een natierlech méi Plaz, wéi een normalerweis op Facebook huet. An déi Charakteren, déi s de normalerweis um Tweet hues, déi ginn och net duer, fir déi doten Diskussioun ze féieren. A condition, datt mer de Wëllen hunn, fir se da gemeinsam ze féieren.

D'Erausforderung vun deenen nächste Joren ass et, de finanzielle Raum fir de Wuesstum ze schafen, dee mer brauchen, an en esou ze benotzen, datt mer déi Zukunftspoliticken och gestalt kréie mat där Marge de manœuvre financière, déi eis de Wuesstum gëtt, dee mer hoffentlech - hoffentlech! - nach an deenen nächste Jore kennen, déi mer dann hunn, fir aus deene Margen d'Zukunftspoliticke prioritär ze gestalten, an d'Suen net enzwousch anescht ausginn, mä se genau do cibléiert benotzen.

Well mer och iwwerzeegt sinn, datt dese Budget déi Zukunft net preparéiert, mä éischter hypothekéiert, a well de Pluriannuel weder e korrekten nach e realistesch Iwwerbléck iwwert d'kuerzfristeg Zukunft gëtt nach déi prioritär Politicken erlaabt ëmsetzen, kënnen mir als CSV-Fraktioun weder de Budget 2018 nach de Budget pluriannuel vun deser Regierung stëmmen.

► **Plusieurs voix.**- Très bien!

► **M. Etienne Schneider, Vice-Premier Ministre.**- Wou sinn dann Är Annerungsvirschléi, Här Wiseler?

► **M. Mars Di Bartolomeo, Président.**- Merci dem Här Wiseler. Den Här Wiseler hat eng ganz präzis Fro un den Innenminister gestallt. An





ech hu gesinn, säi Fanger ass an d'Luucht gaangen. E wëll dorop äntwerten.

► **M. Dan Kersch**, *Ministre de la Fonction publique et de la Réforme administrative.*- Jo.

► **M. Mars Di Bartolomeo**, *Président.*- Dat däerf e selbstverständlech.

► **M. Dan Kersch**, *Ministre de la Fonction publique et de la Réforme administrative.*- An dësem Fall war et un de Fonction-publiques-Minister.

Här Wiseler, ech wollt lech soen, dass opgrond vun den Diskussiounen, déi mer an der Kommissioun vun der Fonction publique gefouert hunn, ech Enn November eng Nott un d'Kommissioun geschéckt hunn, wou ganz kloer draus erausgeet, dass aus deene Joren 2014, 2015, 2016 1.450 Posten am Budget stoungen an dass mer der 1.291 konnte besetzen. Dat heescht, dass mer also ganz no un dat erukomm sinn, wat mer eis virgeholl haten.

Ech wëll och betounen, dass mer eng éischte Kéier emol an der Lag sinn, iwwerhaapt esou Chifferen ze liwweren, well mer eis se an der APE deementspreechend opgestallt hunn. Fir 2017: Selbstverständlech kann ech d'Chifferen nach net driwwer ze schwätzen. Mä et ass evident, an ech hunn dat och gesot, dass mer wëssen, dass mer a verschiddene Beräicher Rekrutierungsproblemer hunn, iwwert déi mer dann och nach eng Kéier sollten zesumme schwätzen.

Mä dat gëtt eng Präzisioun par rapport zu deene Chifferen, déi Der virdu gefrot hutt. Ech hoffen, dass dat lech da Satisfaktioun gëtt.

► **M. Mars Di Bartolomeo**, *Président.*- Jo, den Här Wiseler huet d'Wuert.

► **M. Claude Wiseler** (CSV).- Ech soe fir d'Éischt dem Fonction-publiques-Minister Merci fir d'Explikatiounen.

Ech versti just net, wou déi Differenzen tëschent den Zuelen hierkommen. Wann ech d'Banque centrale richteg verstanen hunn, kuckt si jo op där enger Säit: Wat sinn déi zousätzlech Rekrutementer? an op där anerer Säit: Wat ass dann den Nombre global vun den Effektiven, déi dat Joer beim Stat sinn?

Déi Chifferen, déi Dir elo genannt hutt, déi ech lech par ailleurs evidenterweis gleewen, entsprechen awer net deem, wat am Rapport d'activité steet. Et ass awer e Gap tëschent de Chifferen, déi dann offiziell publizéiert sinn. An dat sinn natierlech eng Rei Interrogatiounen, déi mir eis gestallt hunn.

► **M. Mars Di Bartolomeo**, *Président.*- Den Här Wirtschaftsminister huet d'Wuert.

► **M. Etienne Schneider**, *Ministre de l'Économie.*- Här President, ech waarde just nach ëmmer op d'Antwort vum Här Wiseler, wéi en dann all déi Investitiounen, déi en zousätzlech gär hätt, wëllt finanzéieren, wann e gläichzäiteg der Regierung virwerft, hir Investitiounen deelweis iwwer Emprunten ze realiséieren. Also, wéi solle mer dann all déi zousätzlech Investitiounen realiséieren ouni weider Emprunten? Erkläert eis dat, wann ech gléift!

► **Mme Octavie Modert** (CSV).- Ass hien dann an der Regierung?

► **M. Etienne Schneider**, *Ministre de l'Économie.*- An, dovun ofgesinn, fannen ech, dass Der och zum Schluss erëm eng Kéier just Froe gestallt hutt an Dir hutt keen een Annerungsvorschlag un deem Budget gemaach. Ech géif och gär verstoen, firwat dat de Fall ass.

► **Une voix.**- Très bien!

► **M. Mars Di Bartolomeo**, *Président.*- Mir sinn an der...

(*Interruption*)

Hei ass gefrot ginn, wat fir eng Prozedur dass et ass. Dir fannt dat net am Reglement, mä Dir fannt dat awer just esou niewebäi an der Verfassung, dass d'Regierung jidder Zäit Entrée hei an der Chamber huet a sech jidder Zäit kann zu Wuert mellen an dann d'Wuert ka kréien.

(*Brouhaha*)

Jo.

► **Une voix.**- En uerdentlecht Chambersreglement.

► **M. Mars Di Bartolomeo**, *Président.*- Ma ech mengen awer, dass eng Budgetdiskussioun dru wënn, wann et eng Diskussioun ass. A selbstverständlech, wa Memberen an der Chamber eppes hei wëlle soen, dängt et der Diskussioun an der Auseenansetzung, dass, wa Froe gestallt ginn, och Äntwerten dorop kommen.

Här Gibéryen!

► **M. Gast Gibéryen** (ADR).- Här President,...

► **M. Mars Di Bartolomeo**, *Président.*- Zum Reglement?

► **M. Gast Gibéryen** (ADR).- ...ech fannen et ganz gutt, wann Dir déi Diskussioun esou féiert, wéi mer se elo gefouert hunn, datt d'Ministère kënnen direkt drop äntwerten. Ech mengen, dat wäert déi ganz Diskussioun op. An dat léisst eist Chambersreglement och zou. Mä et ass falsch, wa gesot gëtt, datt opgrond vun der Verfassung e Minister kann zu jidder Zäit hei d'Wuert froen. Dat steet net an der Verfassung.

E Minister huet d'Recht, ëmmer hei an d'Chamber ze kommen, mä et ënnerläit ëmmer eisem Reglement. Eist Reglement leet fest, wéi e Minister oder wéi d'Regierung schwätzt a wéi den Temps de parole ass. Also, et ass falsch, fir ze soen, e Minister hätt ëmmer d'Recht, zu all Moment hei d'Wuert ze froen an et dann och muss kréien. Dat ass falsch!

Gutt ass awer, wa mer eng Debatt maachen, wou d'Ministère an d'Deputéierten direkt ënnereneen en Echange maachen.

► **M. Mars Di Bartolomeo**, *Président.*- Ech wëll lech da just vollstännegkeetshalber soen, dass de Chamberspräsident Juge ass, wéini dass en d'Wuert ka ginn.

► **M. Gast Gibéryen** (ADR).- Richteg!

► **M. Mars Di Bartolomeo**, *Président.*- An hei hunn ech ebe jugéiert, dass et dem Debat géif notzen, wann ee kéint zäitno eng Antwort ginn.

► **M. Gast Gibéryen** (ADR).- Richteg, awer net opgrond vun der Verfassung.

► **M. Mars Di Bartolomeo**, *Président.*- Dat kläre mer herno.

(*Brouhaha*)

Sou! Also, den Här Wiseler ass direkt vum Här Wirtschaftsminister ugeschwat ginn. Dann ass et evident, dass hien och d'Recht huet, fir dorop ze äntwerten.

Här Wiseler!

► **M. Claude Wiseler** (CSV).- Ech stelle fest, Här Wirtschaftsminister, datt déi Froen, déi ech stellen, wat awer wesentlech Froe sinn, nottamment wann Der en Investitiounsprogramm iwwert déi nächst Joren annoncéiert, nottamment wann Är Regierung seet, datt mer an der Mobilitéit nach zousätzlech Investisementer misste maachen, an ech stelle fest, datt an de Joren '19, '20, '21, wou déi Investisementer awer voll zum Droe kommen, dat, wat an de Budget agesat gëtt, absolut net deem entsprécht, wat Der an der Realitéit annoncéiert, dann ass do e Problem!

Dir sot, ech gi keng Äntwerten op Är Froen. Ech stelle just fest: Dir gitt iwwerhaapt keng Äntwerten op déi Froen, déi ech hunn! An Dir sidd an der Kontradiktioun vun deem, wat Der u sech selwer op där enger Säit annoncéiert a wat Der an Är budgetär Pabeieren asetzt.

Déi zweet Fro, dat ass: Wéi gitt Dir dee Problem do un? Ech wëll lech awer och drop äntwerten, datt mir an deene leschten zwee, dräi Joer bei enger ganz Rei Reformen eisen Desaccord mat der Regierungspolitik gewisen hunn, esou wéi se sech elo ëmsetzt. An dat hätt natierlech och finanziell Repercussione gehat op dat, wéi de Budget sech ugeschriwwen hätt.

Mir hunn zum Beispill géint déi Steuerreform, déi Der gemaach hutt, gestëmmt. A mir hu kloer an däitlech gesot, datt de Volume vun der Steuerreform, esou wéi se gemaach gi war, net dee war, esou wéi mir eis dat hätte kënnen virstellen, mä datt en dat wäit iwwerschreit, wat u sech an de Capacitéite war a wat déi Milliounen waren, déi d'Banque centrale an Äanlecher als Marge de manœuvre financière virgesinn haten.

Mir hu géint d'Gemegefinanzreform gestëmmt. A mer hunn eng ganz Rei Propositionen op den Dësch geluecht, wéi mer dat gesinn.

Mir hunn en anere Modell vum Congé parental hei deposéiert, deen en anere Käschtepunkt gehat hätt an deen de Leit méi Zäit geschenkt hätt, deen also méi familijfrëndlech an eisen Ae gewiescht wär.

Mir hunn eng Rei aner Konzepter, déi hei och nach virdu presentéiert gi sinn, wéi déi multilingual Kannerbetreung, net als gutt empfongt a mir hätte se anescht regléiert. D'Konzepter stëmmen net. An d'Finanzen, déi domadder verbonne sinn, sinn enorm héich.

Mir hätten aner Saachen, wéi zum Beispill déi Kannerbetreung, déi Der elo gratis setzt mat Chèque-services, ëmgeännert. Et hätt en anere finanzielle Volume gehat an et wär wesentlech méi selektiv gewiescht wéi dat, wat Dir ge-

maach hutt. Mir wärend weidergefuert mat deenen eenzelnen Dépenses de fonctionnement, esou wéi Der virgesinn hutt, se all Joer ze iwwerkucken, fir se am Grëff ze behalen.

Mir hunn eis och eng ganz Rei Froe gestallt iwwert déi Politique de recrutement, déi an deene leschte Jore mat 1.000 Leit méi d'Joer gemaach ginn ass, well mer nach ëmmer net genau wëssen, wou dee ganze Rekrutement higeeet.

Also, eng ganz Rei Propositionen, déi mer am Laf vun de Jore gemaach hunn, déi eng aner Gestaltung vun der Finanzpolitik ginn hätten.

► **M. Mars Di Bartolomeo**, *Président.*- Ech mengen, elo ass deen Echange gemaach. An d'Regierung huet jo herno nach genuch Riedezäit, fir op déi eenzel Orateuren anzegoen. Den Här Berger war elo ganz gedëlleg. An de Fraktiounschef vun der DP huet elo d'Wuert.

► **M. Eugène Berger** (DP).- Merci, Här President. Wéi ëmmer.

Här President, 2013, wéi dës Koalitioun ugetrueden ass, hat Lëtzebuerg eng Statsschold vun 23,5% vum PIB. Wa mer näischt ënnerholl hätten, wiere mer haut op dësem Dag, den 13.12., bei enger Statsverschëldung vun 29,2% ukomm. Et ass awer villes ënnerholl ginn. An 2018, d'nächst Joer, leie mer bei enger Statsschold vun 22,7% vum PIB an am Joer 2021, aller Viraussicht no, bei 21,6% vun eisem Räichtum. D'Statsschold geet also lues awer sécher zrëck. D'Richtung stëmmt. Mir sinn um richtige Wee.

Här President, 2013, wéi dës Koalitioun ugetrueden ass, ware mer mat eise Statsfinanzen op enger Trajectoire, wou mer eis Virgabe vum Pacte de stabilité net hätte kënnen anhalen. Mir hunn 2013 riskéiert, dann an Zukunft, also an dëse Joren, vu Bréissel de Budget diktiert ze kréien.

Mir gesinn awer elo: 2018 si mer bei deene sechs Länner an Europa, déi hir europäesch Zensur mat engem „très bien“ ausgestallt kruten a wou mer vun der Kommissioun vum Här Juncker gesot kréien: „Dir sidd um richtige Wee.“ Mir halen eisen OMT net nëmmen an, mä 2016 louche mer eis iwwert dem Solde structurel, dee mer eis fixéiert haten, dee Bréissel eis och virgeschriwwen hat: 1,6-Prozentpunkten iwwert dem OMT 2016. Och 2017 an 2018 leie mer all Kéiers iwwert dem Zil vum OMT, iwwer eisem Solde structurel, dee mer mussen anhalen. A mir behalen also all Kéiers e kleng Polster zu deenen Objektiver, déi Bréissel eis virschreift. Och d'FMI, och d'OECD soen, datt Lëtzebuerg seng Hausaufgabe gemaach huet a seng Finanz gutt am Grëff huet.

Här President, 2013, wéi dës Koalitioun ugetrueden ass, war eisen Triple-A um Wackelen. An haut, kuerz virun 2018, stinn e puer Triple-A mat fetten décke Buschtawen op der Visittekaart vun eiser Finanzplaz.

2013, wéi dës Koalitioun ugetrueden ass - fir nach e puer Zuelen aus dem Historique ze huelen -, stounge mer nach mat engem Been op de groen a schwaarze Lëschten. Dës Regierung, besonnesch eise Finanzminister, huet missen no LuxLeaks ganz vill Schierbelen zesummekieren an och erëm zesummepechen, wat em gutt gelongen ass.

Haut, 2017, hu mer eng propper Jackett un, a Lëtzebuerg ass erof vun de groen a schwaarze Lëschten. Mir hu voll op Transparenz gesat, an dëst ass schlussendlech och eiser Finanzplaz ganz gutt bekomm, déi haut erëm esou gutt dosteet, wéi säit Laangem net méi. Eng Finanzplaz, déi de Brexit net muss fäerten, bien au contraire.

(*Interruption par Mme Octavie Modert*)

2013, wéi dës Koalitioun ugetrueden ass, hat Lëtzebuerg e Chômagetaux vu 7%. Haut leie mer mat 5,8% op deem niddregste Chômagetaux zanter sechs Joer. Op ee Joer gekuckt, waren am Oktober dëst Joer 1.006 Leit manner op der Sich no enger Aarbecht. An dat sinn 1.006 Familijen, déi also och elo d'Feierdeeg kënnen mat manner Suergen ugoen.

Wat mech och besonnesch freet bei de Chômagezuelen, dat ass, datt d'Jugend, dat heescht och déi Mannerqualifizéiert ënner anere, momentan besonnesch vun där Dynamik um Aarbechtsmarché profitéiere kënnen.

No méi schwierige Joren - 2011 an 2012 - läit och eise Wirtschaftswuesstum 2017 bei 3,4% an 2018 bei 4,4%. Dat si gutt Viraussetzungen, déi engem e gewëssene Spillraum ginn, fir d'Land op d'Zukunft virzebereeden.

Här President, déi puer Zensure vu Bréissel an anere Gremien an och déi puer Zuelen, déi ech elo genannt hunn, schwätzen eng ganz kloer Sprooch. Si weisen, datt eist Land haut trotz Schwieregkeeten, zum Beispill dem Verloscht vu ronn enger Milliard Recetten am Commerce électronique, an alle Beräicher besser dosteet wéi 2013. Eis Statsfinanze stinn op zolitte Féiss.

An dorun, Här President, ka jo eis Politik vun de leschte véier Joer net ganz onschëlleg sinn.

Jo, mir hunn och dat favorabelt ekonomesch Émfeld genotzt, mä mir hunn awer op där anerer Säit och eng ganz Rei strukturell Mesuren a Reformen ënnerholl, déi och déi eng oder déi aner Kéier Courage verlaangt hunn. Mir kënnen eis alleguer dorun erënneren. Mä duerch déi Kombinatioun, eis Politik an deem besoten Émfeld, hu mer et fäerdegbruecht, datt mer haut gesond Statsfinanzen opzeweisen hunn. An domadder hu mer en zolitt Réckgrat fir eist Land geschaaft, wou eigentlech jiddweree sech kann derwidderstäipen a wou dat Réckgrat och jiddwerengem zeguttkënn.

Ech mengen, ech hunn nëmmen e puer Zuelen illustréiert. D'Rapportrice, d'Joëlle Elvinger, huet déi eenzel Zuele gëschter vill méi detailléiert duergeluecht an och kloer gesot, wou mer wëllen histeieren, wou d'Akzenter sinn. Ech wëll duerfir hei op dëser Plaz der Rapportrice och e ganz grouse Merci soe fir hire schrëftlechen a mündleche Bericht, awer och Merci soe fir all déi Aarbecht, déi do derhanert stécht. Ech mengen, ech selwer war och emol eng Kéier Budgetsrapporteur, ech weess, wat dat fir Aarbecht bedeit.

Besonnesch wëll ech och ervisträichen, datt d'Rapportrice en neie Wee gaangen ass an hirer Demarche, well se och déi Jonk ganz intensiv mat an d'Diskussioun agebonnen huet. Dat ass eng flott Initiativ. An ech hoffen, datt d'Budgetsrapporteurs vun deenen nächste Joren och wäerte weider op dee Wee goen.

► **M. André Bauler** (DP).- Très bien!

► **M. Eugène Berger** (DP).- Här President, iwwert déi Zuelen, iwwert déi gutt Situatioun sollte mer eis eigentlech alleguer freeën. An Europa, do dreeme vill Regierungen dervun, eng Kéier kënnen esou Zuele virzeweisen. Mir schéngt et, datt hei zu Lëtzebuerg verschidde Leit, wa se déi Zuelen héieren, vläicht och dreemen, mä virun allem Cauchemaren hunn.

(*Mme Simone Beissel prend la présidence.*)

Firwat? Ben, ech mengen, ech hunn dem Här Wiseler elo virdu gutt nogelauschtert. Hien huet sech net iwwert déi Zuele gefreet. Ech kann et als Politiker verstoen: Wann ee géint esou gutt Bilanze muss schwätzen, dann huet een als Oppositionsriedner e bëssen d'Brout ewechgeholl kritt, fir eng attraktiv Oppositionsrieder ze halen. Ech hoffen trotzdem, datt Der awer keng Cauchemaren hat an datt Der och vläicht awer kéint emol eng Kéier vun esou Zuelen dreemen.

Här Wiseler, Dir hutt vill Zuele kritiséiert. Dir hutt ganz vill Froe gestallt, mä ech muss awer och soen, ech sinn op mengem Hunger, an ech géif soen, mengem géien Hunger sëtze bliwwen, aneren ass dat och esou gaangen, fir da gewuer ze ginn: Wat hätt d'CSV eigentlech fundamental aneschtens gemaach? Wou géif d'Opposition bei de Finanzen aneschtens usetzen?

Dir hutt vill Froe gestallt. Et war ganz vill „wéi?“ oder „wat?“, mä, ech mengen, et geet mer wéi virdu verschide Regierungsmemberen: Mir bleiwen do einfach op eisem Hunger. Wou géif dann eng CSV aneschtens usetzen? Wou géif se zum Beispill spueren? Bei der gratis Kannerbetreung? Bei der Steuerreform? Wou bei der Steuerreform? Wou géif se vläicht manner investéieren, fir op där anerer Säit méi ze investéieren? Wou wieren do d'Prioritéiten? Mobilitéit? Schoulen? Pappecongé? Personal?

Ech mengen, d'Leit dobaussen hu jo awer e Recht drop, ze wëssen, datt eng Partei, déi d'Verantwortung erëm wëllt iwwerhuelen, och kloer seet, wat se géif anescht maachen oder wou se géif Akzenter setzen oder och wou se vläicht couragéis de Leit da géif soen, wou se dann eppes géif ewechhuelen.

Ech mengen, haut hunn ech op alle Fall op all déi Froen, net nëmmen ech, mä mir all, keng Äntwerten héieren. Ech muss awer soen: Virun e puer Deeg, do hat Der en Interview am „Tageblatt“. Ech mengen, et war de leschte Samschdeg. Do hunn ech awer erausgelies, datt Der gesot hutt, Dir géift eigentlech awer näischt vun deene Reformen, déi mer gemaach hunn, Steuerreform, Familiipolitik, Sozialpolitik, wierklech réckgängig maachen, wann Der géift an d'Responsabilitéit kommen.

Wann een also keng Korrektur un onser Aarbecht wëllt maachen, dann huelen ech dat letztendlech awer och als eng bonne Note fir eis Aarbecht un. Well wa wierklech eng Prüfung oder eng Aarbecht esou schlecht geschriwwen wier, da misst ee jo awer do ganz vill Roudes draschreien an da misst ee wierklech och eng schlecht Nott ausschreien. Do géift een dem Schüler soen: „Dir musst dat ganz nei schreien.“ Oder et géif ee selwer soen: „Ech huelen dann d'Heft an d'Hand an ech schreien eppes ganz aneschtens.“

Dat hunn ech op alle Fall de leschte Samschdeg net erausgelies. Dir hutt einfach gesot,





datt Der géift op alle Fall keng aschneidend Korrekturen huelen. Dir géift eigentlech mat eiser Politik, déi mir ugefaangen hunn, am Endeffekt weiderfueren.

► **Mme Simone Beissel**, *Présidente de séance*.- Här Berger, sidd Der averstanen, dass den Här Wiseler lech eng Fro stellt?

► **M. Eugène Berger** (DP).- Natierlech, Madamm Presidentin.

► **Mme Simone Beissel**, *Présidente de séance*.- Här Wiseler!

► **M. Claude Wiseler** (CSV).- Merci, Madamm Presidentin. Ech wëll just eng kuerz Remarque maachen, well ech muss den Här Berger awer enttäuschen. Dat war sécherlech net als bonne Note gemengt. An et soll och wierklech net esou verstane ginn.

Dat, wat ech gesot hunn - an ech profitéieren hei vun der Geleeënheet, déi hie mer gëtt, fir dat ze rektifizéieren -, dat ass, datt mer als CSV keng Politik maachen, wou mer dat, wat virdu gemaach gouf, wëlle mam Bagger iwwert de Koup rennen, well mer net an engem Land sinn, wou eng Oppositionspolitik sech an zwee Bléck mécht a wou déi eng dat futti maachen, wat déi aner gemaach hunn.

#### (Interruption)

Dat, wat ech par contre gesot hunn an hannendru kloer an däitlech gemaach hunn, dat ass, datt mer der Meinung sinn, datt op deene Politicken, déi da Realitéit sinn, mussen déi Ännerung gemaach ginn. An där sinn et der ganz vill, déi mir als noutwendeg empfanen. Et ass dat, wat mer och wëllen, wa mer d'Chance kréien, an deenen nächste Jore realiséieren.

Verstitt et net falsch, Här Berger! Et war keng bonne Note.

► **Mme Simone Beissel**, *Présidente de séance*.- Okay. Merci.

► **M. Eugène Berger** (DP).- Et sinn der also eng Rei net falsch. Et géifen - ben, esou hat ech et op alle Fall gelies - keng gréisser Korrekturen. Wann da Korrekturen, dat hunn ech op alle Fall och elo net eraushéieren... Dir hat och gesot... An elo hutt Der vläicht net genuch Zäit, mä och virdrun hunn ech net eraushéieren, wat dann déi Korrektur wieren.

Madamm Presidentin, gesond ëffentlech Finanz si fir eis kee Selbstzweck, mä dat ass eigentlech - fir dat Bild ze huelen -, wéi e grouse Kuch baken, fir datt da jiddwereen e Stéck dovunner kann ofkréien. Wat dee Kuch méi grouss ka gebak ginn, wat dann natierlech herno och jiddweree méi e grousst Stéck ka kréien.

Et si gesond ëffentlech Finanzen, déi et erlaben, datt mer kënnen hei am Land eng Politik maachen, Jalone setzen, fir datt et jiddwerengem besser geet, fir datt mer kënnen op d'Besoin vum de Leit agoen, fir datt och jiddweree besser Zukunftschancen huet. Ech mengen, och gesond Statsfinanzen erlaben déi grousszügig Sozialpolitik, déi mer ëmsetzen, wou mer och kënnen deene Schwächsten an eiser Gesellschaft hëllefen. Wann een de Budget kuckt: Ech mengen, eppes iwwer 8 Milliarden eleng ginn an dee ganze Volet vum der Sozialpolitik.

Mä ech mengen awer, wat nach méi wichteg ass wéi déi plakeg gutt Zuelen, dat sinn déi konkret Mesuren, déi do hannert deenen Zuele stinn. Ech mengen, dat si jo Mesuren, déi jiddwer Eenzelne zuguttkommen. Mesuren, déi de Leit hiert Liewen am Alldag erlichteren, déi eis finanziell entlaaschten, déi eis hëllefen, besser Famill a Beruf ënner een Hutt ze kréien. Mesuren, déi do gräifen, wou de Schong dréckt.

Ech wëll elo net alleguerten d'Mesuren opzielen, mä awer e puer, déi wierklech an deene leschte Jore vun dëser Regierung gemaach gi sinn, déi an der Sozialpolitik awer wierklech eng Rei Verbesserung bruecht hunn an déi och nëmme méiglech waren, well mer op där anerer Säit och un der Gesundung vun de Statsfinanzen geschafft hunn.

Ech denken un d'Steierreform, déi mer d'lescht Joer ëmgosat hunn. Ech mengen, et ass eng Steuerreform, déi jo grad d'Kafkraaft vun deene Kleng- a Mëttelverdénger stärkt. Ech denken un d'Subvention loyer, ech denken un d'gratis Kannerbetreuung, un d'gratis Schoulbicher, Adaptatiounen, Allocation de vie chère, un den neie REVIS an esou weider. Dat ass also fir eis konkret selektiv Sozialpolitik, déi do ukënnt, wou een et brauch.

Wat heescht dat dann och fir deen Eenzelnen? Ech soen, dat si jo kloer a schéi Formulatiounen, mä wat heescht dat dann och am Alldag fir deen Eenzelnen?

Ech huelen duerfir e Beispill vun enger Famill, esou Familljen, wou awer wierklech och hei zu Lëtzebuerg de Schong dréckt, wéi een esou

schéi seet. Dat sinn déi Monoparentallen. Déi hunn et hei zu Lëtzebuerg awer dach en général méi schwéier.

Huele mer e Beispill vun engem Mann oder enger Fra, déi den onqualifizéierte Mindestloun verdéngt, zwee Kanner huet an eng Wunneng lount. Duerch d'Steierreform huet dës Famill 102 Euro netto am Mount méi, duerch d'Verduebele vum Crédit d'impôt an och de Crédit d'impôt monoparental, d'Upasse vun der Steiertabell. Da kënn 174 Euro Wunnegeld derbäi, déi mer jo d'lescht Woch gestëmmt hunn. Ee vun deenen zwee Kanner geet an d'Crèche a profitéiert vun 20 Stonne gratis Kannerbetreuung, déi elo vläicht net esou direkt kann an 3 oder 5 oder 7 oder 20 Euro ëmgerechent ginn.

Dann hu mer awer nach en zweet Kand - ech hat e Beispill geholl vun enger Famill mat zwee Kanner -, wou Schoulbicher am Wäert vu ronn 400 Euro gebraucht ginn. Dat heescht, duerch d'Afféiere vun de gratis Schoulbicher spuer se do dann och nach ëmgerechent op de Mount 33 Euro.

Wann een also all dat zesummerechent - wahrencheinlech hunn ech vläicht nach eppes vergiess -: Am Total huet dës Famill e Plus vun iwwer 300 Euro netto de Mount zur Verfügung, wéi dat virun all deene Reforme war. Dat heescht, elo mat de Reformen huet esou eng Famill ronn 3.600 Euro d'Joer méi zur Verfügung. Ech mengen, Austeritéitspolitik, dat gesäit a mengen Ae ganz aneschtens aus.

Mir setzen u mat Sachleeschungen a cibléierte Steiermesuren, mat deene mer d'Leit, jo, och un där gudder wirtschaftlecher Situatioun deelhuele loosse. An dat ass jo dat, wat eis och ënnerscheet, déi Approche mat de Sachleeschungen, vu fréiere Regierungen, wou an der Sozialpolitik éischter d'Tendenz respektiv d'Demarche war, fir, ech soen emol, mat der Strenz iwwert d'Land ze goen.

Ech ka mech erënneren, déi éischt Versioun vun de Studentesubsidie war jo genausou e Fall. Och do, fir nach eng Kéier op dat Beispill zrëckkommen, et ass schonn e bësse vergiess, an d'Geschicht agaangen, hu mir och d'Studentesubsiden ëmmodeléiert, fir se méi sozial selektiv ze maachen a wierklech och do unzesetzen, wou eigentlech Sachleeschunge gebraucht ginn.

Fir nach eng Kéier op d'Steierreform zrëckkommen: Déi ass jo den 1. Januar 2017 a Kraaft getrueden. Et ass also eng Reform, déi virun allem sozial selektiv ausgeriicht ass. An ech mengen, déi nei Steiertabell, awer och de Crédit d'impôt, d'Verdueblung fir déi ënnescht Gehälter, dat gëtt de Leit méi Kafkraaft. An et ass jo eigentlech dann och do, wou d'Suen ukommen, wou se am meeschte gebraucht ginn.

Jo, d'Steierreform: Mir hunn och eppes fir d'Betriber gemaach. Am Vierdergrond steet natierlech do d'Baisse vun der Kierperschaftssteuer, déi 2017 op 19% an elo 2018 op 18% erofgeet. Ech mengen, och dat ass awer e wichtige Schrëtt, fir datt eis Betriber kënnen an engem europäeschen Ëmfeld weider kompetitiv bleiwen, datt se attraktiv bleiwen, datt se och eng Marge hunn, fir kënnen ze investéieren. 2018 wäert dann och elo nach déi individualiséiert Besteuerung a Kraaft tueden.

Nach eng Kéier: Wann ech awer elo och virdrun dem Spriecher vun der gréisster Oppositionspartei gleewe kann, wëllt déi elo net fundamental eng vun deene Mesuren aus der Steuerreform réckgängig maachen, wa se an der Responsabilitéit wier, well Dir sot jo awer och - dat hutt Der jo och elo virdu gesot, och am Interview gesot -: Dir wëllt op Previsibilitéit a Kontinuitéit setzen. Très bien!

Ech fannen, dat ass eng richteg Approche, wann ee sech dat virhëlt. Mä et muss een awer dann och feststellen, wann Der op déi Kontinuitéit setzt, datt awer bei lech selwer, an Ärer Partei, a verschiddenen Dossieren net ëmmer de Fall vun der Kontinuitéit ass.

Ech huelen do de Fall vun de Stock-Options. Ech sinn elo bei de Steieren. D'Stock-Options, déi huet en CSV-Finanzminister 2002 per Circulaire an d'Liewe geruff, se 2012 nach eng Kéier nogebessert.

An haut, oder säit dem leschte Joer, den Här Gilles Roth war fir d'Éischt domadder komm, haut oder virun engem Joer wollte si se carrement ganz ofschafen. Mëttlerweil soe si awer, datt si se net ganz wëllen ofschafen, mä awer Korrektur virhuelen. Si si sech also an der Fraktioun eens ginn, et ass vläicht den Här Mosar, dee sech konnt duerchsetzen, ech weess net, mä egal.

Ech stellen einfach fest: Déi Kontinuitéit, déi Dir eigentlech prônéiert, déi ganz an der Rei ass, déi ganz richteg ass, déi Der och an Zukunft wëllt maachen, wann Der an der Responsabilitéit wiert, an eegenen Dossieren haalt Der déi

op alle Fall net an, well Dir huet elo net méi déi nümlech Positioun an an dem Dossier vun de Stock-Options, déi Der 2012 hat. Ech fannen, et ass trotzdeem net ganz gläwiedeg, Madamm Presidentin, wann een also d'Stock-Options agefouert huet, jorelaang se gewäerde gelooss huet an dann elo op eemol wéi de wäisse Ritter kënnt, fir dann hei Steiergerechtheet anzefuerderen.

► **Mme Simone Beissel**, *Présidente de séance*.- Här Berger, sidd Der d'accord, dass den Här Roth lech eng Fro stellt?

► **M. Eugène Berger** (DP).- Natierlech. Den Här Roth dierf mer roueg eng Fro stellen.

► **Mme Simone Beissel**, *Présidente de séance*.- Här Roth, et ass un lech.

► **M. Gilles Roth** (CSV).- Dir hutt eis ugeschwat hei, Här Berger. D'CSV wollt virun engem Joer d'Circulaire vun de Stock-Options ofschafen, well - an ech ginn dervun aus, dass och den Här Bodry als President vun der Verfassungskommissioun mat mer eens ass - ee keng Steuerprivilegien iwwer e Gesetz ka maachen. Dat ass dat Éischt.

An dat Zweet ass: Zënter 2011 an 2012 ass et notoirement bekannt, dass de System vun de Stock-Options vill méi pervertéiert gouf, wéi dat bis zu deem Zäitpunkt nach de Fall war. An duerfir d'Initiativ vun der CSV d'lescht Joer, fir dat ze änneren. An ech mengen, et si ganz vill Leit am Land - an Dir waart och e Méindeg den Owend bei enger grousser Gewerkschaft, wou dee System do och denoncéiert gouf - fir d'Positioun vun der CSV.

► **M. Eugène Berger** (DP).- Ech hu just festgestallt, Madamm Presidentin, datt awer eng Kontinuitéit war vun 2002 bis 2013, fir do näischt ze änneren. Den Här Bodry, ech mengen, hien hat bei der Motioun drun erënnert - hien ass jo awer e bësse méi dra gewiescht an där viregter Koalitioun -, datt eigentlech déi Solutioun, déi mer elo virgesinn, schonn 2012 vun engem vun den deemolege Koalitionspartner proposéiert gi war. Mä dee Koalitionspartner huet deemools dunn d'Kontinuitéit vum Näischt-Ännere gehat.

Mä egal, mir sinn eis all am Zil eens: Mir wëllen déi Äbuse ausschléissen, mir wëlle se méi héich besteieren. 21% wier eng Plus-value. Mir wëllen d'Instrument, wann ech dat richteg verstinn, net ganz ofschafen, fir wierklech ganz spezifesch Fäll, fir kompetent Käpp op Lëtzebuerg ze kréien, unzeseien, eventuell och méi a Richtung Start-up ze goen. Mir hu jo duerfir och eng Motioun hei ugehall, wou mer soen: Mir hätten da gär am Fréijoer vum Finanzminister en definitive Bilan, fir ze kucken, wou een dann a wéi engem Mooss muss d'Stock-Options ëmänneren oder eventuell - jo, firwat net? - ganz ofschafen.

Mä mir sinn nach net beim Bilan ukomm. Ech mengen, am Zil si mer eis eens, mä de Wee dohinner ënnerscheet eis. Jo, mir wëlle schnell handeln, mir wëlle konkret handeln a mir wëlle weisen, datt eis dat och wierklech eescht gemengt ass. An dat ass dann, firwat de Minister elo an enger éischter Etapp eng Circulaire hëlt, well déi kann elo den 1. Januar 2018 a Kraaft tueden. Dann hu mer konkret schonn eppes gemaach. Mir wëssen alleguerten: Jo, mir müssen och eng Kéier op de Wee vun engem Projet de loi goen. Säit 2002, jo, säit 2002, Här Roth, hate mer Zäit, fir dat ze maachen. Dat si vill Joren, dat si 15 Joer, wou mer Zäit haten. Da kënne mer eis och elo nach no der Circulaire d'nächst Joer dräi oder véier Méint oder Wochen Zäit huelen.

Mir wëssen alleguerten, wann een e Projet de loi mécht, da brauch een Avisen. Dat hëlt Wochen, heiansdo Méint an Usproch. Mat där Circulaire kënne mer awer en éischten decisive Schrëtt praktesch a konkret ëmsetze vum 1. Januar 2018 un, do hu mer wierklech eppes gemaach am Sënn oder Richtung méi Steiergerechtheet. Soit datt mer do nach net um Ennpunkt ukomm sinn.

► **Mme Simone Beissel**, *Présidente de séance*.- Här Berger, erlaabt Der just nach eng kuerz Zousazfer vum Här Roth?

► **M. Gilles Roth** (CSV).- Bon, ech mengen, dës Regierung ass ugetrueden, fir villes aneschtens a villes besser ze maachen. „De Mief vun der CSV“, waren d'Wierder vun engem Vizepremier, deen „misst erauskommen“. Mä Dir hat véier Joer laang Zäit, fir dat do per Gesetz ze änneren. Dat ass awer net geschitt. Ech gesinn, dass hei eminent Vertrieeder vun enger Majoritéitspartei, mengen ech, op där Fro vun de Stock-Options duerchaus mat eiser Proposition kéinte liewen. Elo wëllt awer keen eppes dovunner wëssen. An den Här Bodry seet, et wier en Accord mat der CSV gewiescht. Ech stellen also fest, dass d'LSAP sech net konnt bei dëser Regierung duerchsetzen, fir mat op de Wee vun engem Gesetz ze goen, fir d'Stock-Options ze regelen, well déiselwecht Diskussioun, déi mer haut hunn, déi hate mer scho virun engem Joer.

► **M. Alex Bodry** (LSAP).- Dat, wat de Finanzminister gemaach huet, war den Taux effectif op den Demi-taux eropzesetzen. De Minister Frieden huet hei all Mënsch ugeschass an dat, wat e versprach hat ze maachen, net gemaach.

► **Plusieurs voix**.- Oh!

(Brouhaha)

► **M. Alex Bodry** (LSAP).- Jo.

► **Mme Simone Beissel**, *Présidente de séance*.- Sou...

► **M. Eugène Berger** (DP).- Also, Madamm Presidentin,...

► **Mme Simone Beissel**, *Présidente de séance*.- Elo, wann ech gelift!

► **M. Eugène Berger** (DP).- ...fir nëmmen zur Konklusioun ze kommen, fir nëmmen zur Konklusioun ze kommen,...

► **M. Alex Bodry** (LSAP).- Jo, en huet d'Chamber ugeschass, Äre Mann am „Lëtzebuurger Wort“!

(Brouhaha)

► **Mme Simone Beissel**, *Présidente de séance*.- Okay...

► **M. Marc Spautz** (CSV) - Zënter 2013 ass den Här Gramegna Finanzminister, net den Här Frieden.

► **M. Claude Wiseler** (CSV).- Mir stelle fest, datt Der et weder bei där enger Regierung nach bei dëser fäerdegkritt.

► **Mme Simone Beissel**, *Présidente de séance*.- Stopp, stopp, stopp!

► **M. Marc Spautz** (CSV) - Dir kënn lech net duerchsetzen, dat ass alles.

(Brouhaha)

► **Mme Simone Beissel**, *Présidente de séance*.- Wann ech gelift! Den Här Berger kritt elo erëm d'Wuert.

► **M. Claude Wiseler** (CSV).- Ganz staark.

► **M. Alex Bodry** (LSAP).- An ech zitieren en: „Elo maache mer dat do awer. Deen Exercice maache mer.“

► **Mme Simone Beissel**, *Présidente de séance*.- Här Bodry, wann ech gelift, Dir kritt jo souwisou elo d'Wuert hannendrun, da kënnt Der dat do riichtbéien, wéi Dir dat gesitt. Mä ech géif elo dem Här Berger erëm d'Wuert ginn. An elo d'Tëscheriff aus dem Sall, wann ech gelift, stoppen, soss komme mer net virun. Här Berger, Dir hutt d'Wuert.

► **M. Eugène Berger** (DP).- Merci, Madamm Presidentin. Ech stelle fest, datt mer a manner wéi véier Joer - well d'Circulaire wäert elo a Kraaft tueden - op alle Fall schonn e gutt Stéck Wee gemaach hunn an deem Dossier, wou während 14 Joer virdrun näischt gemaach ginn ass.

Här President, pardon, Madamm Presidentin, mir haten d'lescht Joer hei am Haus och animéiert Diskussiounen. Ech weess net, ob se esou animéiert ware wéi elo grad virun e puer Minutten, wéi et - well ech jo elo vun der Steuerreform geschwat hat - ëm de Finanzminister oder den Impakt vun der Steuerreform gaangen ass. Ech ka mech dann awer trotzdeem gutt erënneren, wie wat deemools hei gesot huet. Et goufen dem Finanzminister praktesch „Tricksereien“ virgeworf, dat war den Term. A well et jo awer schwierig war, fir deemools ze soen, wat dann herno erauskeim, hunn ech einfach gesot: „Kommt, mir streiden net, kommt, mir kucken dat!“ Ech hat lech deemools hei, den 12. oder 13. - et kann och e puer Deeg méi spët gewiescht sinn -, gesot: „Ech ginn lech alleguerte Rendez-vous hei an der Chamber an engem Joer bei den nächste Budgetsdebatten, wa mer d'Zuelen hunn, fir da kënne feststellen, wie recht behält.“

Mä hei geet et eigentlech och net ëm „recht behalen“. D'Verwaltung ass deemools dovunner ausgaangen, datt den Impakt fir 2017 géif ronn 370, 380 Milliounen bedroen. A wann een dann elo de Compte prévisionnel kuckt vun den éischten dräi Trimesteren, dee mer an der Cofibu presentéiert kruten, da bestätegt dat déi Estimatioun. D'Estimatioun vum der Verwaltung vun deemools sinn also confirméiert ginn. Ech muss soen, et verwonnert mech net, datt d'Verwaltung confirméiert gëtt, well mir, d'DP, hu Vertrauen an déi Previsioun vum där Administratioun a mir hunn och kee Grund, och an Zukunft net, um Know-how vun där Verwaltung ze zweifelen. Virun allem gesi mer jo och ëmmer, datt se méi wéi recht behalen, well all Joers leeë se eis eigentlech Punktlungen dohinner bei der Exekutioun vum Budget, an





och dës Kéier wäerte se erëm recht behalen. Duerfir kënne mer deem Dossier zoumaachen. Dont acte: D'Steierverwaltung hat d'lescht Joer recht. Den Impakt vun der Steuerreform ass deem, deem och d'lescht Joer virausgesot gi war.

Wat een awer bei der Steuerreform och net dierf vergiessen, ass, dass se jo en Impakt, awer och e Retour huet an d'Ekonomie. D'Leit kréie jo dobaussen zousätzlech Kafkraaft. D'Leit hunn also méi Suen an der Täsche, d'Leit ginn dann also och, net nëmmen elo virun de Feierdeeg, erëm méi Suen aus. Dat kënnt de Betriber zegutt, de Geschäfte zegutt, an iwwert d'TVA fléisst och en Deel vun deene Suen, déi mer an der Steuerreform net erakréien, awer erëm an d'Keess eran. An duerch gëtt eigentlech de reellen Impakt op de Budget nach aneschtens, nach méi kleng. An d'lescht Joer hat de Statec, wéi ech mech kann erënneren, och virausgesot, dass d'Steuerreform géif d'Croissance vum PIB ukuerbelen. All dës Previsiounen, positiv Retombéeë sinn net mat an déi Estimatioun eragefloss. Et wier awer interessant, wann een dat kéint eng Kéier méi genau rechnen an einfach kucken, wéi een dee Retour kéint chiffrieren.

Madamm Presidentin, eppes, wat eis Budgete vun deene leschte Joren, fir et emol esou ze soen, charakteriséiert, dass sinn déi héich Investissementer, déi dës Regierung an d'Zukunft vum Land mécht. An och dës Budget 2018 läit an dëser Kontinuitéit, fir d'Land mat héijen Investissementer op d'Zukunft virzubereeden. Jo, et gi Stëmme, déi hu mer schonn héieren, an der Oppositioun, déi verlaangen, dass mer elo, wou mer bei gudder Konjunktur, déi et jo gëtt, dass mer do solle massiv, fir net ze soen exklusiv, eis Schold zréckbezuelen, eisen Defizit erofdrécken. Jo, mir maachen dat och, mä mir maachen net nëmmen dat. Wat mir nach vill méi maachen, dass ass déi gutt finanziell Situatioun benotzen, fir ebe massiv ze investéieren. Well e Land, dat net investéiert, dass bleift net nëmme stoen, dass geet e Schrëtt zréck.

D'Zukunft preparéieren heescht konkret an d'Zukunft investéieren. An duerfir hu mer dëst Joer och erëm bal Rekordinvestitiounen vun iwwer 2,36 Milliarde virgesinn. Ech hunn e puer Zuelen erausgepickt.

Educatioun: 2018 ginn 2,2 Milliarden investéiert. Mobilitéit: Et ginn 290 Milliarden an de Fonds du rail, 830 Milliarden fir de Fonctionnement vum effentlechen Transport. Logement: Do geet de Budget ëm 3,2% an d'Luucht op ronn 216 Milliarden. Congé parental: zousätzlech 98 Milliarden. Gratis Kannerbetreieung a bilingual Frëifërderung iwwert d'Chèque-services: 10% méi, fir op 380 Milliarden ze kommen. Fuerschung: 205 Milliarden. An nach villes méi.

Ech mengen, Madamm Presidentin, mat dësen Investissementer gëtt d'Land op d'Zukunft preparéiert, fir sech op déi nei Erausforderungen am Logement, an der Mobilitéit, an der Educatioun, fir nëmmen déi ze nennen, anzustellen. Ech mengen, et gëtt nach eng ganz Rei anerer, ech kommen herno nach eng Kéier drop zréck.

An, wéi gesot, net nëmmen 2018, mä wann een de Pluriannual kuckt och 2019, 2020 wäerte mer weider mat ganz héijen Investitiounen op Rekordniveau lafen.

Jo, déi héich Investissementer erklären och e klengen Deel oder e groussen Deel, firwat mer en Defizit beim Zentralstat behalen. Wann ech dat richtig verstane hu virdrun, wäert en awer och dëst Joer, also 2017, erëm méi kleng ginn, wéi dat virgesi war.

► **Mme Simone Beissel**, *Présidente de séance*.- Här Berger, erlaabt Der? Den Här Spautz wëllt lech och nach eppes froen.

► **M. Eugène Berger** (DP).- Ah.

► **Mme Simone Beissel**, *Présidente de séance*.- Här Spautz, wann ech gelift.

► **M. Marc Spautz** (CSV).- Merci, Madamm Presidentin. Ech wollt den Här Berger just froen - well en huet gesot, et wiere Leit heibannen, déi géife soen, et dierft een näischt investéieren - an ech wëll just wëssen, wien dat soll gesot hunn. Well den Här Wiseler war virdru formell, dass hien d'Investissementer géif gutthalen.

► **M. Eugène Berger** (DP).- Ma da si mer eis jo eens.

► **M. Marc Spautz** (CSV).- Ech wëll dofir just d'Fro stellen.

► **M. Eugène Berger** (DP).- Dat freet mech.

► **M. Marc Spautz** (CSV).- Dir hutt gesot, hei wiere Leit, déi géifen d'Investissementer a Fro stellen. Wie sinn déi?

► **M. Eugène Berger** (DP).- Mä ech mengen, Madamm Presidentin, ech freeë mech iwwert déi Präzisioun, well ech also dann dorausser kann erausliesen, dass d'CSV och déi héich Investissementer hei voll ënnerstëtzt. Dat ass gutt. Emol endlech eng kloer an daitlech Ausso haut vun där Sait!

(*Brouhaha*)

► **M. Claude Wiseler** (CSV).- Ech weess awer net, wéi ech et nach méi kloer an daitlech ka soen. Also, et deet mer leed.

► **Mme Simone Beissel**, *Présidente de séance*.- Also neen, wann ech gelift e bësse Rou! Den Här Berger huet eleng d'Wuert.

► **M. Eugène Berger** (DP).- Jo, Madamm Presidentin, ech war beim Defizit an den héijen Investissementer. Voilà, ech mengen, da si mer eis also eens, wann dann d'CSV dat net gesot huet, wa vläicht anerer et gesot hätten. Ech mengen, et wier jo einfach, fir den Defizit erofzesetzen. Mir missten dann einfach nëmmen d'Investissementer ëm en Drëttel kieren, da wiere mer do ganz schnell fäerdeg. Dann hätte mer ganz schnell déi Problemer geléist. Mä dat, Madamm Presidentin, dat war a mengen Aen an an den Ae vun der DP op alle Fall eng Politik vun «après nous le déluge». Dat wier liichtfankeg mat der Zukunft vun der nächster Generatioun gespillt.

Well all Investitiounen, déi mir haut maachen, déi musse jo dann net méi déi nächst an iwwernächst Generatiounen maachen. Wa mer haut net investéieren, dann ënnerschreiw mer jo eigentlech quasi eng Schold fir déi nächst Generatiounen, dann iwwerloosse mer eigentlech déi noutwendeg Investissementer enger nächster Generatioun.

Fir dat ze illustréieren: An der Mobilitéit kann ech dat gutt illustréieren. Déi Generatioun vun haut hätt eigentlech ganz gäre gehat, wa scho virun 20, wie weess, virun 30 Joer an den Tram investéiert gi wier. Dann hätt een natierlech deemools missen investéieren, et wier awer wahrscheinlech - wann ee weess, wéi d'Präisser um Marché sinn - deemools méi bëlleg ginn. Da géife mer awer haut manner am Stau stoen. An dann hätte mer déi Investissementer haut gespuert. Mir wëllen dat net maachen. Mir wëllen also elo investéieren, fir dass dann déi nächst Generatioun net an esou enger Situatioun ass.

(**M. Mars Di Bartolomeo reprend la présidence.**)

Mir maachen déi héich Investissementer an trotzdeem hu mer awer eis Statsscholden am Grëff. Si leien aktuell bei 22,7% vum PIB. A mir leien do och wäit ënnert där Limitt vu Verschuldung, déi mer eis virginn haten an der Regierungserklärung, vun 30% vum PIB. Mir leien haut bei ronn 22%. Ech hat eng Kéier am Ufank gesot: „Iwwerall an Europa géife se dree-men amplatz Cauchemaren ze hu bei deenen Zuelen.“ Mir leien do als Zweet am Ranking an Europa. An ech wëll awer hei och nach eng Kéier soen: D'Schold, d'Statsschold klëmmt net, si geet erof. Dat ass natierlech, ech verstinn dat, wann een op der Oppositiounsbänk setzt, net esou flott.

Jo, Dir kommt mat den absolutten Zuelen. Dir kommt mat den absolutten Zuelen. Mä all Ekonomie an all Land, an och d'Brësseler Virgabe rechnen ëmmer d'Schold par rapport zu hirem eegene Räichtum. Dat mécht een och praktesch a sengem private Stot, dass een dat ëmmer global kuckt.

Mä souguer,...

(*Interruption*)

...souguer wann een d'absolutt Zuelen hëlt, da stellt ee fest, dass vun deenen 12,9 Milliarden, déi mer elo hunn, mer awer 11 Milliarde geierft hunn. Dat war eigentlech d'Ausgangsbasis, wann een onbedéngt wëllt vun absolutten Zuele schwätzen. An ech brauch lech also keng Grafik ze molen, wéi prozentual an den absolutten Zuelen an de leschte Joren d'Schold net an d'Luucht gaangen ass, mä dass mer eigentlech do d'Scholdespiral definitiv gebremst hunn.

Well, wat hate mer geierft, wann ee vun der Schold schwätzt? Mir haten eng Hypothék geierft. Déi ass eigentlech säit 2007 gelaf, wou de viregte Finanzminister, oder déi viregt Finanzministeren och näischt gemaach haten: Dat war am Commerce électronique. Nieft all deenen anere Suergen, déi mer haten, respektiv déi Saachen, déi mer hu missen an Ugrëff huelen, hu mer och misse mat den Aboussen am Commerce électronique eens ginn. 2018 wäerte mer, am Verglach mat deene Jore vu virun 2013, eng Milliard - eng Milliard! - Recettë manner hu mat där Hypothék, an dach

hu mer déi geschëllert a mir hunn eis Schold ofgebaut. Mir maachen héich Investissementer a mir hunn och eis Statsfinanzen am Grëff.

An, wat mer och nach maachen, mir leeën och nach e klengen Apel fir den Duuscht op d'Sait, Stéchwuert den Zukunftsfong. Dee war jo och vu mengem Virriedner kuerz skizzéiert ginn. Einfach awer nëmme fir ze soen, d'nächst Joer fléiszen nach eng Kéier 50 Milliarden doranner. Da komme mer op 240 Milliarden.

► **M. Claude Wiseler** (CSV).- A wou huet Der déi 50 Milliarden hier?

► **M. Eugène Berger** (DP).- Dat ass eis Spuerbéchs fir déi nächst Generatiounen, Här Wiseler. Dat ass eis...

► **M. Claude Wiseler** (CSV).- Dir maacht e wéineg Schold an da leet Der se an d'Spuerbéchs. An d'Schold, déi ass awer och do.

► **M. Eugène Berger** (DP).- An engem normale Stot, Här President,...

► **M. Claude Wiseler** (CSV).- An engem Stot mécht ee keng Schold a leet se an d'Spuerbéchs.

► **M. Eugène Berger** (DP).- An engem normale Stot, Här President, wann zum Beispill eng Famill fir en Haus Sue geléint huet an do dann eng Plus-value schaaft, hält se sech och nach ëmmer eng kleng Mouk, och an esou enger Situatioun, fir déi op d'Spuerbuch ze setzen, wa se awer emol nach wëllt an d'Vakanz oder soss iergendwou goen. Mir maachen dat eigentlech hei genau d'selwecht. A wat...

► **M. Gast Gibéryen** (ADR).- Gi se dat och léinen?

► **M. Eugène Berger** (DP).- A virun allem, virun allem, Här Gibéryen,...

► **M. Claude Wiseler** (CSV).- Geet se dat léinen?

► **M. Eugène Berger** (DP).- ...dat si jo awer da Suen, déi herno am Joer 2035 zréck an de Statsbudget fléiszen, also dann...

► **M. Gast Gibéryen** (ADR).- Fir d'Schold ze bezuelen?

► **M. Eugène Berger** (DP).- Spéitstens dann. Neen, dat ass eppes, wat mer dann deenen zukünfte Generatiounen ginn, fir dass déi net herno müssen...

(*Brouhaha*)

► **M. Claude Wiseler** (CSV).- Domat bezuelt Der d'Schold, déi Der gemaach hutt.

► **M. Eugène Berger** (DP).- ...dass déi net herno méi Schold musse maachen.

(*Hilarité*)

► **M. Gast Gibéryen** (ADR).- Keng Schold musse maachen? Déi musse se zréckbezuelen!

► **M. Eugène Berger** (DP).- Här President, ech sinn ëmmer frou, wann den Här Gibéryen, deen als Buergermeeschter bekannt war, deen déi meeschtverschëllte Gemeng am Land hat, wann deen hei seng Alternativen...

► **Plusieurs voix**.- Ah!

(*Brouhaha*)

► **M. Eugène Berger** (DP).- Herno lauschteren ech ganz intensiv...

► **M. Claude Wiseler** (CSV).- Deen do huet nach gefeelt!

► **M. Eugène Berger** (DP).- Ech lauschteren herno ganz intensiv no, Här President. Ech wëll elo...

► **M. Gast Gibéryen** (ADR).- Fait personnel.

► **M. Eugène Berger** (DP).- Herno kritt den Här Gibéryen d'Geleehheet,...

► **M. Gast Gibéryen** (ADR).- Dir hutt mech ugeschwat.

► **M. Eugène Berger** (DP).- Herno...

(*Brouhaha*)

► **M. Gast Gibéryen** (ADR).- Neen!

► **M. Alex Bodry** (LSAP).- Loosst de President schwätzen!

► **M. Eugène Berger** (DP).- Här President, ech hunn d'Recht ze soen: Ech wëll de Moment net ënnerbrach ginn.

► **M. Mars Di Bartolomeo**, *Président*.- Här Berger, Dir hutt d'Recht, dass ze froen.

► **M. Eugène Berger** (DP).- Voilà. Merci.

► **M. Mars Di Bartolomeo**, *Président*.- Mä dann, wann ech gelift, schwätzt och net direkt ee vun den Deputéierten un, well dann,...

► **M. Eugène Berger** (DP).- En huet mech provoziert.

► **M. Mars Di Bartolomeo**, *Président*.- ...dann deet et mer leed, da muss ech och deen Deputéierten héieren.

(*Brouhaha*)

► **M. Gast Gibéryen** (ADR).- Gutt. Merci, Här President, fir d'Wuert.

► **M. Eugène Berger** (DP).- Här President, ech loosse mech elo net méi provoziéieren. Da fueren ech weider.

(*Hilarité générale et brouhaha*)

► **M. Mars Di Bartolomeo**, *Président*.- Här Berger, wann Der erlaabt, ech ginn elo...

► **M. Eugène Berger** (DP).- Här President, ech hu gesot: neen! Här President, nee, nee!

(*Hilarité générale*)

► **Une voix**.- Et gëtt ëmmer besser hei.

► **M. Mars Di Bartolomeo**, *Président*.- Éischens adresséiert ee sech un d'Chamber. Dat hutt Dir net gemaach. Dir hutt lech direkt un den Här Gibéryen geriicht. An Dir wësst jo, wéi dat ëmmer geet, wann ee sech direkt un den Här Gibéryen richt.

(*Hilarité générale*)

An duerfir, an deem heite Fall huet den Här Gibéryen d'Wuert.

(*Hilarité*)

► **M. Eugène Berger** (DP).- Här President,...

► **M. Gast Gibéryen** (ADR).- Merci. Merci, Här President,...

► **M. Eugène Berger** (DP).- ...am Fong sinn ech net mat lech d'accord. Wann de Riedner...

(*Hilarité*)

Neen, dass ass och eng Saach, Här President, wann e Riedner net wëllt ënnerbrach ginn, dann huet hien eigentlech d'Recht. Mä wann deen...

► **M. Mars Di Bartolomeo**, *Président*.- Jo, wann e Riedner net wëllt ënnerbrach ginn, da richt e sech net direkt un en Deputéierten. An an deem heite Fall kucken ech, den Equiliber tëschent allen Deputéierten ze halen, wat meng Missioun ass, Här Berger. An duerfir huet den Här Gibéryen hei d'Wuert.

► **M. Eugène Berger** (DP).- Den Här Gibéryen kann also elo erklären, firwat dass en ëmmer déi meeschtverschëllte Gemeng hat.

► **M. Mars Di Bartolomeo**, *Président*.- Voilà.

(*Hilarité*)

A wann ee provoziert, da muss een och dermat rechnen, dass dee Provozierte sech zu Wuert mell. Här Gibéryen, wann ech gelift!

► **Une voix**.- Loosst den Här Gibéryen elo schwätzen!

► **M. Gast Gibéryen** (ADR).- Merci, Här President, fir déi korrekt Présidence, déi Der hei maacht.

(*Hilarité*)

Den Här Berger huet gesot, ech wier Buergermeeschter vun där Gemeng, déi déi meeschtverschëllte Gemeng war. Dat stëmmt. Mir hu ganz vill Scholde gemaach. Mir hu ganz vill investéiert. Mä wat de Contraire ass tëschent der Gemeng Fréiseng an dem Stat: D'Gemeng Fréiseng huet hir Scholden zréckbezuel. An zwar esoubal, wéi se eng gemaach huet, wéi och all aner Gemeng hei am Land. Déi bezuelen hir Scholden zréck, souwuel d'Kapital ewéi d'Zësen, an duerfir ginn déi kommend Generatiounen net domadder belasscht. An déi Scholden, déi mir virun 20 Joer gemaach hunn, déi sinn haut alleguer bezuel. An d'Finanzsituatioun vun der Gemeng Fréiseng ass duerfir haut och exzellent, well mer eben eis Scholden zréckbezuel hunn.

A wann de Lëtzebuerger Stat seng Scholden och géif zréckbezuelen, da wiere mer an enger ganz anerer Diskussioun. Mä dass ass net de Fall. De Stat bezilt just Zësen zréck a kee Kapital!

► **M. Roy Reding** (ADR).- Très bien!

► **M. Eugène Berger** (DP).- Här President, mir sinn eis awer eens, dass och de Lëtzebuerger Stat ganz vill investéiert, well ee muss investéieren, fir dass een an deenen nächste Joren also besser dosteet. Mä ech wëll awer präziséieren, an dass ass awer en Ënnerschied an eise Points de vue, dass mir och eis Schold zréckbezuelen, dass mir och eis Statsfinanzen am Grëff hunn. An ech hat virdru grad erkläert, dass mer och eis Scholdespiral no ënne gedréit kréien, net nëmmen am PIB, mä och an den absolutten Zuelen.

An eben och mat all eiser Politik, déi mer maachen, steet d'Land also haut besser do wéi viru véier Joer. Dat wëllt awer elo net heeschen, dass d'Aarbecht all gemaach ass. Mir leeën elo net d'Hänn an de Schouss. Et bleiwen, dass musse mer och eierlechteekshalber soen, nach eng ganz Rei Erausforderungen, deene mer eis stelle müssen.

An ech hat a mengem Budgetsrapport, wéi ech och d'Eier hat, 2014 Budgetsrapporteur ze





sinn, eng Rei Defien opgezielt. Vlächcht kënn Der lech erënneren, ech hat se „zéng Geboter“ genannt. An ech kann eigentlech haut, muss ech soen, praktesch véier Joer duerno, awer mat enger gewëssener Satisfaktioun als deemo-lege Budgetrapporteur feststellen, datt dës Regierung an deene Bëräicher, wou ech besonneschen Handlungsbedarf gesinn hat, an deenen zéng Geboter, an och nach aneren, mä besonnesch an deenen, déi mir um Härz louchen, ganz vill konkret Initiativen geholl huet, konkret Mesuren ëmgesat huet.

An doduerjer si mer awer e gutt Stéck virukomm hei am Land. Mä, jo, mir bleiwen an deene Bëräicher vun den zéng Geboter och nach weider gefuerdert. Och an aneren, well mer eben nach net um Enn vum Wee sinn.

Ech wëll nëmmen un e puer Beispiller vun deemools illustréieren, wat fir ee Wee mer gemaach hunn, wat awer och nach eventuell ze maache bleift.

Ech hat deemools, ech mengen, dat éischt Gebot „Betreiung an e gudde Start an d'Liewen“ genannt. Mir hunn do eng Rei Saache gemaach, säit 2014: d'20-Stonne-gratis-Kannerbetreiung, d'bilingual Betreiung, d'Qualitéitskritären eropgesat, méi Personal agesat an esou weider.

D'DP huet jo och rezent e Sondage mat der TNS ILReS iwwert dës Mesurë maache gelooss, déi de Familljen zeguttkommen. An d'Emfro weist, datt eigentlech d'Elteren awer soen: „Dat sinn déi richteg Mesuren.“ Mä d'Emfro, musse mer och éierlech soen, weist och, wou d'Leit dobaussen, déi Betraffe soen: „Do muss nach weider eventuell eppes gemaach ginn.“

Zum Beispill wënsche sech d'Leit dobaussen, fir besser Famill a Beruff ënner en Hutt ze kréien, nach méi Flexibilitéit. Dat heescht, zum Beispill musse mer do awer nach weider an Zukunft schaffen. Ech denken do un nei Modeller, flexibel Aarbechtsszäitmodeller. Ech mengen, an deem Bëräich ass d'Politik weider gefuerdert. Do muss awer natierlech och d'Aarbechtswelt an den Dialogue social mat agebonne ginn.

En anere Punkt war deemools dee vun der Bildung. Ech mengen, mer wëssen, datt haut Kanner mat verschiddenen Hierkonften, Kulturen, Sproocher bei eis sinn, datt d'Schoulhaff haut, fir et emol esou ze soen, anerer sinn, aneschtens ausgesi wéi virun 20 Joer.

A mir hunn an deene leschte Joren eis Schoul fit gemaach, op déi nei Situatioun ageallt. Mir hunn de Secondaire reforméiert, méi Schoulautonomie agefouert, op Qualitéit gesat. Mir sinn amgaangen, e méi differenzéierten Unterrecht op dem Terrain ëmzesetzen, fir un déi ënnerschiddlech Besoine vun de Schüler erunzegoen. Och do si mer nach net fäerdeg. Och do musse mer weiderfueren, héich Investissementer an deenen nächste Jore maachen an déi néideg Moyene prettstellen an och weider un de Konzepter schaffen.

Logement. 2013 war et, ech mengen, dat véiert Gebot. Dat bleift och weiderhin e prioritäert Uleies, fir datt mer méi eng grouss Offer schafen, fir méi bezuelbare Wunnraum ze kréien. An hei si mer eis jo och alleguerten eens. Hei gëtt et keng Zauberformel, fir do vun engem Dag op deen aneren alles ze léisen.

Et muss een awer och soen, an éierlechkeetshalber hat de Spriecher vun der gréisster Oppositionspartei dat awer och unerkannt, datt awer an deene leschten dräi, véier Joer trotzdeem viles op d'Schinne gesat ginn ass, datt do awer eng Rei Saache geschitt sinn: Wunnegeld, Steierabattementer beim Uschafe vun enger Wunneng, Quart taux verlängert, Baulandvertrag, d'Klimabank géint Klimaaarmut an esou weider. Et si Projeten op den Industriefrichen, déi net nëmmen ugeduecht sinn, mä déi lues a lues méi konkret ginn.

Mä mir wëssen alleguerten: Jo, och am Logement musse mer weider schaffen, kreativ Solutiounen fannen. An hei sinn och, an do schéng mer eis awer och eens ze si mat der gréisster Oppositionspartei, vill Akteuren am Logement, déi concernéiert sinn. An hei ass et ebe wichteg, datt mer do och déi eenzel Prozedur besser openeen ofstëmmen, méi effizient gestalten. Do hu mer also och an deem Bëräich nach eng Rei Saachen ze maachen.

Nach vlächcht een anere Punkt erausgepickt: d'Mobilitéit. Déi Zäit, déi een am Stau verbréngt, datt ass verlueren Zäit. Mir brauchen also nei Mobilitéitskonzepter. Mir brauche méi effentlechen Transport. An ech hat dat och nogekuckt. Dat war mäin néngt Gebot. Do hat ech gesot, ech zitieren... Et ass vlächcht da loucht aneschtens, mä awer bal d'selwecht, ech paraphaséieren. Ech hat deemools gesot: „Mir sollen ophalen, fir de Projet Tram ze zerrieden. Mir sollen de Projet Tram endlech ëmsetzen.“

Dat war am Abrëll 2014 a menger Budgetried. Mëttlerweil firt dat éischt Stéck vum Tram. Mä och do wësse mer: Mir sinn net fäerdeg. Dat

wësse mer alleguer. Muer wäerte mer nach e Projet hunn. Do musse mer och nach weider schaffen, fir den Tram auszebauen. Et ass awer net nëmmen eleng den Tram, mä och aner Mobilitéitskonzepter mussen an Zukunft ëmgesat ginn.

A vlächcht nach e lescht Beispill. Dat war, mengen ech, mäin néngt oder aacht Gebot: Dat war d'Diversifikatioun vun der Ekonomie. Ech denken do virun allem un d'Finanzplaz. Och do - ech hat et och scho gesot - hu mer an de leschte Jore vill geschafft. Mir si vun de groen a schwaarze Lëschten erof. Mir hu vill geschafft am Sënn vun Transparenz. Mir hunn hei Gesetzer gestëmmt, wou mer ëmmer praktesch als Éischt an Europa Direktiven ëmgesat hunn. Mir sinn, och wa Verschiddener dat net gär héieren, awer do Musterschüler gewiescht. Och wéi mer d'Presidence haten, hu mer do eng Rei Akzenter gesat.

An dowéinst si mer elo mat där Transparenz-Offensiv ganz gutt opgestallt hei zu Lëtzebuerg. An d'Finanzplaz wäert och an Zukunft nach wie vor eng vun deene wichtegste Piliere vun eiser Ekonomie bleiwen. Mir kënnen elo erëm optrompen, well wann een den „level playing field“, wéi een dat esou schéi seet, an Europa hält, also jiddwereen déiselwecht Konditiounen vun Transparenz huet, da kënnen mir optrompe mat Know-how, mat eise Sproochen, mat de kuerze Weeër an esou weider, datt mer also do gutt no vir kënnen kucken.

Och do bleiwen Defien. Ee ganz kuerzfristege fir eis Finanzplaz, dat ass dee vun der Verlagerung vun der Kompetenz an der Fongenindustrie bei d'ESMA. Dat wier net nëmmen e grouss Risiko fir Lëtzebuerg, fir eis Fongenindustrie, déi eng vun deene stäerkste weltwäit ass, mä och eigentlech fir de ganzen europäeschen Raum.

A mir haten et hei schonn debattéiert. Mir sinn net, fir et emol esou ze soen, „amused“ iwwert déi Aart a Weis, wéi d'Europäesch Kommission ënnert dem Jean-Claude Juncker an deem heiten Dossier virgaangen ass, wou eis praktesch am leschte Moment e puer wichteg Dispositiounen virenthale gi sinn. Op alle Fall zéie mer do och alleguerten en engem Strang. Mir musse kucken, datt mer do awer déi Dispositiounen, déi eis wierklech géifen... net nëmmen eis, mä Europa géife wéidoen, musse verhénnert kréien, datt mer weider och kënnen op eis Fongenindustrie setzen.

Diversifikatioun Ekonomie. Natierlech brauche mer bei eise Betriber och Kleng- a Mëttelbetriber. Mir mussen do och innovativ sinn. Mir hunn den Hiewel ëmgesat, fir datt mer och Lëtzebuerg als eng Start-up-Nation maachen. Ech mengen, Lëtzebuerg soll och e Standuert gi vun der digitaler Ekonomie. Et si jo eigentlech gutt Nouvelen, déi mer elo an de leschte Stonnen an an de leschten Deeg héieren hu vu Biissen an aus Amerika vu Google.

Voilà! Här President, ech hunn also hei e puer Beispiller geholl vu mengen zéng Geboter, fir einfach ze weisen, datt mer do also scho vill gemaach hunn, datt mer awer nach net fäerdeg sinn, datt mer also net d'Ae virun deenen Defië mussen zoumaachen. Bien au contraire, mir mussen och nach hei viruschaffen.

An dat ass jo och dat, fir dann erëm op de Budget zrëckzekommen, wat dann zum Ausdrock kënnert an esem Budget 2018. Am Budget ginn d'Jalone gesat, fir dat an deenen heite Gebidder, mä och an aneren, wou nach eng Rei Saachen ze maache sinn, kënnen virzebereeden, fir d'Land doduerjer op d'Zukunft kënnen virzebereeden. An duerfir ass eigentlech dës Budget och kee Budget fir den nächste 14. Oktober 2018. „Et ass e Budget fir déi nächst Generation“, fir et an de Wieder vum Finanzminister ze widderhuelen.

Här President, wann een an Zukunft Politik mécht a plängt, da kënnert een natierlech och net derlaansch, d'Fro vum Wuesstum unzeschwätzen. Mir mussen eis bewusst sinn, datt et eleng dem Wuesstum ze verdanken ass, datt mir haut e generéise Sozialstat hunn, well mer en duerch de Wuesstum konnten oprichten. Wa mer wëlle weider deen héije Standard vun eise soziale Systemer zu Lëtzebuerg erhalen, wa mer weider jiddwerengem wëllen Zukunftschancen zoukomme loossen, da brauch Lëtzebuerg weiderhi Wuesstum.

Dat ass fir d'DP op alle Fall ganz kloer. D'Fro ass also net, ob Wuesstum, mä d'Fro ass: Wéi ee Wuesstum? Dat ass eigentlech d'Fro. An déi nach méi kruzial Fro fir eis ass: Wéi kënnen mer de Wuesstum gestalten, datt jiddwereen - jiddwereen! -, deen hei am Land wunnt, dovunner ka profitéieren? Eis Suerg muss et sinn, datt beim Wuesstum keen op der Säit vun der Strooss stoe gelooss gëtt.

Wann ee Wuesstum seet, dann denkt een natierlech och am Hannerkapp, oder dat ass ëmmer d'Fro, déi mat dru gekoppelt ass: Wuesstum muss och nach Liewensqualitéit bedeuten.

Wat ass Liewensqualitéit? Ass dat eng gutt sozial Ofsécherung? Ass dat, wann een eng bezuelbar Wunneng huet? Ass dat, wann een eng gutt Betreiung a Bildung fir seng Kanner garantéiert huet? Ass Liewensqualitéit méi eng gesond Loft? Rou? Fräizäit hunn? Sech der Famill kënnen consacréieren?

Ass Liewensqualitéit, wann d'Pensiounen ofgeséichert sinn? Dat ass jo eng vun den Diskussiounen, déi mer wäerten an deenen nächste Joren nach intensivéieren; d'Diskussiounen ëm d'Rentenofsécherung am Joer 2060. De Moment sinn d'Reserve ganz héich. Et ass also, wéi ee géif soen, keng extrem Urgence, mä nach, ech mengen, als responsabel Politiker musse mer eis Gedanke maachen, och wann et nach wäit ewech ass. An d'Regierung huet jo do och Experten agesat, fir dat ze kucken. An ech mengen, dass déi Diskussioun haut net eriwuer ass, mä se wäert eréischt haut ufänken.

Mä einfach fir ze soen: Wuesstum a Liewensqualitéit, wat ass fir mech, fir deen Eenzelnen dat, wat dann am wichtegsten ass, wat en och gär beim Wuesstum eraus hätt? Dat ass sécherlech net einfach ze beäntweren. Iergendwou ënnert dem Stréch wäert sécherlech e bësse vun deem engen an deem aneren do derbäi sinn. An et ass d'Konscht herno vun der Politik, fir dat dann do op en Nenner ze kréien.

Ech mengen, wann ee vu Liewensqualitéit an nohaltegem Wuesstum schwätzt, da muss een och d'Fro stellen, wivill Bevëlkerungswuesstum mer hei am Land oder wivill Mënsche mer, jo, hei am Land brauchen, op där enger Säit, an och vlächcht wëllen, op där anerer Säit, verdroen. An esem Land, mir sinn 2.800 Quadratkilometer, hate mer an de leschten 20 Joer 40% Zouwuess an der Populatioun. An déi huet eis jo awer gehollef. Déi hu mer gebraucht, fir dee Liewensstandard oprechtzéieren. Wa mer also wëlle mat méi Leit och de Liewensstandard héich halen, nohaltege Wuesstum hunn, da komme mer net laansch déi Debatt, wivill Leit mer nach hei am Land brauchen a wéi mer déi dann och kënnen hei am Land mat integréieren.

An ech mengen, do war jo och déi rezent Rifkin-Debatt an der Chamber. Dat war, ech géif soen, en interessante Brainstorming, well een do eigentlech secteurwüergreifend gekuckt huet, wéi mer de Wuesstum - „2.0.“ ass et genannt ginn - kënnen an Zukunft geréieren. Och hei gëtt et also keng Zauberformel, déi mam Wuesstum zesummenhänkt, wou een eigentlech kéint soen: „Voilà, mat engem Stréch hu mer all d'Problemer aus dem Wee geraumt.“

Et gëtt och kee Knäppchen. Heiansdo, wann een esou Saache liest, och hautzudaags dann um Facebook esou Leit, déi reklaméieren. Et gëtt kee Knäppchen, wou een einfach kann och als Politik soen: „Mir dréien elo de Knäppchen ëm, dann ass de Wuesstum eriwuer. Oder mir dréien de Knäppchen esou, da floréiert en.“ Dat ass eppes, wat net esou einfach ass.

Et weess een och oft, datt d'Realitéit d'Iddie vun der Politik ganz schnell iwwerdubbelt. Ech denken nëmmen drun: IVL, an den Ufank 2000er Joren hat een do versicht, sech eng Strategie an der Landesplanung ze ginn, fir och de Wuesstum ze steieren. Mir hunn haut gesinn, datt mer an der Realität do iwwerrullt gi sinn.

Ech wëll déi Diskussioun elo net weiderféieren, mä awer einfach nëmme soen, datt een, wann ee wëllt nohaltege op de Wuesstum opbauen, e puer Piste muss suivéieren. Ech mengen, datt eventuell e Wuesstum, deen op manner Emploi berout, duerfir awer méi eng grouss Plus-value generéiert. Ech mengen, d'digital Economie kéint eng Pist sinn. Ech mengen, do kommen awer dann och aner Defien derbäi: Mobilitéit, Klimaschutz, Schutz vun de Ressourcen an esou weider, wou zum Beispill d'Circular Economy eng interessant Pist ass.

Wéi gesot: An deenen nächste Méint wäerte mer sécherlech nach méi Geleeënheet hunn, fir iwwert déi Froen ze schwätzen. Egal wéi, Här President, eppes ass mir ganz wichteg, dat ass: Mam Wuesstum soll een net Angscht maachen! Dat bréngt eis wierklech net virun. Mir mussen eis all un en Dësch setzen, d'Mënsche mat abannen, all d'Force-viven, fir dann an den Diskussiounen e gemeinsame Konsens ze fannen.

An, Här President, mir dierfen och beim Wuesstum keen ausse vir loossen. Mir mussen och zesummen als Gesellschaft wuessen. Et dierf net nëmmen e materielle Wuesstum sinn. Och eng Gesellschaft muss zesummewuessen.

An zesummen als Land wuessen, heescht also och weiderhin op d'Integratioun setze vun deenen, déi vu bausse kommen a mat eng Hand upaken, fir datt et och am Land an Zukunft gutt geet.

A wann ech vun Integratioun schwätzen, da spillt sécherlech och eis Sprooch eng zentral

Roll. Lëtzebuergesch ass a bleift eis Mammesprooch, eis Integratiounssprooch. An duerfir sinn ech och frou, datt de Gesetzesprojet iwwert d'Lëtzebuerg Sprooch deponéiert ginn ass, wou ënner anerem d'Wichtigkeet vun der Lëtzebuerg Sprooch gestärkt gëtt, de Gebrauch vun der Lëtzebuerg Sprooch ënnerstëtzt gëtt an och op där anerer Säit ganz vill nei Offere vu Coursen, fir eis Sprooch ze léieren, konstant erweidert ginn. A mengen Ae sinn déi Initiativen eigentlech de sozialen Zement, mat deem och e gesellschaftlechen nohaltege Wuesstum kann opgebaut ginn.

Här President, ech kommen zu menger Konklusioun. Dës ass dee leschte Budget vun dëser Legislatur. Eng Legislatur, an där et d'Regierung mat couragéierten a konkrete Mesurë fäerdegbruecht huet, fir a kierzester Zäit d'Statsfinanzen erëm op zolidd Féiss ze setzen an d'Politik un déi haiteg Realitéiten unzepassen. D'Rapportrice huet dat besonnesch gutt ënnerstrach.

Mä net nëmmen dat. Am Budget 2018 ginn och d'Jalone gesat, fir an deenen nächste Joren déi nei Defien oder déi Defien, déi bestinn, unzegoen - Betreiung, Logement, Education, Mobilitéit, Familljen- a Sozialpolitik, Diversifikatioun vun eiser Ekonomie an nach eng ganz Rei anerer -, mat deene mir d'Land zolidd op d'Zukunft wäerte preparéieren.

Dës Budget ass duerfir eigentlech net e Budget fir 2018, mä et ass e Budget vu Verantwortung. Et ass e Budget fir déi nächst Generatioun.

Ech soen lech Merci. An et ass natierlech kloer, datt mir och wäerten dës Budget stëmmen.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Berger. An den nächste Riedner, dee leschte Riedner fir de Moien oder bal de Mëtten, ass de Fraktiounschef vun der LSAP, den Här Alex Bodry. Här Bodry, Dir hutt d'Wuert.

► **M. Alex Bodry (LSAP).** - Merci, Här President. Hei huet ee sai Brëll leie gelooss. Dir Dammen an...

► **M. Eugène Berger (DP).** - Et ass net mäin.

► **M. Alex Bodry (LSAP).** - Et ass gutt.

► **M. Mars Di Bartolomeo, Président.** - Och net mäin.

(*Interruption*)

► **M. Alex Bodry (LSAP).** - Aah!

► **M. Claude Wiseler (CSV).** - Wann Der schonn esou léif frot.

(*Brouhaha et hilarité*)

► **M. Alex Bodry (LSAP).** - Voilà. Ech ginn elo manner léif, mä dat ass dann e Geste zur Versöhnung schonn direkt am Viraus.

Dir Dammen an Dir Hären, léif Kolleeginnen a Kolleegen, den Eugène Berger huet et gesot: Dës Budget ass kee Budget wéi een aneren, well en effektiv e besonnesche Stellwäert huet. Et ass de leschte Budget vun dëser Mandatsperiod. An duerfir ass et sécherlech och um Moment, fir e gewëssene finanzpolitesche Bilan ze zéien iwwert déi lescht Joren a gläichzäiteg awer och en Ausbléck ze woen op dat, wat no 2018 kënnert. An de Pluriannuel, dee jo och mat hei am Prinzip soll diskutéiert ginn, dee weist jo och an déi dote Richtung.

Selbstverständlech: De Schiet vun de Wahlen vum Oktober 2018 mécht sech och an dësen Debatte bemierkbar an en huet sech scho bemierkbar gemaach an den éischte Reaktiounen, wéi de Finanzminister am Oktober de Budget virgestallt huet. Op där enger Säit eng Opposition, déi kee gutt Hoer un deem Dokument hei gelooss huet, well et sech jo schéckt, als Opposition géint alles ze sinn, wat d'Regierung dann esou dohileet. Also, en Dokument vun iwwer 1.000 Säiten, do ass näischt Uerdentlech praktesch dran. Et si verpasste Chancen. Et ass d'Zukunft, déi hypothekéiert gëtt. Fir déi eng ass et e Wuesstumsbudget... eppes Schrecklech, e Wuesstumsbudget! Dat ass en neit Schimpfwort anscheinend, awer nëmmen an der Lëtzebuerg Politik. Dann ass et en Defizit-Budget an esou viles aneres méi.

Och heiansdo, muss ech soen, ass vu Majoritéitspartei vlächcht ze vill e Lobgesang op all d'Elementer vun deem Dokument, wat virgestallt gëtt, mä déi Schwaarz-Wäiss-Optik, déi ergëtt sech e bëssen aus der Wichtigkeet, déi e Budget huet. Et ass dat wichtegst politesch Dokument, wat regelméissig an der Chamber ofgestëmmt gëtt a besonnesch natierlech knapp oder gutt zéng Méint virun deenen nächste Wahlen.





Ech géif hei gär wëllen am Numm vun der LSAP eng differenziéiert Approche huelen an eng Analys maache vun deem Budgetsdokument mat all senge Stärkten a positiven Aspekter - a mir sinn der Meenung, dass déi bäi Wäitem ausschlaggebend sinn -, ouni awer op eng Rei vun deenen engem oder anere Schwächen a Kriticken anzegoen, déi een och kann deele par rapport zu dësem Budget.

Dëse Budget ass manner, an dat huet scho gegolft fir dee leschte Budget, den Ausdrock vun enger Revolutioun, en totale Broch mat enger Budgetpolitik, déi virdu bestanen hat, wéi e Budget vun enger gewëssener Kontinuitéit. An duerfir hunn ech ëmmer manner Verständnis eigentlech fir déi radikal Ofleennung, déi d'CSV hei un den Dag leet, well ech erkennen awer och an dësem Budget dat eent oder anert Mierkmal, wéi dat och a fréiere Budgeten de Fall war, just dass, wéi gesot, d'Rollen an der Oppositioun an an der Majoritéit sech changéiert hunn.

Ech bedauern zum Deel déi haart Kritik, déi net onbedéngt elo haut an där Virulenz geäussert ginn ass, wéi wann d'Partei Pressekonferenzen organiséieren. Do hu se iergendwéi kee Sparringspartner déi aner Säit stoen. An da si se an hirer Ausdrucksweis, fällt mer op, e bësse méi radikal, wéi se dat an der méi feutréierter Atmosphär vun dësem héijem Haus dann an esou dignen Debatte si wéi zum Budget.

► **M. Claude Wiseler (CSV).**- Mir hu keng Pressekonferenz iwwert de Budget gehalten.

► **M. Alex Bodry (LSAP).**- Nach hunn ech den Androck, dass, wat dobauss gehéiert gëtt, dat sinn éischter déi radikal Téin. Dat sinn déi ondifferenziéiert Téin. Dat ass déi pauschal Verteelung eigentlech vun enger Regierungspolitik, wou ee jo awer weess, dass dat net esou ass, dass dat esou schlecht net ass, wou een och selwer weess, léif Kolleeginnen a Kolleegen vun der CSV, dass, och wann d'CSV derbäi gewiescht wier, a villen Domänen keng fundamental aner Politik gemaach gi wier wéi déi, déi schlussendlech vun dëser Regierung gemaach ginn ass, dass mer och nach ëmmer méi Punkten hunn, déi eis hei zesummebréngen, wéi där, déi eis eigentlech erausdividéieren.

An ech fannen dat eigentlech gutt esou. Just spigelt dat sech eben an deene Kommentaren, an deene politeschen Aussoen, besonnesch och vun deene leschten Deeg, net esou richtig erëm.

Wann esou e moderéierte Politiker wéi de Claude Wiseler an enger Pressekonferenz lassleet a wéi wëll em sech schléit a mengt: „Elo ass d'Regierung eriwuer“, wéi wa se praktesch dout war a wéi wa mer just nach zéng verluere Méint virun eis hätten, mengen ech, dee misst eigentlech selwer wëssen, wéi falsch e läit. An ech mengen, dass en dat och selwer weess.

Dat ass net deen Émgangstoun, mengen ech, wéi mer sollten hei diskutéieren, och wann ech den Androck hunn, dass bei där gréisster Oppositiouspartei dee Procès en illégitimité, deen dëser Regierung vun Ufank u gemaach ginn ass, dass se eigentlech net esou richtig legitimm wier, well si als gréisste Partei net derbäi sinn, sech ëmmer nach weider an hir Pauschalkritik zitt bis haut a bis zu de Wahlen. Dat ass sécherlech net gutt. An déi Partei, déi anere regelméisseg virwerft, si géifen d'Land wëllen auserneesplecken, mécht et eigentlech mat hirer Strategie, fir systematesch d'Regierungsequipp als e Club vun Dilettanten, vun Amateuren duerstellen, déi alles géife falsch maachen, sécherlech net gutt. An dat dividéiert wierklech iwwer laang Zäit hin.

An duerfir wär ech frou, och wa Wahle virun der Dier stinn, nach zéng haart Méint fir jiddweree vun eis, dass mer géifen dee richtigen Émgangstoun, mengen ech, fannen an net esou mat Pauschalkriticken a Verunglimpfungen hei weiderfueren.

► **Mme Viviane Loschetter (déi gréng).**- Très bien!

► **M. Alex Bodry (LSAP).**- Wann de Claude Wiseler zum Beispill an engem Interview seet: „Schrecklech, dës Regierung! Stellt lech vir, 2017 muss se 2 Milliarde léine goen!“, an dann awer net gläichzäiteg seet, dass an de Joren 2014, 2015 an 2016 de Stat null Sue léine gaangen ass, da seet en de Leit net d'Wourecht! Dee versicht, op eng méi oder manner trickräich Aart a Weis den Androck ze ginn, wéi wann dës Regierung géif d'Sue vum Stat, wat jo schlussendlech d'Sue vun de Leit sinn, dilapidéieren, an awer net seet, dass et eigentlech faerdegbreucht ginn ass, wat remarkabel ass, dräi Joer hannereneen net mussen en zousätzleche Statsemprunt opzehuelen.

A schlussendlech si mer hei beschtefalls op enger Jäerlecher Moyenne vu 400 Milliounen bis 500 Milliounen Euro Emprunt, déi mer ophuele bei Investissementer, déi iwwer 2 Milliarde leien. Dat war an der vieregter Period ënner aneren Émstänn, ginn ech gär zou, liicht anescht. Duerfir, mengen ech, sollt een hei, wa mer géinteneen argumentéieren - an et gëtt sécherlech Punkten, wou een dierf verschiddener Meenung sinn an och soll verschiddener Meenung sinn; et wär jo aarm als Demokratie, wa mer net méi verschidde Meenungen an esou wichtige Froe wéi iwwert d'Budgetpolitik hätten -, probéieren awer fair ze bleiwen ee mat deem aneren a probéieren och méiglechst all Argumenter ze berücksichtegen.

► **M. Mars Di Bartolomeo, Président.**- Här Bodry, erlaabt Der...?

► **M. Alex Bodry (LSAP).**- Ma selbstverständlech.

► **M. Claude Wiseler (CSV).**- Ech versti jo déi Téin, déi elo gi sinn. Mä wann Der sot, ech hätt dat falsch duergestallt, da misst Dir an Ärer Duerstellung och soen, datt just virun de Wahlen en Emprunt vun 3 Milliarde gemaach gi war, deen am Fong geholl gehollé huet, iwwert déi Joren do ze kommen, ouni Emprunt vun der neier Regierung ze maachen. Da kommt, mer gesinn och dee ganzen Tableau!

► **Une voix.**- Très bien!

► **M. Alex Bodry (LSAP).**- Jo, mä déi 3 Milliarden hu jo och awer mat deem ze dinn, wat virdu war, wëll ech soen.

(*Interruption*)

Ech deelen awer net déi Aschätzung. Dass deen Emprunt...

► **M. Claude Wiseler (CSV).**- Ech wëll just soen: Wann Dir dee ganzen Tableau maacht, maachen ech och gär dee ganzen Tableau.

► **M. Alex Bodry (LSAP).**- ...gemaach ginn ass dee Moment, dat wär souguer nach de falsche Moment gewiescht, well duerno sinn Emprunten zu méi gënschtege Konditiounen ofgeschloss gi wéi sengerzäit, wou déi vieregte Regierung dat dann decidéiert hat. Dat huet och ze di gehat mat den Defiziter, déi mer awer déi Joren do haben.

Natierlech war... An do kommen ech op e Virwurf, deen Der hei formuléiert. Et ass gutt, dass Der mer dat Stéchwuert gitt. Ech sinn ëmmer dankbar fir deen een oder aneren Tëscheruff, dee kënnt, wou Der hei pauschal erëm eng kéier gesot hutt: „Defizit-Regierung“. An erëm eng kéier déiselwecht Strategie: „Ah, déi do wëssen net esou richtig, wat se maachen. Chaoteclub an esou virun an esou weider.“

Dës Regierung ass net méi Defizit-Regierung wéi all déi Regierungen virdu! Déi vieregte Regierung hat während hirer ganzer Period nëmmen Defiziter. Déi vir-viregt Regierung hat während dräi Jore vu fënnf Defiziter, mat héije Wuesstumsraten! Ech erënnere mech... An déi vir-viregt (veillez lire: vir-vir-viregt) Regierung iwwregens och!

Ech widerhuelen et nach eng kéier: 2003 an 2004 waren déi Joren, a besonnesch och 2004, wou mer deen héchsten Defizit am Statsbudget hei haben. Dat war net ënnert dëser Regierung. Dat war ënner enger vir-viregter Regierung - déi eenzeg, wou mer net derbäi waren; et huet awer näischt domadder ze dinn -, wou mer dann u sech hei en absolute Rekord haben am Defizit an deen och relativ herno zu Reaktiounen gefouert huet, wou stënterlech d'Tripartite zesummekomm ass, wou probéiert ginn ass - et war déi leschte kéier, wou se nach eppes zustane bruecht huet -, ze reagéieren, well bei relativ héijem Wuesstum en Defizit war.

(*Interruption*)

A fir also dës Regierung als Defizit-Regierung ze betitelen, ouni ze soen, dass all Regierungen virdu och mat héije Wuesstumsraten... Mir waren eigentlech nëmmen am Boni hei zu Lëtzebuerg, wa mir e Wirtschaftswuesstum vu 6%, 7% haben. Loosse mer soen, wéi et ass! Loosse mer et dach soen, wéi et ass!

Dat ass dann, wann een déi Analys mécht, éischter e strukturelle Problem, wann een dat als katastrophen bezechent, dass ee muss en Emprunt maachen, fir een Deel vun den ausseruerdentlechen Ausgaben ze finanzéieren, mä dann ass dat - u sech huet dat näischt mat dëser Regierung ze dinn - e strukturelle Problem, dee mer hei zu Lëtzebuerg hunn, deen ënner anerem och entstanen an net geléist ginn ass an där Zäit, wou d'CSV déi direkt Verantwortung an der Regierung hat, sief et un der Spëtzt vun der Regierung, sief et och als zoustänneg Ressortminister.

Ech wëll op déi eenzel Haaptkriticken agoen, déi ech héieren hunn an den éischte Reaktiounen op dëse Budgetsprojert vun der Regierung.

Eng klassesch Kritik vun der Oppositioun bei all Budget, deen d'Wahljoer betrëfft: „Et ass e Wahlbudget!“ E Budget, deen also direkt scho suspekt ass, deen net richtig ass, dee mat Wahlkaddoen zesumme verbonne ginn ass. Dat war elo net haaptsächlech d'CSV, mä et gëtt nach aner Oppositiouspartei wéi d'CSV, déi dat als Haaptargument - et vergësst een et heiansdo, mä et ass awer ëmmer gutt ze rapeléieren - ervirgeruff hunn.

Ech kann an deem Budget, soen ech ganz éierlech, näischt erkenne vu Moosnamen, déi vum Himmel gefall wären an déi net schon an deene Jore virdu diskutéiert gi wären, déi zu engem gudden Deel och am Regierungsprogramm stoungen, déi zumindest scho virdu iwwer laang Joren... Ech huelen zum Beispill d'gratis Schoulbicher. Dat ass eng Diskussioun, déi mir schonn zwee, dräi Joer hei am Parlament féieren, wou mer selwer schonn op deem dote Punkt hei intervenéiert hunn, dass mir dat doten als LSAP géife richtig fannen, an dat misst och kommen, wou vun den zoustänneg Ministere gesot ginn ass: „Mir kucken, iwwer wat fir ee Wee dass mer dat dote kënne maachen.“ Elo gëtt et iwwert deen heite Budget gemaach. Ee Beispill.

Dat gëllt och fir aner Punkten, wou och heiansdo nogebessert gëtt, wéi zum Beispill, wat mer elo bei der Loyerssubventioun gemaach hunn, wou mer mierken, dass et net esou gräift, wéi et sollt gräifen. Da bessere mer no. Dat elo als Wahlbudget ze bezeichnen, wou dann d'Iddi kënnt, dass Wahlkaddoen domadder verbonne wieren, kann ech net gëlle loosse, well fir all déi Leit, déi dat dote kréien an an Zukunft wäerte kréien, ass dat dote kee Wahlkaddo, ass dat doten e Plus, dee si weiderbréngt.

Dat doten hëlleft haaptsächlech deene Leit, déi net esou gutt dru sinn. Dat sinn also alles Moosnamen, déi richtig sinn a wou et och wichteg ass, dass mer se hei maachen, wou ech och elo an der éischter Ried zum Beispill vun der Oppositioun eigentlech weineg Kritik an deenen neie Moosnamen do fonnt hunn. Dat wäert dann och an déi laang Lëscht komme vun deene Saachen, déi d'CSV net wëllt réckgängig maachen, wa se dann nach eng kéier sollt an eng nächst Regierung kommen a wa se och nach e Partner géif fannen, dee mat d'accord wär, fir eppes dorunner ze änneren, wat hei elo an dëser Period decidéiert ginn ass.

Ech mengen, dass mer hei, och mat deem heite Budget, net an engem Wahlbudget sinn, well de Budget sech aschreift an eng méijäreg Finanzpolitik, wéi se festgeluecht ginn ass a wéi se och europäesch geregelt ass. A mir si konform, mir sinn eent vun deene weinege Länner, déi iwwert déi ganz Period... ech menge souguer dat eenzeg, elo e ganz kleng selekte Club, e Land, wat elo och weider konform ass zu allen europäesche Regeln.

Och zu de präventiven europäesche Regeln, also och bei de sougenannte makroökonomeschen Equilibere wéi och bei de Budgete selwer si mer total konform zu alle Regeln. An dat gëtt eis och regelméisseg zertifizéiert vun allen neutrale Stellen, déi do sinn. A mir sollen, mengen ech, och weiderhin zefridde sinn doruwwer. Mir sinn et op jidde Fall als LSAP-Fraktioun, dass mer op engem Wuesstum kënnen tabléieren tëschent 3,5% a 4,5%. Dat ass bal duebel esou vill wéi d'Moyenne an der Eurozon, et ass virun allem daitlech méi wéi an eisen Nopeschlänner.

Mä et ass och, dat huet awer während Jore kee gestéiert, manner wéi dee Wuesstum, dee mer emol kannt hunn an deenen „Vingt glorieuses“, dat heescht vu Métt der 80er Joren u bis ufanks an dëst Jorhonnert, wou mer am Schnëtt 5% reale Wirtschaftswuesstum hei zu Lëtzebuerg haben. Mir situéieren eis also ganz daitlech dorënner. An eist Wuesstumspotenzial, eis Croissance potentielle, déi gëtt beschtefalls bei 3% haut fixéiert, vläicht souguer liicht drënner.

Also all deene Leit, déi elo a Krämpf verfallen, wa se 3,4% a 4% Wuesstum elo héieren, wëll ech just soen, dass mer Perioden haben, wou mer iwwer laang Zäiten an der Moyenne 5% Wuesstum haben, an dass d'Perspektiven zu Lëtzebuerg net déi sinn, dass mer géifen nach méi staark wuessen, mä éischter, dass mer tendenziell an deenen nächste Jore manner Wuesstum hunn. An dat stellt schonn eng Rei vun Erausforderungen un eis. Och dee manner Wuesstum stellt Erausforderungen un eis, wéi och e staarke Wuesstum dat sécherlech mécht.

An da kommen ech zu deem, wéi gesot, neie Virwurf, dee wierklech nei an der politescher Diskussioun ass. D'Kolleeg vun déi Lénk, do war ech ganz erstaunt, hunn dem Budget virgeworf, et wär e Wuesstumsbudget. Bon! Si hätte vläicht léiwer en Austeritéitsbudget gehat. Mä ech...

(*Interruption*)

...mengen, dass et gutt ass, dass mer e Wuesstumsbudget hunn. E Wuesstumsbudget, dat heescht näamlech, dass d'Ausgabe vum Stat, dat si jo awer Ausgaben am Interessi vu ganz, ganz ville Leit, vum Fonctionnement vun eisen Dëngschtleeschungen, em 6% wuesse par rapport zum leschte Joer, wann een déi ausseruerdentlechen Ausgaben do mat eranhëlt. Dat ass effektiv de Contraire vun engem Austeritéitsbudget, wéi mer och eigentlech esou e Budget hei déi lescht Joren net kannt hunn.

An et dierf een, mengen ech, eent net vergiessen, dat ass, dass eng direkt, zumindest méttelfristeg Korrelatioun besteet tëschent dem Wirtschaftswuesstum an de Steiereinnahmen. Dat mécht sech net eent zu eent pro Joer, mä dat mécht sech awer méttelfristeg. Et kann ee bei deenen dote Kurven novollzéien, dass eng direkt Korrelatioun besteet tëschent dem Wirtschaftswuesstum an der Aarbechtslosegkeet. Et gëtt scho laang Etüde vum Statec, déi weisen zu Lëtzebuerg, et ass eng spezifesch Lëtzeburger Situatioun, dass, wa mer net ongeféier 3% reale Wirtschaftswuesstum zu Lëtzebuerg hunn, dann d'Aarbechtslosegkeet souguer erëm zouhëlt. Op jidde Fall geet se net méi zrëck. Do ass also en direkte Lien do. Et ass och en direkte Lien do tëschent de Budgetsdefiziter an dem Wirtschaftswuesstum an natierlech och eng Korrelatioun tëschent dem Wirtschaftswuesstum an dem Equiliber an eise Sozialsystemer. Alles dat gehéiert zesummen.

A wa mer iwwer Wuesstum diskutéieren, dat solle mer, dat maache mer ganz gären, da muss een all déi doten Aspekter an all déi Querverbindungen och ëmmer do am A hunn.

Wuesstum, dat ass eis Meenung, brauche mer. Wuesstum brauch all Land. Kuckt ee Bléck, werft ee Bléck op e Land, wat iwwer elo laang Periode praktesch kee Wuesstum méi huet, kuckt op Japan, wat dat fir Konsequenzen huet! Dat ass e Land, wou d'Realléin erofginn. Et ass e Land, wat verzweifelt kämpft mat allen Investitiounspoliticken, fir souguer mat Budgetsdefiziter ze errechen, dass se erëm e bësse Wuesstum kréien, well se mat Problemer konfrontéiert sinn, déi se net gemeeschtert kréien, a well se besonnesch och ganz grouss Sozialproblemer hunn. Dat, mengen ech, soll een och am A behalen, wa mer déi doten Diskussioun probéieren.

Mä wou mer eis eens sinn, dat ass, dass mer Wuesstum brauchen, mä dass mer probéieren müssen, dee Wuesstum zum Deel anescht ze erwirtschaften, wéi mer dat haut maachen. Dorëms geet et. A Beräicher haaptsächlech, déi en héije Mehrwäert kënne produzéieren a mat der Iddi vun der Kreeslafwirtschaft, mat der Iddi och, eis op déi digital Revolutioun ze preparéieren. Alles dat, mengen ech, ass wichteg.

Mä de Wuesstum, dat ass fir eis déi kruzial Fro, de Wuesstum muss méi gerecht verdeelt ginn! De Wuesstum bréngt Gewënner. Mä de Wuesstum bréngt net jiddwerengem déiselwecht Gewënner. An déi Opdeelung do, zënter der Kris vun 2008, déi klappt guer net méi. Déi ass bal eesäiteg gaangen zugonschte vum Kapital, vun der Remuneration vum Kapital an net zugonschte vun den Aarbechter.

Dat ass e fundamentale Problem, dee mer hunn. Deen treëft net nëmme fir Lëtzebuerg zou. En treëft vläicht souguer liicht manner Lëtzebuerg, well mer hei awer manner sozial Ënnerscheeder hu wéi an enger Partie anere Länner. Mä dat ass de reelle Problem, dee mer hunn. An do muss mer eis also Gedanke maachen, wéi mer déi Ongläichheeten, déi do gewuess sinn an deene leschte Joren, wéi mer déi méi kleng maachen a wéi mer och virun allem verhënnern, dass Leit tatsächlech an d'Aarmut ofrutschen. Dat ass déi grouss Erausforderung, déi mer als LSAP gesinn an där ganzer Wuesstumsdiskussioun.

Aner Kritik: Defizitbudget. Jo, effektiv dëse Budget weist en Defizit op. E weist en net op am Budget courant, bei de gängegen Ausgaben, mä e weist en op duerch déi Kapitalausgaben. Dat sinn also haaptsächlech d'Investissementer, déi gemaach gi vu knapp, vu ronn 900 Milliounen Euro, bei enge Total vu 15 Milliarden, wann een eis Kontabilitéit hëlt, a bei engem Total vu méi wéi 17 Milliarden, wann een déi europäesch Moosseenheet unhëlt.

De Gesamtstat ass am Plus. Och dat dierfe mer net vergiessen. Ech wëll och soen, dass dës Regierung net ugetratt ass mam Zil, de Budget vum Zentralstat an den Equiliber ze bréngen. Mir sinn ugetratt mam Zil selbstverständlech, do den Defizit net ausufern ze loosse, mä d'Zil, wat definéiert ginn ass, gemeinsam an der Koalitioun, dat war och net anescht virdu mat der CSV, do war dat och net. An d'CSV weess och, firwat dass se deemools dat net gefrot huet, well do hate se direkt d'Responsabilitéit. Do war och net rieds, dass sollt den Zentralstat an d'Gläichgewicht kommen. Do ass och ëmmer vum Gesamtstat geschwat ginn,





also vun de Budgete vum Stat, vun de Gemengen a vun der Sécurité sociale.

An do gesäit een, dass mer e strukturelle Saldo hunn, dat ass jo déi Moosslat, déi europäesch Moosslat, wou mer och mussen drapassen, e strukturelle Saldo hunn am Gesamtstat, deen eng schwaarz Null ausmécht, deen also iwwert dem mëttelfristegen Objektiv vu minus 0,5% ass. A wann ech elo déi positiv Nouvelle vum Finanzminister haut de Moien och mat bäihuele vun 2017 an ech extrapoléieren dat e bëssen op 2018, kann een haut scho praktesch soen, dass mer ganz no der sinn, dass mer bal de Plus 0,5% realiséieren, am Strukturellen, iwwert déi ganz Period.

Dat heescht: All déi flott Diskussiounen, déi mer hei haten, all déi Kritikke vun der Opposition, a besonnesch vun der CSV - „Stellt lech vir, déi doten, déi bricoléieren do un deenen Normen, déi mussen respektéiert ginn! Dat hätt misse mindestens op plus 0,5% gesat ginn. Wa mir do gewiescht wären, da wär dat gemaach ginn“ - abee, dës Regierung mécht et! Dës Regierung schwätzt net driwwer, mä si mécht et!

Mir hunn et fäerdegbruecht, mindestens op null ze bleiwen, während där ganzer Period, wann een net souguer ka soen - et muss een déi definitiv Zuelen natierlech ofwaarden, dat dauert awer nach e bëssen -, dass mer warscheinlech iwwert där ganzer Period hei, 2014 bis 2018, einschliisslech am Plus leie vu mindestens 0,5%, wat de strukturelle Saldo vum Gesamtstat zu Lëtzebuerg ugeet.

Et kann een also net soen, dass hei egal wat gemaach ginn ass. Mä hei ass u sech eng ganz vernünftg Finanzpolitik a Budgetspolitik gemaach ginn.

Mir haten och deemools gesot: Mir fannen et klug a richtig, sech juristeschem ze verflüchten op vläicht e manner ambitiéist Zil, wat awer d'Europäesch Kommissioun jo och proposéiert hat, an dann an der Praxis ze probéieren, et besser ze maachen. A genau dat ass eigentlech hei agetraff. Mir hunn net alles ausgenutzt vu Margen, déi een theoretesch hätt kënnen notzen, mä dat ass och ganz, relativ schwéier, hei eng Punktlandung an deem dote Beräich ze maachen. Mä mir hunn, mengen ech, dat gemaach, wat fir eis wichteg war a richtig war. An dat huet zu deem dote Resultat gefouert. Soudass mer also och do ganz korrekt sinn.

All déi Schwaarzmolerei, déi vu gewëssene Säite gemaach ginn ass, dass hei géif probéiert ginn, sech d'Lat absolutt niddreg ze halen, fir kënnen driwwerzekommen, huet sech als falsch erweisen. Mir hunn déi Margen, déi mer theoretesch hätte kënnen notzen, net genotzt, well mer gemenzt hunn, dass een effektiv och soll probéieren, net an eng nei Budgetsdefizitspiral eranzekommen.

Et wär nach méi einfach gewiescht, fir et nach besser ze maachen, an der Siicht vun deenen, déi mengen, en Equilibre oder e klengen Defizit wär eppes Katastrophales: mat e bësse manner Investissementer, ongeféier um Niveau vun 2013, dat lescht Joer vun der vieregter Period, weidergefuert, plus ganz e bësse manner bei der Steuerreform, da wär den Equilibre do gewiescht.

Déi Fro, déi ech mer stellen: Wäre dat déi richtig Politik gewiescht? Mir mengen als sozialisteschem Fraktioun, dass dat net déi richtig Politik gewiescht wär, dat doten ze maachen, dass et virun allem wichteg war, déi Investissementer, déi duerch e Spuerpak 2013 erofgesat gi sinn, successiv erëm eng Kéier eropzeféieren op en Niveau effektiv, deen emol den Niveau hei zu Lëtzebuerg war, ronn 4% vum PIB Statsquot, an op där anerer Säit awer och eng Steuererleichterung ze maachen, Steuerreform ze maachen, déi haaptsächlech, dat ass jo déi speziell Marque vun dëser Reform, haaptsächlech den Haushalter zeguttkënn. Ronn 80% vun där Steuerreform kënn den Haushalter zegutt, während an anere Steuerreformen do d'Beträiber vill méi e staarke Stellwäert an deene Reformen haten. A besonnesch cibléiert op déi kleng an déi mëttel Akommesen, déi proportional am meeschte vun där doter Reform profitéieren.

Firwat ass dat do déi richtig Politik a firwat ass eng Politik, déi vun anere Parteien an der Opposition hei propagéiert gëtt, déi falsch Politik gewiescht? Mir schénkt et, wéi wann d'CSV an drolegerweis och d'ADR eng grouss Phobie hunn, eng grouss Phobie: Dat ass de Budgetsdefizit. Bon! Den Här Schäuble ass net méi do. E sëtzt am Parlament. An d'Adepte vun dem Här Schäuble senger Finanzpolitik, hunn ech den Androck, sëtzen hei am Lëtzebuerger Parlament. Si si méi Schäuble wéi den Här Schäuble selwer!

Si propagéiere wierklech eng absolutt nëmmen op de Budgetsequilibre forcéiert ausgedréckte Budgetpolitik a vergiessen, zu wat esou eng Politik och an Däitschland gefouert huet: enorm Retarden an den Investissementer!

Kuckt, a wat fir engem Zoustand an Däitschland déi öffentlech Infrastrukture sinn! Dat kënnen mir eis hei net ausmolen! An deem emol eng Kéier räichen Däitschland!

Kuckt, zu wat déi Politik do gefouert huet an aneren europäesche Länner! Dat kann dach net de Modell sinn, dee mer fir Lëtzebuerg ustriewen!

Duerfir, mengen ech, niewent all Budgetsdisziplin, déi ee muss hunn, dass ee soll a muss dee politesche Spillraum notzen, dee vernünftegerweis do war an nach ëmmer do ass, fir d'Investissementer eropzefueren a fir och d'Leit ze bedeelegen an deem Wuessstum, deen erëm do ass.

**(M. Henri Kox prend la présidence.)**

Dat mussen mer maachen.

Wat een och muss feststellen, dat ass, dass, och wann en héije Wirtschaftswuessstum do ass, och wann et an eenzelne Secteuren och hei zu Lëtzebuerg boomt - vläicht net an alle Secteuren, mä an eenzelne Secteuren boomt et -, dat net onbedéngt direkt sech erëmispigelt a méi Paie fir d'Leit.

Dann ass et, mengen ech, awer um Stat, als Correcteur, fir derfir ze suergen, dass dat geschitt. An dat kann e maachen. Dat hu mer gemaach iwwer eng Steuerpolitik, wou mer och do eis Responsabilitéit iwwerholl hunn. Mir hunn eis Responsabilitéit geholl als Patron an de Verhandlungen am Accord salarial, wou e Plus fir d'Leit erausgesprongen ass, a mir hunn zousätzlech eis Responsabilitéit geholl iwwert déi Steuererleichterungen, déi decidéiert gi sinn, wou mer de Leit doduerjer méi Kafkraaft ginn hunn, wat noutwendeg war a wat, wéi een och schonn elo gesäit, positiv Effeten, och gesamtwirtschaftlech, huet.

Wat noutwendeg war, firwat? Well och all déi lescht Etüde vum Statec gewisen hunn, dass mer zënter 2008 an enger Period, enger relativ laanger Period sinn, wou d'real Kafkraaft, am Schnëtt, net méi eropgaangen ass. An et ass eréischt eigentlech 2017, mat der Steuerreform, mat Indexéierungen, déi erëm voll gespillt hunn, mat anere Mesuren, déi gemaach gi sinn, dass erstmaleg d'Kafkraaft hei zu Lëtzebuerg däitlech am Duerchschnëtt erëm eng Kéier wäert an d'Luucht goen. Dat war wichteg a richtig, dass mer dat dote gemaach hunn.

An duerfir mengen ech, dass mer also dat Ganzt solle positiv gesinn. Zemoos well mer och elo feststellen, dass mat der Indexbranche, mat de Steuererleichterungen, mat der Mindestlounerhéijung, déi gemaach ginn ass op de leschte Januar, mam Accord salarial an der Fonction publique, mat eenzelne sektorielle Konventionen, wéi där am Finanzsektor, déi och de Leit e Plus bruecht huet, dass et zu enger Kafkraafterhéijung komm ass an dass sech dat schonn erëmispigelt ënner anerem an den Einnahmen vun der TVA fir dat lafend Joer 2017.

Wann een do näämlech den E-Commerce erausrechent, well d'Einnahme weider erofginn an elo d'nächst Joer warscheinlech ënner 100 Milliounen wäerte falen, wou mer eng Kéier iwwer enger Milliard Einnahme vum E-Commerce hei zu Lëtzebuerg waren, gesäit een, dass, wann een dat erausrechent - ech hunn hei d'Zuele vun den éischten zéng Méint, de Minister huet de Privileg, dass en déi vun den éischten eelef Méint huet -, op jidde Fall dee Moment déi TVA-Einnahmen hors commerce électronique ëm 8%, ronn 8% an d'Luucht gaange si par rapport zum vieregte Joer.

An dat kënn natierlech dem Handel, dat kënn dem Handwierk, dat kënn ganz ville Secteuren hei zegutt. Et ass dat, wat och erëm eng Kéier sécherlech, wann och marginal, zu méi Wirtschaftswuessstum hei zu Lëtzebuerg bäigedroen huet, soudass een also iwwert déi dote Politik hei richtig gehandelt huet.

An de Mindestlounbezéier, ech soen dat och, woubäi fir eis domadder d'Diskussioun net ofgeschloss ass - wat eis differenzéiert vun aneren hei -, de Mindestlounbezéier, deen huet Enn 2017 netto 1.000 Euro méi am Portmonni wéi dat Joer virdrun duerch d'Additioun vun deenen eenzelne Moossnamen hei, déi geholl si ginn. Dat geet net duer. Mä et ass awer net näischt. Dat ass an eisen Aen en éischte Schratt.

An et kommen elo nei Schrëtt derbäi iwwert dës Budget. D'Kannerbetreierung, wat schonn ugefaangen huet, d'Kannerbetreierung méi bëlle gemaachen, d'Reform vun de Chèque-services, gratis Schoulbicher am Secondaire, Verbesserung bei der Deierechtzoulag, d'Loyerssubvention, alles dat dréit derzou bäi, dass besonnesch déi kleng Akommesen besser dosti wéi virdrun. An d'Reform vum Mindestakommes, de REVIS, soll och hëllefen, dat ze maachen doduerjer, dass hei eng aktiv Strategie och opgebaut gëtt, déi den Armutsrisiko bekämpft an déi och de Leit Hëllefstellung gëtt,

se begleet an d'Leit dozou soll féieren, dass se och an eng Aarbecht erakommen an eng Kéier voll integréiert ginn an eis Gesellschaft.

Risikogrupp: Elengerzéier, Elterendeeler, déi kenne mer. Och all déi Moossnamen do, all déi Steuerpäck, déi mer decidéiert hunn, och de REVIS, droe besonnesch där doter Situatioun Rechnung, fir besonnesch deenen dote Leit ze hëllefen.

Mir kenne glécklecherweis zu Lëtzebuerg praktesch de Phenomeen vun der Altersarmut net, am Géigesaz zu ganz, ganz villen anere Länner, well mer e gudder Pensionssystem hunn, well mer et fäerdegbruecht hunn, dee Pensionssystem och esou ze halen. An dat muss och an Zukunft eng absolutt Prioritéit kréien, net dass mer do en neit Feld opmaachen, wou d'Leit kënnen an Aarmut ofrutschen, wat bis elo hei zu Lëtzebuerg net besteet.

Et bleift de Problem awer vun den „working poor“, dee mer och hei schonn eng Kéier diskutéiert hunn an der Chamber. Et sinn ënner anerem déi Leit, déi fir de Mindestloun schaffen. Dat sinn der Zéngdausenden. Dat ass jo net nëmmen e klengen Deel vun de Leit.

An do soen ech ganz éierlech, och wa mer eis an där doter Fro an der Koalitioun a warscheinlech och hei an der Chamber net eens sinn: Dat där awer keen Tabuthema sinn, dass een och nach där hei zu Lëtzebuerg driwwer schwätzen, ob dee Loun, deen d'Leit kréien, dee vill Leit kréie fir 40 Stonnen d'Woch Aarbecht, heiansdo méi, ob deen ugemiesse ass oder net.

Déi Diskussioun solle mer féieren. Mir solle se vläicht manner iwwert de Brutto féieren, wéi iwwert den Netto féieren. Dat soll net onbedéngt mussen alles an enger Kéier geschéien. Mä mir müssen déi Diskussioun féieren. Als LSAP wäerte mer derfir suergen, dass déi Diskussioun och an deenen nächste Méint, och am Virfeld vun der nächster Mandatsperiod hei weidergefuert gëtt.

Et därf een dat net nëmmen, dat soen ech de Kolleginnen a Kollege vun der DP, net nëmmen duerch de Brëll vun der Kompetitivitéit kucken. Dat därf een net vergiessen, selbstverständlich. Duerfir muss een och nuancéiert un déi dote Fro erugeen. Mä et muss een och Empathie weise kënnen an der Politik an och sech an d'Haut vun deene Leit eraversetzen, déi schaffe ginn a mat deem dote Loun müssen eens ginn.

Dat bleift also fir eis och en Thema, wa mer och do vläicht fir de Moment net entscheedend virkommen.

► **Une voix.** - Très bien!

► **M. Alex Bodry (LSAP).** - Wichteg ass...

► **M. André Bauler (DP).** - Dofir huet den Här Berger jo och vun der sozialer Kohäsioun geschwat.

► **M. Alex Bodry (LSAP).** - Wichteg ass, ech hunn dat jo och gezielt, dass do grad an dëser Regierung och munches passéiert ass.

Sozialbudget, dës Budget ass och e Sozialbudget. Bei dësem Budget kënn een, deemno wéi een dat zusemmerechent, kënn et se bal op d'Halschent vun den Ausgaben, de Finanzminister huet nach de Moien dat eng Kéier ervirgehewen, déi ee kéint am wäiteste Sënn als Sozialausgabe bezeichnen.

Wann een elo reng kuckt, wat an deenen eenzelne Rubricen, Transferen un d'Sécurité sociale respektiv a sozial Prestatiounen, steet, da sinn dat insgesamt 6,1 Milliarden Euro. Dat sinn ënner anerem 1,7 Milliarde fir de Generalregimm vun de Pensionen. Mir hu villes budgetiséiert an deem doten Domän, hei zu Lëtzebuerg. Et ass 0,7 Milliard fir de Fonds de pension bei Stat a Gemengen. 1,5 Milliarde fir d'Assurance maladie/maternité/dépendance. Et sinn 1,1 Milliarde fir d'Zukunftskeess. Et ass 0,7 Milliard fir de Fonds pour l'emploi. An et si méi wéi 300 Milliounen un de Fonds national de solidarité.

All déi Dépense ginn automatesch an d'Luucht, ëm ronn 250 Milliounen, méi wéi 250 Milliounen ginn déi doten Depensen am Budget 2018 par rapport zu 2017 an d'Luucht. An derbäi kommen nach 100 Milliounen opgrond vu politeschen Decisiounen, déi geholl si ginn a vun deenen ech schonn déi meescht hei opgezielt hunn.

Fir de Logement, e wichtige Punkt, geet de Budget an d'Luucht. Et geet awer haaptsächlech och dee Budget an d'Luucht vun der Participatioun beim Stat u Sozialwunnenge respektiv u Wunnengen à coût modéré: ëm praktesch 20%.

Virun allem, mengen ech, e staarken Akzent an dësem Budget, dat ass eng absolutt Prioritéit fir déi dräi Koalitionsparteien, dat sinn d'Educatioun, d'Jugend an d'Kanner. Ëm 7% geet dat doten an d'Luucht op en Total vun 2,15 Milliarden Euro.

Dat spigelt sech och ënner anerem an der Beschäftigungspolitik vum Stat erëm, wou bei deene ronn 1.200 Posten, déi zousätzlech kënnen geschafe ginn am nächste Joer, iwwert d'Halschent - iwwert d'Halschent! - an deem dote Beräich sinn, am Beräich si vun de Grondschoulen, am Beräich si vun de Lycéén, am Beräich si vun der sozioeducativer Betreierung vun de Kanner, wou en extraordinären Effort dës Kéier gemaach gëtt, well och en extraordinäre Retard op deem dote Beräich bestanen huet.

Dat ass déi richtig Akzentsetzung, déi hei gemaach gëtt, well dat am breetste Sënn och mat Qualifikatioun ze dinne huet. Qualifikatioun, dat ass d'Kärwuert, d'Zukunftswuert, menger Usicht no, wa mer vum Wandel, vum digitale Wandel schwätzen, an dee mer wäerten erakommen an deenen nächste Méint. An duerfir ass dat heiten d'Zukunft. Hei ass d'Zukunft. Dat hei ass keng Hypothék op d'Zukunft. Dat hei ass d'Zukunft, déi sech an deem heite Budget, besonnesch och op deem doten Deel, erëmispigelt.

Mä, mir begrëssen och ausdrécklech, dass fir Kultur, fir Sport och däitlech méi Efforten am Budget 2018 si wéi 2017. Och dat gehéiert zum gesellschaftlechen Zesummenhalt! Wa mer dat wëlle förderen, mussen mer och als Stat - et ass net nëmmen d'Responsabilitéit vum Stat, et gëtt nach aner Akteuren, déi och Responsabilitéit hunn - awer hëllefen, dass mer do genuch Gelder zur Verfügung stellen, fir grad iwwert deen dote Wee och de sozialen Zesummenhalt vun eise Land wëllen ze stäerken.

Virun allem awer wëll ech och soen zu dësem Budget, an ech wëll och der Rapportrice, der Madamm Elvinger, Merci soe fir déi Presentatioun, déi se hei ginn huet, wou se och besonnesch e Mierkmal op d'Famill an d'Kanner a Jugend geluecht huet. Derniewent wëll ech awer och soen, dass dës Budget, duerfir dinn ech mech ëmmer esou schwéier mat där Kritik, där harscher Kritik, déi vusäite vun der Gewerkschaft vun de Statsbeamten kënn par rapport zur Regierungspolitik: Dës Budget ass e Budget vun engem staarke Stat!

Dës Budget ass e Budget vun engem Stat, deen net wëllt d'Déngschtleeschungen ofbauen, mä et ass e Budget, dee versicht, d'Déngschtleeschungen, déi öffentlech Déngschtleeschungen ze stäerken, auszubauen, emol d'Méiglechkeeten ze ginn, dass se kënnen an alle Beräicher och uerdentlech fonctionnéieren. Et ass also e Bekenntnis zu engem staarke Stat!

An duerfir dinn ech mech schwéier, wann ech dann déi Kritikke vun de Vertrieeder vun der Fonction publique héieren, wéi wann hei eng Anti-Fonction-publique-Politik géif gemaach ginn. Et ass alles aneres, dës Budget ass alles aneres wéi eng Anti-Fonction-publique-Politik. Et ass d'Stäerkung vun der Fonction publique duerch dee massive Rekrutement, deen hei virgesinn ass, duerch och deen Deel vum Accord salarial, deen nach eng Kéier ëmgesat gëtt och schonn iwwert deen heite Budget.

Dat alles ziilt drop hin, fir dass mer gutt, performant Déngschtleeschungen am öffentlechen Beräich hunn, mat Leit, déi ënner gudden Aarbechtskonditionnen och déi doten Déngschtleeschungen fir d'Bierger kënnen maachen. Dat wëlle mer erreechen. An dës Budget mécht dat, ënner anerem, méiglech, dass dat ka geschéien.

Mir fannen dat och richtig; richtig, méi Leit an de Schoulen anzustellen, méi Leit am Beräich Sécherheet a Justiz, méi Leit och an de Finanzen. Dat war jo och een Deel vun deem Pak, Finanzpak, dee mer geschnüürt hunn am Zesummenhang och mat der Steuerreform, wou mer gesot hunn: Selbstverständlich gehéiert och dozou, dass mer eis Steierverwaltung mussen moderniséieren, ausbauen, fir dass se à même sinn, déi Gesetzer och uerdentlech ze applizéieren. An dat gëtt hei méiglech gemaach, ënner anerem, duerch deen heite Budget.

Esou eng Opstockung vun dem öffentlechen Sektor, am wäiteste Sënn, mag net jiddwerengem alichten, ass an eisen Aen awer normal, wann ee kuckt, wéi sech nëmmen an deene leschte fénnef, sechs Joer eis Bevëlkerung geännert huet. An deene leschte fénnef Joer si ronn 60.000 zousätzlech Awunner - netto! - hei op Lëtzebuerg komm. Dat sinn 2% am Schnëtt am Joer, plus! Eis aktiv Bevëlkerung huet souguer déi lescht Jore praktesch ëm 3% pro Joer zougehoen. Da bass de ongeféier bei deemselwechte Chiffer vu 60.000 Leit aktiv Bevëlkerung, déi hei bäikomm sinn.

Et ass also normal, dass, wa mer wëllen déiselwecht Qualitéit vun den Déngschtleeschungen





gen ubidden, souguer nach zousätzlecher der-bäimaachen, dass mer eis och deementsprie-chend also mussen organiséieren. Dat fanne mir als LSAP-Sektioun immens richtig, dass mer dat dote maachen.

#### (Interruption)

Pardon?

► **Une voix.**- Sektioun?

► **M. Alex Bodry** (LSAP).- D'Sektioun vun engem grouse Ganzen.

#### (Hilarité et interruption)

D'wirtschaftlech Eckdaten, dat hu vill Leit schonn ervirgehuewen, hu sech weider positiv entwéckelt, obwuel jo eng ganz Rëtsch vun ex-terne Facteuren hätte kënnen spillen, déi dat Ganz negativ beaflosst hätten. Déi Hypotheesen, zumindest fir de Moment, hu sech net agestallt.

D'Opgi vum Bankgeheimnis, do sinn et jo Etüde ginn, wivill Dausend Aarbechtsplaze mer hei zu Lëtzebuerg géife verléieren, wann dat géif kommen. Do froen ech: Wat war den Interêt hannert där Etüd? Wat sollt domadder eigentlech erreecht ginn, wann een esou Etüde mécht an et stellt een herno fest, dass et guer net esou kënn, wéi an deenen Etüden da steet?

Nei Encadrement, wat d'Aktivitéiten am Bank- a Finanzsektor hei ugeet, d'Brexit-Verhandlungen, alles dat hätt kënnen negativ och hei zu Lëtzebuerg spillen. Dat huet et bis elo net gemaach. Am Géigendeel! Mir stelle fest, dass, ënner anerem, och iwwert déi méi Plazen, déi geschafe gi sinn an déi och ewell gemellt ginn, d'Aarbechtslosegkeet weider zrëckgeet. 2017, wéi dat och schonn 2015 an 2016 de Fall war, an och 2018 wäert dat de Fall sinn, a mir wäerten net nëmme prozentual manner Aarbechtsloser hunn Enn 2018, mir wäerten och an absolutten Zuelen 2018 um Enn vum Joer manner Aarbechtsloser hunn, wéi mer dat haten, ewéi dës Regierung ugefaangen huet am Dezember 2013. Et ass also net nëmme eng prozentual Entwécklung opgrond vun enger aktiver Bevëlkerung, déi zouhëlt, mä an absolutten Zuele gesäit een dat do och.

A wat, mengen ech, wichtig ass, dass een och gesäit, dass op där enger Säit de Fonds pour l'emploi weider staark Ausgaben huet, ech hu jo d'Zuel virdu genannt, mä déi Ausgaben elo net méi esou wuesse wéi virdu, virun allem awer well se kënnen zum Deel reorientéiert ginn, e bësse manner, well mer manner Aarbechtsloser hunn, an de Beräich vun der Aarbechtslosenentschiedegung reorientéiert ginn, a méi Gelder derfir fräi ginn, fir se an aktiv Beschäftigungsmoossnamen eranzehuelen. Ob dat eng Garantie pour la jeunesse ass, wou mer spezifesch also déi jonk Leit cibléieren, déi op den Aarbechtsmaart wëlle kommen, oder ob dat och besonnesch elo déi nei Projete sinn, fir eben déi Schwièrverméttelbar, déi Laang-zäitaarbechtsloser erëm eng Kéier an eng Aarbecht eranzeféieren, a wou an dësem Budget och Kreditter virgesi sinn, fir 400 Leit iwwert deen dote Wee kënnen ze placéieren.

Mir stellen och fest, dass déi Reform vun der ADEM, déi duerchgefouert ginn ass, hir Friichten dréit, dass den Accord, dee mam Patronat ofgeschloss ginn ass, och seng Friichten dréit, dass also do duerch Reformen, déi gemaach si ginn, duerch nei Formen vun Zesummenaar-becht, déi gesicht gi sinn am Aarbechtsminis-tère, et fäerdegbruecht ginn ass, och eng däit-lech Verbesserung vun der Situatioun ze kréien an endlech erëm eng dauerhaft Trendwend ze kréie par rapport zu där permanenter Erhéijung vun der Aarbechtslosegkeet, déi mer iwwer laang Jore virdu kann hunn.

A mir sinn also zouversichtlech, dass mer et ëmmer méi fäerdegbréngen, d'Recht op eng sënnavoll, eng dezent an uerdentlech bezuelten Aarbecht och konkret kënnen an d'Praxis ëmzesetzen.

Dozou gehéiert selbstverständlech och eng Wirtschaft, déi dynamesch a kompetitiv ass. Och do brauche mer de Verglach mat anere Länner net ze scheien. Ech kucke mer all déi Statistiken un, déi regelméisseg vun eise-m Observatoire de la compétitivité gesammelt ginn. Ech kucken dee leschten Indicateur, wou och de Bien-être mat berücksichtegt ginn ass, wat e synthetischen Indicateur vu 67 verschidden Ennerindicateuren ass a wou mer bei deenen 28 EU-Staten op der véierter Plaz leien, no Dänemark, Schweden an Irland.

An och all Ratingagence soen zënter Joren nääsch anescht. Si ginn eis den Triple-A a si soen, dass do och d'Perspektive stabil si fir déi nächst Zäit. Alles dat weist, dass mer also staark

do sinn, esou staark do sinn, dass een, wéi gesot, ënnert deem Androck vun engem Bäibe-hale vun enger néideger Wettbewerbsfäegkeet och aner Diskussiounen, och Sozialdiskussiounen hei zu Lëtzebuerg kann an därer féieren.

Dat beweist och, dass mer d'Finanz- an d'Schuldekris hei zu Lëtzebuerg gutt ge-meeschtert hunn. Et ass nääsch zerschloe ginn hei am Land. Dee Meritt huet souwuel déi viregt Regierung wéi och dës Regierung.

An et huet, mengen ech, och bewisen, ech därerf dat hei soen, dass déi Iddi vum Zukunfts-pak richtig war. Den Zukunftspak war richtig, fir regelméisseg, an dat gött och a ganz ville Gemengen esou gemaach, ze kucken, ob déi kulant Depensen, déi s de hues, gerechtfertegt sinn, dass se dat bréngen, firwat dass se eigent-lech sollte getätegt ginn, a wat eventuell do vun Adaptatiounen muss gemaach ginn.

Dat schéngt mir e ganz normalen Exercice ze sinn. Deen ass gemaach gi vun dëser Regie-rung. Déi viregt Regierung huet do nëmme usazweis eigentlech probéiert, eppes ze bewe-gen. Si huet dat awer ni am Ganzen duerchge-zunn. An et bleift fir mech awer eng richtig Decisioun, fir dat ze maachen.

Déi Mesure do, och wa se net ganz ëmgesat ginn ass, huet ëmmerhin awer, wann ech dat rechnen, ech kucken elo net d'Erhéijung vun der TVA mat derbäi, iwwert déi Period '15 bis '18 iwwer 900 Milliounen Euro bruecht. Spuer-moossnamen! Iwwer 900 Milliounen Euro! Net pro Joer, awer op déi Period gerechent. An dat ass vill! Ech wënschen all deene bonne Chance, déi esou Zomme wëllen an nächster Zäit siche goen an de kulant Ausgabe beim Stat! Dat ass net evident.

Sécherlech, dat huet sech erweisen, déi eng oder aner Moossnam war vläicht net bis un d'Enn konsequent duerchduecht. Se war méi schwiereg ëmzesetzen, wéi gemengt gi war. Se war net genuch preparéiert. Alles dat huet sécherlech matgespillt, firwat eng Rei vu Saa-chen net esou ëmgesat si ginn, mä et bleift awer richtig, dass d'Regierung dat dote ge-maach huet. An all Regierung soll vun Zäit zu Zäit sécherlech esou en Exercice maachen.

Mir sinn och der Meinung, dass et richtig war, en Zukunftsfong anzerichten. Dat ass nääm-lech eng Fuerderung, déi d'LSAP schonn och ënnert der viregter Regierung emol geäussert huet. Bal ware mer eng Kéier drun, mat der CSV esou eppes ze realiséieren, an op eemol ass et erëm eng Kéier fale gelooss ginn. Dat hat awer nääsch domadder ze dinn, dass mer de-mools am Defizit gewiescht wäeren. Dat waren aner Ursachen.

Wat ass deen Zukunftsfong? Et ass jo eigent-lech eng Reserv, déi net direkt affektéiert ass; wéi mer haut och Reserven an eisen Investi-tionsfongen hunn. Do seet jo keen: „Mir där-feren déi net méi speisen, well mer net am abso-lutten Equilibre am Budget sinn.“ Do seet jo keen: „Déi Fongen därferen net weider iwwert d'Dotatiounen vum Stat gespeist ginn.“ Firwat soll dann net deen Zukunftsfong kënnen iwwer Dotatiounen vum Stat gespeist ginn? Et ass ge-nau datselwecht.

An duerfir mengen ech, dass et wichtig ass, dass mer eng Reserv hunn, déi eben net spezi-fesch affektéiert ass op eenzel Projeten, déi mer zur Maturitéit komme loosse iwwer laang Jo-ren, an déi dann och zur Verfügung steet, wa se eng Kéier gebraucht gëtt. Alles dat, mengen ech, ass eng Decisioun gewiescht, déi net eis Zukunft hypothekéiert, mä déi eis Zukunft wei-der preparéiert.

Här President, ech hu gesot, ech deelen duerchaus déi eng oder déi aner Kritik, déi geäussert ginn ass, wat dës Budget ugeet, a senger Ausaarbechtung, wou net onbedéngt elo d'Regierung fir alles Responsabilitéit dréit. Dat war den Timing mat deene Korrektoren, déi relativ kuerzfristeg duerchgefouert gi sinn iwwert de Statec, fir d'Joren 2017 an 2018. An dann d'Kritik - déi deelen ech dann erëm eng Kéier net -, wéi gesot ginn ass: „Oh, d'Regie-rung hätt do misse reagéieren. Et ka jo net sinn, dass se e Budget opstellt op gewësse Pro-gnosen, an dann änneren déi, an da bleift de Budget d'selwecht!“

Ech wëll soen: Dat doten hate mer nach ëm-mer. An d'Reaktioun vum CSV-Finanzminister war ëmmer: „Ech änneren nääsch un deem Budget.“ Gutt. Dat mag awer och falsch sinn, well och d'CSV-Ministère soen net ëmmer on-bedéngt déi gottgebe Wourecht.

Mä hei muss ee jo och gesinn: Firwat sinn déi Rektifikatiounen gemaach ginn? Duerfir muss een awer hei genau verstoen... An ech froe mech, ob all déi Organer, déi dat hei aviséiert hunn, dat och richtig verstanen hunn. Déi si jo nëmme gemaach ginn, well eigentlech d'Chif-fere vu virdu - vun 2015 an 2016 - no ënne korrigéiert gi sinn. A bal mechanesch huet dat och bedéngt, dass och '17 an '18 korrigéiert gi sinn.

Mä déi Einname vu '15 a '16, déi si jo schonn do! Du kanns also duerchaus vun deenen Ein-name vu '15 a '16 ausgoen, fir deng Berech-nungen ze maachen, wat dat fir '17 an '18 aus-mécht. Fir '17 kenne mer schonn zéng Méint, nom Minister eelef Méint Einnamen. Do gesäit een, dass mer éischer méi Einnamen hu wéi manner Einnamen. Also brauch een do och keng Korrektur méi ze maachen, well elo de Wirtschaftswuesstum vläicht 2017 manner war wéi ee Moment ugehall ginn ass. An dat-selwecht gëllt fir 2018.

Dat heescht, mir hunn also konkret Donnéeën. Dat sinn déi Einnamen, déi enregistriert gi si bei de Steierverwaltungen. An opgrond vun deene konkreten Zuele kann s de jo schaffen, fir dann deng Berechnung ze maache fir d'Zu-kunft. Du brauchts also net alles, menger Usicht no, ze rektifizéieren, well s de jo déi reell Don-néeën hues fir déi dote Joren, wou sech herno après coup d'Wuesstumsraten no ënne be-weegt hunn.

Mä d'Einname sinn do! Da sinn déi Einnamen ebe komm bei wéinegem Wuesstum. Kee Grond, fir se da fir déi nächst Joren erofzeset-zen. Also, ech mengen, dass do d'Iwwerleeun-gen net onbedéngt ëmmer richtig ware vun all deenen, déi dat gekuckt hunn.

Kloer, mir widderhuelen dat nach eng Kéier, dat ass eng Positioun, déi mer scho laang hunn: De Pluriannuel solle mer trenne vun de järelechen normale Budgete vum Stat. Mir sol-len dat zesumme maachen am Abrëll/Mee, wa mer u sech de Pacte de stabilité et de crois-sance op Brëssel maachen. Dann hu mer do déiselwecht Donnéeën. Dat ass jo och eng mëttelfristeg Planung, déi do gemaach gëtt.

Mir sollen et och net méi Artikel fir Artikel maa-chen, mä mat grousssem Bléck operéieren, ään-lech wéi dat beim Pacte de stabilité et de crois-sance do ass. Dat vereinfacht eis d'Diskussioun, mengen ech. An dat féiert och derzou, dass mer eis do vläicht méi op dat Mëttelfristeg konzentrieren, wéi dass mer eis dann, wéi dat haut noutgedrongen de Fall ass, op d'Joer 2018 konzentrierte mat dësem Budget.

Investissement, jo! Woubäi - dat hunn ech elo gemierkt bei Froen, déi d'Press gestallt huet no der Interventioun vum Här Wiseler - e falschen Androck wëssentlech oder onwëssentlech pro-voziert ginn ass vum CSV-Sprieche, wéi wann elo d'Investissementer do erofgesat gi wäere fir déi Period no 2018. Si wuessen net méi esou staark, wéi se emol an der Moyenne gewuesst sinn, mä an absolutten Zuele gi se net erof.

An do kann ee sech d'Fro stellen, eng nächst Regierung ka sech dat jo dann duerch de Kapp goe loosse, ob een do net, wann ee méi wäit kuckt an et kuckt ee besonnesch, wat elo an dräi, véier Joer ass, dass een do vläicht eng En-veloppe virgesäit, ouni se ze affektéieren op eenzel Projeten; dass ee seet: Lauschart emol, mir ginn am Fong dervun aus, dass mer do nach eng Kéier 50, 100 Milliounen dropsetzen, well mer der Meinung sinn, dass dat duerch nei Projete kann opgefëllt ginn, déi mer sécher-lech och an Zukunft brauchen. Dann hätt een do méi Flexibilitéit an deem Ganzen an et hätt een deem Rechnung gedroen, dass do muss eppes geschéien.

Mä och dat ännert jo fundamental nääsch. Och wann do 50 Milliounen oder 100 Mil-lioune bäigesat gi pro Joer, ännert dat nääsch un dem fundamentalen Equilibre am Statsbud-get. Et ass also éischer eng Detaildiskussioun, déi mer hei féieren, wéi dass sech eppes funda-mental géif änneren un der Finanzsituatioun vum Stat.

Richtig ass et, déi Kritik, déi geäussert ginn ass, dës Kéier zwar net, mä an der Vergaangeneit, fir ze soen: Mir müssen eis Aarbechtshypothee-sen, op deene mer schaffen, fir ze kucken, wéi d'Land sech soll an Zukunft entwéckelen, har-moniséieren. Et kann net sinn, dass mer an der Landesplanung déi eng Hypothees huelen, an der Finanzplanung eng aner Hypothees huelen an an enger drëtter sektorieller Planung dann erëm mat aneren Hypotheese schaffen.

Dat sollen dann harmoniséiert Hypotheese sinn. Dat kënnen jo och Forschette sinn. Dat kënnen e puer Hypotheese sinn, op deenen ee schafft, mä net all Kéiers wiesselen, jee no deem The-meberäich, wou ee grad amgaangen ass, eng perspektivesch Planung duerchzuführen.

Wou et nach hapert, dat hu mer erëm confir-méiert kritt, dat ass awer den Informations- an Datenaustausch tëschent deenen eenzelnen Akteuren: ob dat elo d'Zentralbank ass, ob dat de Conseil national des finances publiques ugeet. Do sinn nach ëmmer - ech weess et net - Berührungsängschten do tëschent eenzelne Statsverwaltungen mat deenen Instanzen, oder ëmgekeiert. Op jidde Fall, do schéngt nach net esou de Floss vun den Informatiounen ze sinn, wéi et vläicht wünschenswäert wär.

Mä do ass schonn, mengen ech, e wichtige Schrëtt, dass jo och elo viru Kuerzem deen neie

Comité de prévision - säi genauen Titel entfält mer elo - offiziell da geschafe ginn ass, deen et eigentlech misst vereinfachen, dass deen Datenaustausch an déi Diskussioun do iwwert d'Gronddaten, op deene geschafft gëtt, och verbessert gëtt.

Wichtig bleift fir eis - an dat ass e Bemoll, mä dee Bemoll hu mer och scho missen um Enn vun der viregter Period soen -, dass mer et net fäerdegbruecht hunn, awer déi nei Budgetsphi-losophie, dass een eigentlech mat Objektiver fiert, hei ëmzesetzen an eis Texter.

Mir sinn eis bewosst, dass dat vill Aarbecht ass, dass dat eng grouss Ëmstellung ass, dass dat also riskéiert, ëmmer bei den dagespolitesche Prioritéiten, déi bestinn, no hannen ze ge-rod. Mä et wär awer wichtig, dass mer sys-tematesch eng Evaluierung géifen duerch-féiere vun eenzelnen Depensen, vun eenzelne Politicken, déi mer maachen, an dass mer do-ropshi versichen, och politesch Decisiounen dann ze huelen.

Wann do Problemer sinn, dat vu Regierungssäit ze maachen, froen ech mech, ob d'Chamber sech net soll als Parlament dann déi Méig-lechkeete ginn, dee Manpower ginn, déi Exper-tise ginn, fir dann ënner hirer Responsabilitéit an Deelberäicher zumindest déi Bewäertung vun de Politicke virzehuelen, fir dass mer och wëssen, dass mer richtigegleie mat deem, wat mer decidéiert hunn, a wat fir eng Adapta-tiounen muss gemaach ginn.

E leschte Wonsch, deen ech hunn, dat ass, dass mer eis als Chamber selwer nach méi aktiv an d'Budgetpolitik abréngen. Wann ech dat esou vergläichen, ech si jo scho laang derbäi: Ech géif éischer soen, dass vu Joer zu Joer d'Cham-ber sech manner abréngt als Institutioun, quitte dass mer duerch déi europäesch Semes-tergeschichten awer, jo, eng Informatioun kréien. Mä aktiven Afloss op den Inhalt vum Budget hält dës Chamber weineg.

Et ass eng kollektiv Responsabilitéit, wou ech mech ganz gär mat abezéien. Dat bleift awer eppes, wat mech net zefriddestellt; loosse mer et ganz éierlech soen. Dat ass e Schwaach-punkt vun dësem Parlament. Et huet sécher-lech och deen een oder anere staarke Punkt, mä dat ass sécherlech hei e Schwaachpunkt. An do muss mer als Parlament probéieren - et ass net esou e Virwurf, deen ech hei kann un d'Regierung riichten; dee muss mer un eis selwer riichten -, eis méi staark anzebréngen, och inhaltlech, wat d'Ausrichtung vum Budget ugeet.

Ech wollt - ech hu vill ze laang geschwat - awer nach e Wuert soen iwwert d'Ierschaft, well ech och do Kommentarer gelies hunn: „Oh, wat fir eng Ierschaft iwwerléist dann dës Koalitioun, dës Regierung där nächster, wéi eng dat och ëmmer ass?“ Do hunn ech hei awer och e puer Punkten zesummedroen, déi weisen, dass, mengen ech, déi Ierschaft esou schlecht net ass. Op jidde Fall: Ech géif se gären untrieden.

Gesamtwirtschaftlech an och, wat deen Einzel-nen ugeet, sinn all Indicateuren am positive Beräich. Dat ass e groussen Ennerscheid zu deem, wat viru véier, fënnef Joer de Fall war. An effektiv, do gëtt et jo déi Enquêtes, de Minister huet se kuerz ugeschnidden, vun der Banque centrale respektiv vum Statec, déi regelméisseg kucken, wéi d'Vertrauen do ass: d'Vertraue vum Konsument, d'Vertrauen awer och vun de Pa-tronen an deenen eenzelne Wirtschaftsbe-räicher. Ech hunn einfach e puer Punkten hei zesummegechrivven.

De Konsument, mir alleguerten: 2013 louch do de Vertrauensindicateur am Minus, bei minus 10. 2017 läit e bei plus 15. Däitlech besser wéi virun der Kris.

Mat Ausnam vun der Industrie, wou e bei null läit, ass en am Commerce, am Beräich vun de Finanzdëngschtleeschungen, am Beräich vun der Konstruktioun, am Beräich vun aneren Dëngschtleeschungen iwwerall am positive Beräich. Et ass also e grousst Vertrauen do.

Et ass keng negativ Stëmmung an dësem Land, och wann eenzel Leit déi negativ Stëmmung wëlle konstruieren. Et ass eng positiv Stëm-mung. Et ass eng Vertrauensstëmmung an dë-sem Land do. Bestärkt och duerch Sondagen, déi viru Kuerzem jo vun ILReS am Optrag vum „Lëtzebuerger Wort“ an RTL duerchgefouert gi sinn, wou d'Leit gefrot si ginn am Dezember 2013 (veuillez lire: 2017), oder d'Fro war éischer schonn am November gestallt ginn: „Wéi schätzt Dir Är eege Situatioun an?“ Do hu 87% gesot, si géife se ganz positiv oder éischer positiv aschätzen. Am Dezember 2013 waren et nach 76%, déi där Meinung waren. Also e Krack manner.

A méi däitlech ass d'Situatioun nach, wann d'Leit gefrot si ginn am November dës Joer, wéi se d'Situatioun vum Land géifen aschätzen, notament d'Wirtschaftssituatioun vum Land géifen aschätzen. Do waren et am Dezember '13 just 52%, déi se positiv ageschat hunn. Elo





sinn et 88%. Praktesch also néng Lëtzebuerger vun zéng, déi soen: „Et geet dem Land gutt.“

Eis Inflatoun läit am Schnëtt bei 1,5%. D’Aarbechtslosegkeet, wéi gesot, tendenziell bei 5,7%. Den Emploi steigt ëm 3% pro Joer. An et gesäit een och, dass mer u sech gutt dostinn.

Hei ass keen esou en décke Problem ze léisen, wéi dës Regierung, dës Koalitioun ze léisen hat mam Ewechfale vun den TVA-Einnamen op dem E-Commerce. Sécherlech hu mer dovunner profitéiert! Iwwregens huet net den Här Frieden dat geschaaft, mä d’Chamber huet dat geschaaft, well e Gesetz huet misse gemaach ginn. Mä wann d’Deputéierte selwer net méi vun der Chamber schwätzen, wie soll dann nach vun der Chamber schwätzen?

Mä d’Stock-Options, dat ass den Här Frieden. Do hutt Der vollkomme recht, well do huet d’Chamber u sech net mat ofgestëmmt. Dat ass iwwer eng Circulaire gemaach ginn; emol net vum Här Frieden, mä iwwert den Direkter vun der Steierverwaltung.

Et bleift awer, dass mer... An dat war natierlech net eng Milliard pro Joer - dat huet och kee gesot -, mä et mécht elo praktesch eng Milliard aus, well mer ee Moment jo nach eng Kéier eng Einnam haten. Dat war iwwer eng Milliard an deem dote Beräich. An elo sinn d’Projektiounen, dass mer bei manner wéi 100 Millioune leien dat nächst Joer. Do ass een also bei deem, wat Joer fir Joer... Et ass jo net nëmmen ee Joer ewechgefall. Joer fir Joer ass dat progressiv ëmmer méi ginn, wat ewechgefall ass.

An dee Problem war net geléist vun der viregter Regierung. Vlächicht ass se och net derzou komm, de Problem ze léisen, well si hat jo keng ganz Mandatsperiod. E war awer erkannt. Dat ass ganz kloer, well och schonn an der leschter Aktualisatioun vum Programme de stabilité et de croissance, deen déi Regierung am Abrëll 2013 op Bréissel geschéckt huet, war eng Erhéijung vun der TVA virgesinn, déi herno zwar vun der CSV net mat ofgestëmmt ginn ass an déi sollt méi brénge wéi dat, wat d’TVA-Reform vun dëser Regierung bruecht huet. Well deemools stoung dran, dass se soll 450 Millioune Euro bréngen. A wann ech d’Zuele kucken, déi de Finanzminister elo hei gewisen huet, da gesäit een, dass u sech déi TVA-Erhéijung do manner zu Buch geschloen huet, wéi dat emol eng Kéier eng viregt Regierung projezéiert hat.

Dat heescht, esou eng Ierfschaft ass net do. Esou eng Noss ze knacken am éischte Joer huet

déi nächst Regierung net, wéi dës Regierung ze knacken hat.

Zweetens: Ech kucken elo net nëmmen op de Stat, ech kucken och op d’Sozialsystemer. Mir hunn an eise Pensiounsfong esou vill Milliarde stoen, dass et géif duergoen, fir elo 4,5-mol Joresdependensé bei de Pensiounen auszebezuelen. An Der gesitt och, wann Der d’Zuele kuckt, dass praktesch iwwer eng Milliard pro Joer nach an déi Reserv do bäikommt ass, ouni ze kucken, wat eventuell dann déi Zëssen an Dividenden nach zousätzlech eragespullt hunn. Dat ass jo awer emol eppes. Dat ass och méi wéi viru fënnef Joer.

D’Gesondheetskeess, déi war eigentlech..., esou just ass déi opgaangen. Déi schreift erëm eng Kéier erstmaleg schwaarz Zuelen, wat et och méiglech gemaach huet, fir u sech en Ausbau vun de Prestatiounen ze maachen, besonnesch am Aen- an am Zännberäich. Och dat ass besser wéi viru véier Joer.

Ech hu mer och d’Avoire vun de Spezialfongen ugekuckt. Ass do ausgeraibert ginn oder net? Ass do iergendeng Politik vu verbranntem Buedem probéiert ginn hei vun diabolischen Espritene duerchzesetzen? 2013 hate mer 1,6 Milliarden dran. 2018 sinn et 1,5 Milliarden. An dobäi ass awer den Zukunftsfong net mat dran. Wann ech dee mat bäirechnen, si mer dann och bei iwwer 1,7 Milliarden. Soudass mer, kann ee soen, plus ou moins um selwechten Niveau sinn, wéi dat de Fall war, wéi dës Regierung ugetratt ass.

Soudass ech mengen, dass mer also hei an enger Situatioun sinn, déi gutt ass. Et ass eng Ierfschaft, déi een net zu Bénéfice d’inventaire muss untrieden, mä bei där ee kann direkt soen: „Jo, ech iwwerhuelen dat doten.“

An och, ech hunn et scho gesot, déi Steuerreform, déi gemaach ginn ass, wat fir mech nach ëmmer mat dee gréissten Exploit vun dëser Koalitioun ass, déi gëtt jo och guer net esou negativ gesinn, och vu baussen. Ech erlabe mer do den Avis vun der EU-Kommissioun ze zitieren, also vu Leit, déi dem Här Juncker ënnerstallt sinn, dee jo net derfir bekannt ass, dass en e besonnesch „zäertlech“ Verhältnis zu dëser Regierung hätt, fir emol säi Vokabulär ze gebrauchen, dee Folgendes seet. E seet, dass dës Budgetsprojett konform ass zum Stabilitéitspakt, mä dann awer och seet: „In light of its fiscal position, the recent decision by the national authorities to use the available fiscal space to implement a tax reform appears appropriate.“

Dat heescht, do steet net dran: „Neen, si hätten dat net dierfe maachen.“ Neen, dat do ass approprié a senger Envergue, a senger Zilrichtung. Ech mengen, dat ass e ganz gudden Avis zu deem Ganzen.

D’Ierfschaft vun dëser Koalitioun, an ech kommen zum Schluss, beschränkt sech natierlech net nëmmen op d’Finanzsituatioun vum Land. Mir mengen als LSAP-Fraktioun, dass dëst Land a ville Beräicher an deene leschte Jore moderniséiert ginn ass, dass mer et och gutt fäerdegbruecht hunn, ëmmerhin an deene puer Joer, 50.000 zousätzlech Leit hei an dësem Land opzehuelen; dorënner och eng ganz Partie vu Flüchtlingen.

Dat ass net evident. Dat hu mer fäerdegbruecht. Et ass och keng Selbstverständlechkeet. Dat ass a kengem Land eng Selbstverständlechkeet. Dozou gehéiert och politesche Wëllen, fir déi Viraussetzung ze schafen, dass dat dote méiglech ass.

Eist Land kënnt all sengen internationale Verflüchtungen no am Beräich vun der Solidaritéit, am Beräich vun der Sécherheet, am Beräich och vum Klimaschutz. D’Land huet säi sozialen Zesummenhalt erhalen an der Kris an no der Kris.

An et ass e Land virun allem, wat amgaangen ass, sech fit ze maache fir nei Erausforderungen. Nei Erausforderunge ronderëm d’Digitaliséierung, d’Robotiséierung. Nei Erausforderungen, fir och der Wirtschaft nei Perspektiven opzemaachen, mat dem Space Mining ënner anerem, mat der Debätt ronderëm d’Landesplanung, ronderëm de Rifkin-Prozess, ronderëm de qualitative Wuesstumsmodell. Alles dat si wichteg Diskussiounen, déi mer esou hei zu Lëtzebuerg ni gefouert hunn an der Vergaangenheet. Ënnert dëser Koalitioun, ënnert dëser Regierung hu mer dat gemaach.

Et ass e Land awer och, dat net fir alles eng 100%eg Léisung parat huet. Mir dokteren nach ëmmer u gudde Konzepter am Beräich vun dem Wunnengsbau a vun der Mobilitéit, och wann et do Usätz gëtt, déi et awer nach gëllt ëmzesetzen an deenen nächste Joren. A mir kränkele sécherlech un engem gewëssene Retard, dee mer a ville Beräicher geholl hunn an deene leschte Joren, wou mer iwwerrannt si gi vun enger Entwécklung, vun der Attraktivitéit vu Lëtzebuerg, déi mer eis vlächicht esou net virgestallt haten, a wou mer elo mat de Konsequenze mussen eens ginn.

Jo, d’Statsfinanzen an eise Land si gesond. D’Ausgaben zu Lëtzebuerg sinn ënner Kontroll.

An dës Koalitioun, dës Regierung huet Verantwortung iwwerholl. Si huet Verantwortung iwwerholl. Eng Verantwortung, wou ech mech froen, ob aner Leit bereet sinn, se ze huelen,...

► **Une voix.**- Très bien!

► **M. Alex Bodry (LSAP).**- ...wa se eis hei nëmme schwätze vu Méiausgaben, déi misste gemaach ginn, awer och net nëmmen am Usaz soen, wéi se géifen déi Méiausgabe finanzieren, well se scho mengen, mir géifen eigentlech jo fir déi Suen, déi mer zur Verfügung hunn, ze vill Ausgabe maachen. Déi Äntwert si se eis bis haut schëlleg bliwwen. An ech fäerten, mir wäerte se och haut net kréien.

Merci.

► **Pluieurs voix.**- Très bien!

► **M. Alex Bodry (LSAP).**- D’LSAP-Fraktioun wäert selbstverständlech dës Budget stëmmen.

► **M. Henri Kox, Président de séance.**- Merci fir d’Ausféierungen.

### 3. Ordre du jour

Sou! Mir sinn um Enn vun enger laanger Debätt de Moien, déi awer an enger gudder Stonn erëm weiderfiert. Dofir, um zwou Auer ginn d’Debatten ëm de Budget 2018 weider.

(**Interruption par M. Pierre Gramegna**)

Jo, Här Finanzminister, wann ech gelift.

► **M. Pierre Gramegna, Ministre des Finances.**- Här President, kéint ech lech froen, ob et net méiglech wär, eng Véirelstonn méi ze kréien, well mer elo schonn eng Auer sinn. An ech weess net, ob dat méiglech ass, dass mer eréischt um Véirel op zwou vlächicht kéinten zesummekommen?


► **Une voix.**- Kee Problem.

► **M. Pierre Gramegna, Ministre des Finances.**- Jo? Merci.

► **M. Henri Kox, Président de séance.**- Ech gesinn, dass eng iwwerwältgend Majoritéit dann do ass. Da géife mer proposéieren, eng Véirelstonn méi spët unzefänken. Um 14.15 Auer, wann ech gelift, ginn d’Debatten da weider.

Domat ass d’Sëtzung vun de Moien opgehewen.

(**Fin de la séance publique à 12.58 heures**)



Présidence: M. Mars Di Bartolomeo, Président • Mme Simone Beissel, Vice-Présidente

## Sommaire

1. Ouverture de la séance publique  
- M. Mars Di Bartolomeo, Président
2. 7200 - Projet de loi concernant le budget des recettes et des dépenses de l’État pour l’exercice 2018 et modifiant:  
1° le Code de la sécurité sociale;  
2° le Code du travail;  
3° la loi modifiée du 27 décembre 1817 sur le droit de succession;  
4° la loi modifiée du 16 octobre 1934 sur l’évaluation des biens et valeurs;  
5° la loi modifiée du 16 octobre 1934 concernant l’impôt sur la fortune;  
6° la loi modifiée d’adaptation fiscale du 16 octobre 1934;  
7° la loi modifiée du 1<sup>er</sup> décembre 1936 concernant l’impôt commercial;  
8° la loi modifiée du 17 avril 1964 portant réorganisation de l’administration des contributions directes;  
9° la loi modifiée du 4 décembre 1967 concernant l’impôt sur le revenu;  
10° la loi modifiée du 10 mars 1969 portant institution d’une inspection générale des finances;  
11° la loi modifiée du 12 février 1979 concernant la taxe sur la valeur ajoutée;  
12° la loi modifiée du 13 juin 1984 portant révision de certaines dispositions législatives régissant la perception des droits d’enregistrement, de succession et de timbre;  
13° la loi modifiée du 23 décembre 1998 portant création de deux établissements publics dénommés 1) Centres, foyers et services pour personnes âgées; 2) Centres de gériatrie;  
14° la loi modifiée du 9 juin 1999 sur le budget, la comptabilité et la trésorerie de l’État;

- 15° la loi modifiée du 21 décembre 2001 concernant le budget des recettes et des dépenses de l’État pour l’exercice 2002;  
16° la loi modifiée du 4 juillet 2008 sur la jeunesse;  
17° la loi modifiée du 17 décembre 2010 fixant les droits d’accise et les taxes assimilées sur les produits énergétiques, l’électricité, les produits de tabacs manufacturés, l’alcool et les boissons alcooliques;  
18° la loi modifiée du 12 juillet 2014 relative à la coordination et à la gouvernance des finances publiques;  
19° la loi du 25 novembre 2014 prévoyant la procédure applicable à l’échange de renseignements sur demande en matière fiscale;  
20° la loi modifiée du 27 juin 2016 concernant le soutien au développement durable des zones rurales;  
21° la loi du 29 juin 2016 portant modification d’une disposition en matière d’impôts directs;  
22° la loi du 14 décembre 2016 portant création d’un fonds de dotation globale des communes (suite)  
et  
7201 - Projet de loi relatif à la programmation financière pluriannuelle pour la période 2017-2021 (suite)  
- Discussion générale (suite): Mme Viviane Loschetter (interventions de M. Gast Gibéryen et Mme Octavie Modert), M. Gast Gibéryen (interventions de Mme Viviane Loschetter, M. Aly Kaes, Mme Josée Lorsché et M. Roy Reding), M. David Wagner (interventions de M. Claude Haagen et M. Alex Bodry) (dépot de deux motions), M. Gilles Roth (interventions de M. Alex Bodry), M. Gilles Baum, M. Franz Fayot (interventions de M. Gilles Roth et M. Alex Bodry), M. Henri Kox (intervention de M. Marco Schank), M. Marc Spautz (interventions de M. Alex Bodry, M. Claude Haagen et Mme Viviane Loschetter), M. Claude Lamberty (interventions de M. Marc Spautz, M. Gilles Roth et M. André Bauler)

Au banc du Gouvernement se trouvent: M. Félix Braz et M. Pierre Gramegna, Ministres.

(**Début de la séance publique à 14.18 heures**)